

DISSERTATIO DOGMATICA  
DE GERMANO AC AVITO SENSV <sup>3</sup>  
SANCTORUM PATRUM, UNIVERSÆ  
SEMPER ECCLESİÆ,

A C

SACROSANCTÆ PRÆSERTIM  
TRIDENTINÆ SYNODI

CIRCA CHRISTIANAM

CONTRITIONEM

E T

ATTRITIONEM.

PER FR. CHRISTIANUM LUPUM

I P R E N S E M,

ORDINIS EREMITARUM S. AUGUSTINI,

In Universitate Lovaniensi Sacræ Theologiæ Doctorem & Professore.



LOVANI,

Typis & Sumptibus Viduæ BERNARDINI MASII sub viridi Cruce, Anno 1666.

CUM GRATIA ET PRIVILEGIO.

THE UNIVERSITY OF CHICAGO  
LIBRARY  
1100 EAST 58TH STREET  
CHICAGO, ILL. 60637  
TEL. 733-4331  
FAX 733-8328  
WWW.CHICAGO.EDU  
LIBRARY

ADMODVM REVERENDIS, AMPLISSIMIS,  
NOBILIBVS DOMINIS,  
DOMINIS,  
PRÆPOSITO.  
DECANO.  
CANONICIS  
EXEMPTÆ ECCLESİÆ CATHEDRALIS  
S. BAVONIS GANDAVENSIS.

ADM. REVERENDI, AMPLISSIMI, NOBILES DOMINI,



*Generales Ecclesiæ Synodos in devia suæ mentis patrociniū detorquere, atque ita incrustare calumnijs, est antiqua Errantium machina & conatus. Etenim Apollinarius Laodicensis in prima Syria Episcopus, dum ex Nicænæ fidei verbis, Consubstantialē Patri, humanæ ac Divinæ in Christo Domino naturarum confusionem stabilit, magnum Athanasium in literis ad Episcetum Corintbiorum Episcopum cœgit cum stomacho exclamare: Quis infernus ista erutavit? Neque enim adsumptum hominem, sed adsumens Verbum esse Patri consubstantialē definierat sacrosancta Synodus Nicæna. Longè maiorem injuriā passa sunt gloriosa sancti Cyrilli, Patriarchæ Alexandrini, adversus Heresiarcham Nestorium Capitula, eorumque comproba-*

trix & confirmatrix sacrosancta Ephesina Synodus, dum ipsa non Errones aut Hæretici, nec solus cum cætera Ioannis Antiocheni Patriarchæ inquietâ Factione Theodoretus Cyrensis in Eufratesia Provincia Episcopus, sed etiam cum magnis in orthodoxo dogmate & pace Collegis S. Gennadius, Patriarcha Constantinopolitanus, adsertæ in Christo Domino confusionis infamavit, atque ita & Arianis & Apollinariistis præbuit fomenta, Oecumenicam Synodum reddidit suspectam prævaricationis, ac semetipsum statuit ejusdem inimicum & defensorem. Eundem hodie impetum patitur sacrosancta Synodus Tridentina. Castam Dei dilectionem esse unicum novi à veteri Testamenti discrimen, unicam Christianæ vitæ regulam, unicum legis & Prophetarum finem, unicum Dominici Sanguinis & Passionis fructum, unicam Iustitiæ & peccatorum remissionis obtinendæ januam, cujus servilis gehennæ aut aliarum pœnarum metus sit quidem quandoque utile, quandoque necessarium. semper tamen extrinsecum dumtaxat exordium, ex Apostolica & perpetua omnium sub cælo Ecclesiarum traditione docet laudata Synodus, & declarat disertissimè; & ecce à quibusdam, simplicitate aut imperitiâ circumscriptis, in Ecclesiæ nobis pace dilectis Fratribus dicitur & proclamatur solum servilem gehennarum metum, adeoq; solum judicæ servitutis spiritum, quem Apostolus ac ipse in Evangelio Dominus contestantur infirmum, impetranda per mortuorum Sacramenta Iustitiæ adserere sufficientem: Adserere, quod ipsa adversum Martini Lutheri calumnias nunquam se sensisse aut docuisse palàm protestata est, peccatores sine bono conversæ mentis, seu castæ in Deum dilectionis motu per Pœnitentiæ

Sacramentum justificari. Non est quæstio de tribus capellis,  
aut de lana caprina. Solo namque servili metu actos peccato-  
res esse marsupia vacua, ac vivificantibus Domini nostri  
Iesu Christi Signaculis perperam insigniri, olim ad sanctum  
Petrum, Ecclesia Alexandrina Patriarcham & Marty-  
rem, istiusmodi Catechumenos ex causis baptizantem, cla-  
mavit à sancto Sophronio, Patriarcha Hierosolymitano, in  
Prato spirituali laudatus Angelus: Quamdiu huc mitti-  
tis marsupia ista, signata quidem, inania autem  
prorsus, vacua, & nihil intus habentia? Et quidem  
hunc, quandoquidem evenire oportuerit, simplicitatis lapsus,  
Viri Adm. Reverendi gaudeo in creditam vobis Ecclesiam  
irruisse. Hæc enim non super arenam, sed super solidissimam  
Evangelicæ Prædicationis & vestri Apostolici Pettoris pe-  
tram ædificata circumferri, non metuit omni vento doctrinæ:  
Nullus motus, nullus fluctus, nullus impetus, nulla infero-  
rum porta speret adversus ipsam prævalere. Hæc est Eccle-  
sia, quæ Francorum olim sub Carolo magno & eius pio Filio  
Ludovico Episcopis, sacras imagines definito per septimam  
Synodum cultu partim spoliantibus, partim cum Claudio  
Taurinensi damnantibus uti idola, & frangentibus, con-  
stantissima restitit, laudatæq; Synodum ac imagines multo-  
rum suorum Clericorum & Monachorum sanguine defen-  
dit. Quæ Philippi primi Burgundiæ Ducis, Principis sui,  
& Philippi secundi Tornacensis sui Episcopi, Pseudo-Cle-  
mentis septimi Fæctionem & Schisma sequentium, maculo-  
sam communionem abiecit intrepida, & proprium sibi Epi-  
scopum, Urbani sexti legitimi Pontificis & Pastoris verba  
audientem, elegit & consecravit. Quæ inter varias fædisi-

marum hæreseon in Flandria procellas semper stetit illæsa,  
 Romanaque communioni ac fidei immota adhæsit. Ab-  
 sit ut talis, quam spiritus unctione doctam lucet, Ecclesia  
 egeat literis foris sonantibus. Quocirca quorundam dum-  
 taxat circumscriptæ simplicitati instruendæ, & sacrosanctæ  
 Tridentinæ Synodo à pravis ipsorum suspicionibus liberandæ  
 couflavi Scriptum hoc ex antiquis Ecclesiæ Patribus, de qui-  
 bus ad neotericos sui temporis Doctores comparatis insigniter  
 scripsit ad Pharitium, Habendonensis Cænobij Abbatem, in  
 literis apud Lucam Dacherium exstantibus, Theobaldus  
 Stampensis: " De nativitate sententiarum hoc solum vobis  
 ,respondeo, quia multò magis gratulor imitari non errabunda  
 ,priorum Doctorem vigilantium vestigia, quam modernorum  
 ,dormitantium sequi falsas opiniones & somnia. Quod enim  
 ,veteres Doctores vix pertingere potuerunt vigilando, hoc  
 ,quoque juniores docere præsumunt dormitando. Vigilantes  
 ,autem Doctores dicuntur, qui sanè referunt quod à sanctis  
 ,Patribus rationabiliter audierunt. Doctores verò dormi-  
 ,tantes appellantur, qui ex parte sua semper aliquid novitatis  
 ,adferre laborant. Vndè Hilarius Piclavienfis ait in libro,  
 ,quem de Trinitate composuit: Optimus quidem Le-  
 ,ctor est qui refert. Sciatis igitur me, non de afferenti-  
 ,bus, sed de referentibus esse; & quamdiu vita comes fuerit,  
 ,in hoc diligenter perseverare." Studium hoc meum boni con-  
 sulere, & comprobare dignemini, Viri Amplissimi &  
 admodum Reverendi, quos Deus opt. max. ad Eccle-  
 siæ tutelam & lumen dudum custodiat. Dabam Lova-  
 nij, Kalendis Junijs, Anno Domini 1666.

Minimus vester in Domino famulus,

FR. CHRISTIANUS LUPUS.



# SUMMA PRIVILEGIJ REGIJ.

**C**Autum est Regiæ Majestatis Privilegio, ne quis intra Novennium citra Viduæ Bernardini Masii voluntatem imprimat, aut alibi impressum in hæc Ditiones invehat Libellum intitulatum, *Dissertatio Dogmatica de germano & avito sensu SS. Patrum, universæ semper Ecclesiæ, ac sacrosanctæ præsertim Tridentinæ Synodi, circa Christianam Contritionem & Attritionem*, per Fr. CHRISTIANUM LUPUM, *Iprensem, Ord. Erem. S. Augustini S. Theol. in Vniversitate Lovaniensi Doct. ac Profess.* Sub pœnis in Originali Diplomate contentis, dato Bruxellæ, die 8. Maij 1666.

& signato

LOVENS.

---

## C E N S U R A

Admodum Reverendi, Amplissimi, atque Eximij Viri,  
*D. Iacobi Pontani S. Theol. Doctoris ac Professoris,*  
*Insignis ad sanctum Petrum Collegiæ Ecclesiæ*  
*Decani, Privilegiorum Academiæ Lovaniensis*  
*Conservatoris Apostolici, nec non Regij*  
*Librorum Censoris, &c.*

**H**Æc *Dissertatio Dogmatica de Christiana Contritione, admodum erudita est, & Scripturis sacris, ac Conciliorum & sanctorum Patrum doctrinæ consona. Quæ utiliter in lucem ibit. Dat. Lovanij die 2. Junij 1666.*

JACOBUS PONTANUS S. Theol. Doctor  
& Professor, ac Librorum Censor.

Admodum Reverendi Patris Prioris Provincialis  
Ordinis Eremit. sancti Augustini.

**D**issertationem hanc dogmaticam de Christiana Contritione & Attritione à Reverendo ac Eximio Patre Magistro Fr. CHRISTIANO LUPO S. Theol. Doctore & Professore, eruditè compositam, publico prælo dignam esse censuimus. Bruxellis apud S. Apolloniam die 15. Maij 1666.

Fr. JOANNES BAPTISTA DE PERNES, Provincia Belgica  
Ord. Eremit. S. Augustini Prior Provincialis.

## C E N S U R A

Reverendi ac Eximij Patris, Ioannis Cryterij, Sacræ Theol.  
Doctoris, Ord. Erem. sancti Augustini.

**D**issertatio hac dogmatica de Christiana Contritione & Attritione Adm. R. & Eximij P. M. CHRISTIANI LUPI Ord. Erem. S. P. N. Aug. sacre Th. Doctoris ac Provinciæ Belgicę Diffinitoris luce publicâ dignissima est, eo quod reiectis hærelibus ac erroribus quorundam sanam Catholicamque tradat *Contritionis* definitionem ex sententia eorum Patrum, qui Tridenti præcedenti sæculo convenerunt; variè ipsius animam dilectione secundum gradus suos dividat & subdividat, ac cuique divisionis membro suas in justificatione hominis & in & extra Sacramenta efficaciz partes distribuat; ac demum quod doceat, quos fructus proferat Timor radix *Attritionis* vulgariter dictæ, & multipliciter dividat, & præclare statuat quid perfectionis & vitij eidem adhareat.

Prodeat igitur tradaturque in manus Theologorum, ut supersedeant ab interjectis controversijs plurimis ac pugnis verborum: exhibeatq; Robustis, quod æmulentur Charisma melius charitatis habentis totius legis adimplenda vires; & nihilominus foveat spem imbecillum, qui necdum tantâ ex alto induti sunt virtute.

Dedi Diesij pridie Nonas Iunias An. Domini M. DC. LXVI.

Fr. JOANNES CRYTERIUS, sacre Theol. Doctor.



DISSERTATIO DOGMATICA  
DE CHRISTIANA  
CONTRITIONE  
ET  
ATTRITIONE.

CAPUT PRIMUM,

Exponitur definitio Contritionis generatim sumpta, tradita per sacrosanctam Synodum Tridentinam: *Contritio est dolor animi, ac detestatio de peccato commisso, cum proposito non peccandi de cætero.*

Sess. 14. c. 4.



Niqui cordis Pœnitentiam & conversionem ad Deum, quam nos Latini passim Contritionem, Græci Metanoiam vocant, Martinus Lutherus aliud non esse vult quam novam vitam, juxta vocem popularum: *Optima Pœnitentia est nova vita.* Sensus suum edicit in sermone de Pœnitentia: *Plus tibi discutiendum confessuro, quantum diligas Iustitiam, quam quantum odias peccatum,*

Error Lutheri de Contritione.

*multoq; maiore, immò solo hoc labore tibi cogitandum est, quomodo futuram vitam agas bonam, quam quomodo odias aut deseras præterita mala. Verissimum est enim proverbium, & omni doctrinâ huc usque de Contritionibus tradita præstantiss: OPTIMA PœNITENTIA EST NOVA VITA.* Et in suorum à Leone decimo Pontifice damnatorum articulorum Apologia scribit in suos adversarios: *Mirum, quid illis acciderit, ut contra omnium sensum & sententiam audeant damnare jam dictam totius mundi pœniam.* Fluctuat tamen, & in omne se versat latus, modò adferens veram Contritionem non esse aliud quàm novam vitam, modò ipsam dumtaxat non posse esse sine nova vita, id est, sine veterem hominem innovante ac reformante charitate. Planè, inquit, *Apostolus docet omnia vana esse, nisi simus nova creatura in Christo: At pœnitentia,*

Art. 7.

sentia, qua sine amore iustitia agitur, vetus adhuc est creatura, non plus valens quam circumcisio aut praputium. Errorem verò resorbet in suarum resolutionum prima conclusione: Non ergo in usu Scriptura Pœnitentia dolor dicitur, sed mutatio mentis & consilij.

Hoc ergo novæ doctrinæ monstrum eversura sacrosancta Tridentina Synodus sancit Contritionem generatim sumptam non tantum cessationem à peccato, & vitæ novæ propositum ac inchoationem, sed veteris etiam odium & detestationem esse, atque ita incipit ejus definitionem: *Contritio est dolor animi.* Loquitur cum Tertulliano in libro de Pœnitentia: *Exomologesis prosterndi & humiliificandi hominis disciplina est, mandat animum macroribus deicere, illa que peccavit tristitia tractatione mutare.* Ejus opus esse dicit *ingeniscescere, lacrymari, magis dies noctesq; ad Dominum Deum suum.* Quod ipsum in moralium sententiarum regulis tradit magnus Basilius ex sacro Apostoli Petri, qui post negatum Dominum statim exivit foras ex atrio Pontificis, & pœnitens flevit amarè. Palmaris item, quam in incæstuoso Corinthio excitare conatus est Paulus Apostolus, Pœnitentiæ pars fuit mentis tristitia, & quidem tanta, ut timuerit idem Apostolus, ne ipsa ille absorberetur. Nihil frequentius ac ferventiùs quam lacrymas & macerem Divina Scriptura peccatoribus inculcat. Apud omnes olim sub cœlo Ecclesias prima Pœnitentium ac Pœnitentiæ classis fuit Fletuum ac dolorosus Fletus. Et hinc in libris de Pœnitentia scribit sanctus Ambrosius: *Qui agit pœnitentiam, diluere lacrymis debet peccatum suum.* Ergo lapsu nostros mundenus fletibus, ut audias nos Dominus noster *ingeniscentes.* Et in literis ad Comitem Bonifacium sanctus Augustinus: *Nisi egeris Pœnitentiam, salvus esse non poteris. Quomodo enim gaudebis te esse correctum, nisi doleas fuisse perversum?* Et insinuat: *Habeant Donatista de praterito detestabili errore, sicut Petrus habuit de mendaci timore, amarum dolorem.* Et Severo Milevitano Episcopo, qui Lutherano dogmati quid in speciem simile inconsideratus scripserat, respondet: *Quasi non sint dolenda qua male gesta sunt, etiamsi quantum possunt postea corrigantur.* Paradoxum & tot verbis indignum est istud Lutheri dogma: Nam & ipsi hodie Lutherani illud abominantur.

Pergit sancta Synodus: *Et detestatio.* Alibi dicit: *Odiù & detestatio peccati.* Rursùm loquitur cum Tertulliano in libro de Pœnitentia: *Pœniteat errorum reperta veritate; pœniteat amasse qua Deus non amat, quando ne nos quidem ipsi servulus nostris ea, quibus offendimus, non odisse permittimus.* Consonat in Regulis brevioribus magnus Basilius: *Primum anima male ante actam vitam suam odisse debet, eiusq; memoriam abhorrere & detestari.* Loqui se adfirmat ex Regio Propheta: *Iniqui-*

Contritio  
debet esse  
dolor.  
Cap. 9.

Reg. I. c. 3.

L. I. c. 5.

Epist. 50.

Epist. 140.  
Et odium  
peccati.  
Sess. 6. c. 6.  
Cap. 4.

Reg. 10.

Reg. 11.

*tatem odio habui, & abominatus sum.* Et in literis ad Rusticum Monachum sanctus Hieronymus: *Nisi oderimus malum, bonum amare non possumus.* Et quidem mali odium & boni amor gaudent correlativorum privilegio, sese mutuo ponunt & tollunt, remittunt & intendunt, atque ita unum præ alio exaltare Martinus Lutherus est frustra conatus.

Epist. 4.

Prosequitur sacrosancta Synodus: *De peccato.* Etenim peccatum est unicum & adæquatum veræ poenitentiae objectum, & actam de boni operis officio poenitentiam esse pessimam rei & nominis prævaricationem, rectè scribit in libro de poenitentia Tertullianus, declamans in Gentiles: *Quam in poenitentia actum irrationabiliter diversentur, vel uno isto satis erit expedire, cum illam etiam in bonis factis suis adhibent. Poenitet fidei, amoris, simplicitatis, patientia, misericordia: Prout quid in ingratiam accidit, semetipsos exsecrantur quia benefecerunt, eamque, maxime poenitentia speciem, qua optimis operibus interrogatur, in corde figunt, meminisse curantes ne quid boni rursùm præstent; contra Poenitentia malorum levius incubant.* Etiam in sequenti capite eleganter ostendit nequaquam de bono, sed de solo malo opere, seu peccato esse poenitendum. Noto interim hæc verba, *Seipsos exsecrantur*: Adfirmat poenitentiam debere esse odium ac detestationem.

Cap. I.

Addit sacrosancta Synodus: *De peccato commisso.* Etiam hic cum Tertulliano loquitur in libro de Pudicitia: *Coniungunt Psychici non competere Etbicis poenitentia denunciationem, quorum delicta obnoxia ei non sunt, ignorantia scilicet imputanda, quam sola natura ream Deo faciat. Porro nec remedia sapere quibus pericula ipsa non sapiant, illic autem constare Poenitentia rationem, ubi conscientia & voluntate delinquitur, ubi & culpa sapiat & gratia; illum lugere, illum volutari, qui sciat & quid omiserit, & quid sit recuperaturus, si poenitentiam Deo immolavit, utique eam magis filius offerenti quam extraneis. Orthodoxos calumniose appellat psychicos seu animales, perperam de error eo taxat dogmate, rectè tamen adseverat de naturalibus seu originalibus, ideoque non voluntariâ actione commissis, sed necessario contagio contractis peccatis non esse veram poenitentiam seu Contritionem. Quod ipsum apud sanctum Augustinum multis eleganter tradit Auctor libri de vera & falsa Poenitentia, aiens originalis peccati contagium dolendum omnino ac detestandum, at dolore qui ex intentata in nosmetipsos & proprium nostrum opus vindicta non procedat, adeoque non spectet ad solius proprii facti detestatricem & destruatricem poenitentiam. In libro de correptione & gratia idem docet etiam ipse sanctus Augustinus. Ex hisce fontibus sacrosancta Tridentina Synodus*

Esse debet  
odium  
peccati  
actualis.  
c. 10.

Cap. 8;

C. 6. 14. 26.

sanxit Contritionem oportere esse dolorem ac detestationem de peccato, non quovis, sed commisso.

Contritio  
debet esse  
propositum  
deinceps  
non pec-  
candi.

Cap. 27.

Baptisma-  
les Renun-  
ciationes  
exponun-  
tur.

Concludit definitionem: *Cum proposito non peccandi de cetero. Loquitur ex auctore Ecclesiarum ritu, quo ipsi sancti Apostoli Baptizandos ac Reconciliandos iusserunt coram electis testibus sollemniter diabolo, ejusque cultui, pompis, & operibus renunciare, ac plenam sub Deo & Christo ejus obedientiam atque subjectionem profiteri. Esse Apostolicum institutum adfirmat disertè in libro de Spiritu sancto magnus Basilii, ac in libro de corona militis Tertullianus. Diaboli cultum & pompas esse idololatriam ac spectacula scribit in prima mystagogica catechesi sanctus Cyrillus Hierosolymæ Episcopus, & addit de operibus: *Opera Sathana sunt cuiusvis generis peccata, quibus te renunciare necesse est, ut cum aliquis fugit tyrannum, arma quoque illius vitare studet. Omne igitur genus peccati sub hoc operum diaboli nomine comprehenditur.* Esse nostram cum Deo confederationem, verba tremenda, horrendæ initiationis leges, pacta jurata, eisq; ejerari Episcoporum etiam vanitates, verba & cantica impudica, omne peccati genus & speciem declamat frequenter S. Joannes Chrysostomus, & pergit in vigesima prima Homilia ad populum Antiochenum: *Sicut servos ementes, ipsos qui venduntur prius interrogamus, an nobis servire velint, ita facit & Christus, quando debet te in servitutem capere. Prius interrogat, an velis illum crudelem tyrannum dimittere: Et ad fœdera suscipit.* In oratione de Christi Domini Baptismo addit sanctus Gregorius Episcopus Nyssenus: *Pactum in traditione mysterij cum Deo homo facit, cum omnem penam, cruciatum, & voluptatem pro illius dilectione se neglecturum esse promittit.* Hæc igitur renuntiatio aliud non est quàm firma promissio, & stipulatorium cum Deo optimo maximo propositum deinceps ex nulla penitus causâ, & in nullo penitus genere peccandi. Porro ipsam non in solo Regenerationis, sed & in Reconciliationis Sacramento fuisse olim adhibitam, lucet ex regula, quam suis Canonicis scripsit sanctus Crodogangus Episcopus Metensis. Ejus, in Baptismo præsertim adhibitæ, causâ cunctos fidelium lapsus novâ & singulari malitiâ augeri adfirmant passim Patres, insigniterque ostendit in libris de laicali institutione Jonas Episcopus Aurelianensis.*

Olim fie-  
bant etiam  
ante Re-  
concilia-  
tionem.  
Cap. 32.

L. I. c. 3.

Etiam Pa-  
tres ad Co-  
tritionem  
requirunt  
dolorē de  
peccatis, &

Hinc item Ecclesiæ Patres passim adseverant utrumq; jam à Tri-  
dentina Synodo laudatum actum omnino requiri ad Contritionem.  
In oratione de sancto Philogonio Patriarcha Antiocheno sanctus  
Joannes Chrysostomus: *Discede, utique per gemitus & fletus, à malo,  
desiste à pravitate, pollicere te posthac ista non commissurum. Ego testificor*  
& fi-

*& fide iubeo fore, ut si quis recedens à pristinis malis, ex animo promissas Deo se nunquam ad illa rediturum, nihil aliud requirat Deum ad excusationem maiorem.* Et in libro de fide & operibus sanctus Augustinus multis probat ad Pœnitentiam requiri veteris exspoliationem seu detestationem, ac novæ vitæ indumentum, seu discessionem à peccatis, quam baptizandi profitentur. Et in Homilijs super Evangelia Gregorius magnus: *Pœnitentiam verè agere est perpetrata mala plangere, & plangenda, saltem promissione & proposito, deinceps non perpetrare.* Quem locum suis de laica institutione libris, & suis ad Henricum Senonensem Archi-Episcopum literis inferuerunt, & insigniter exponunt Jonas Aurelianensis Episcopus, & sanctus Bernardus. Quare eorum, qui de uno dumtaxat è pluribus commissis peccato dolent, fraternalis odium in corde retinent, aut quovis alio ex capite plenum deinceps non peccandi propositum non habent, Pœnitentiam uti falsam meritò damnârunt in quinta & septima sua Romana Synodo Gregorius septimus Pontifex, in Synodis Melphitana, Placentina, & Claromontana Urbanus secundus, & Innocentius secundus in Synodo sua Lateranensi. Et hinc rectè dicit Tridentina Synodus de Contritione: *Voluntatem peccandi excludat.* Et iterùm: *Ac propterea movetur adversùs peccata sua per odium aliquod & detestationem.* Declarat Contritionem esse oportere, non de uno dumtaxat aut altero, sed de cunctis commissis mortalibus peccatis. Dico, *Mortalibus*: Agitur enim hîc de sola illius, quæ Sacramenti Pœnitentiæ est essentialis pars, Contritionis necessaria materia, quam constat esse sola mortalia peccata.

propositum emendationis.  
C.9.11.

Hom.34.

Epist.42.

Sess.14.c.4  
Sess.6.c.6.

Propositum illud esse debet de solis peccatis mortalibus.  
Excludere debet affectum omnis peccati mortalis.  
L.x.c.22.

Porro de mortalium peccatorum detestatione & odio scribit in libris de nuptijs & concupiscentia sanctus Augustinus: *Multum fallitur homo, qui consentiens concupiscentie carnis suæ, & quod illa desiderat decernens facere & statuens, putat sibi esse dicendum, NON EGO OPEROR ILLUD, etiamsi oderit quia consentit. Simul enim est utrumque: Et ipse odit quod malum esse novit, & ipse facit quia facere statuit.* Et tales prævæ suæ voluntatis & operationis olores novimus multos. Verùm ista detestatio, illudque odium nequaquam sufficiunt ad Contritionem. *Multum interest*, inquit in libris de Sermone Domini in monte laudatus Augustinus, *quali Pœnitentia ignoscat Deus.* Eorum, qui statim se peccasse fatentur, & ita sibi succensent ut peccasse se vehementer nollent, & tamen quampiam iniquitatis suæ affectionem retinent, pœnitentiam damnat gravissimè, esse dicens non fidelis Christiani, sed Judæ proditoris. Quod ipsum alij Patres inculcant frequentissimè, atque ex eadem regula requirit etiam Tridentina Synodus, ut germa-



na Contritio peccatum mortale non dumtaxat oderit, sed & excludat omnem ejus affectum.

Non omnis  
peccati  
venialis.

Dico rursus, *affectum peccati mortalis*. Quod enim charitas illa, quæ nobis Christum Dominum ponit in fundamento, ideòque & ad justificationem omninò sufficit, ligna, icenum, stipulas, id est, leviores creaturæ amores & ad venialia peccata affectus sibi compatiatur, manifesta est Apostoli in prioribus ad Corinthios literis doctrina. Quis non solum Catechumenus aut Pœnitens, sed & electus fidelis semetipsum, propriam vitam aut famam, uxorem, filios, possessiones, aut alium quemvis humanum diem adfixiva etiam, quæ sine dolore vitæ frustrari non possit, cupiditate non diligit? Nec perfecta hujus vitæ charitas possit omnem istum, saltem volaticum, ad sensum excludere, adeòque si ea exclusio sit de Contritionis essentia, omnes adhuc sumus in peccatis nostris, nullusque aut certè rarissimus adultus per Regenerationis ac Reconciliationis Sacramenta justificatur. Et hinc in libro de

Cap. IX.

decem chordis declamat S. Augustinus: *Quotidiana peccata non possunt non surrepere in animum propter fragilitatem humanam. Aliud est ubi mutes, aliud ubi toletes vitam. Illa mutanda est, si eras mæchus, noli esse mæchus, &c. A quovis mortali purgandam, in quibusdam venialibus amoribus ac peccatis dicit vitam patienter tolerandam, istudque esse notabile inter ista peccata discrimen. Porro patientia non est sine odio & dolore. Et hinc venialibus istis amoribus omninò debemus istud ipsum, quod involuntarijs libidinum motibus nos debere scri-*

L. I. c. XX.

*bit in libris de nuptijs & concupiscentia idem Augustinus: Ut nec ipsi sint velle debemus, etiamsi in corpore mortis huius id obtinere non possumus. Motus istos debemus detestari, & in illos clamare cum Apostolo: Quod odi illud facio. Quis me liberabit de corpore mortis huius? Et hinc Contritio esse omninò debet etiam de venialibus peccatis & ad illa affectibus dolor, detestatio, odium, sed quod ipsos excludi solummodo optet & exposcat, cunctos non excludat. Item eorundem omnium cavendorum nobis esse nequit efficax propositum, sed desiderium solummodo & votum. Et hinc Græci illis, dum sola subiiciuntur clavibus, non sacramentalem Absolutionem, sed solam admonitionem impendunt: Quod nempe ipsa alijs etiam præter Absolutionem vijs remitti Dominus concesserit, & concepta de illis Contritio ex jam dictis causis quandoque vacillet. Quare nos Latini Sacerdotes, dum ipsa sola nobis aperiuntur, sedulo agimus ut adsit firma Contritio, firmum ipsa deinceps vitandi propositum, plenaque cuncti ad ipsa affectus exclusio: Hæc enim omnia spectant ad Contritionis essentiam, ideòque & ad essentiam Pœnitentialis Sacramenti.*

Græci peccatis venialibus non impendunt absolutionem.

Quomodo sit à Latinis impendenda.



## CAPUT II.

*Exponuntur Contritionis necessitas, & virtutes adnexa.*

**V**Ndecimus Martini Lutheri per Leonem decimum Pontificem damnatus articulus est hic: Nullo modo confidat se absolvi propter tuam Contritionem, sed propter verbum Christi, QUODCUMQUE SOLVERIS. Hoc, inquam, confide, si Sacerdotis obtinueris absolutionem, & crede fortiter te esse absolutum, & absolutus verè eris, quidquid sit de Contritione. Hinc quidam existimant quòd ad obtinendam peccatorum remissionem negàrit Contritionem esse necessariam. Falluntur. Lucet ex articulo duodecimo: Si per impossibile confessus non esses contritus, si tamen credas sese absolutum, verisimè est absolutum. Exponit articulum ipse Lutherus in Apologia: Dixi, Per impossibile. Quia satis suprà dictum est fidem sine Contritione esse non posse, cum gratia non infundatur sine magna concussione animæ. Volui enim fidei virtutem declarare, quoniam sola faciat ad remissionem peccatorum. Quod dico, ne quis me putes Contritionem seu turbationem illam cordis in cogitatione peccatorum suscitata negare. Volo eam, sed dico eam non operari iustificationem seu remissionem peccatorum. Fides enim seu Verbum Dei iustificat & purgat. Ecce in iustificationis opere necessitatem Contritionis nequaquam negat, sed solam causalitatem, hanc plenè adtribuens soli fidei, quæ Divinæ, per hæc verba, Quodcumque solveris, factæ promissioni fidis, & ejus vigore credis te absolutum. Hæc & Leonis Pontificis diploma arguit, quod doceat super arenam adificare, & abiecta fide, super Contritionem, opus hominū, plusquam super Dei Verbum confidere. Adstipulatur in Institutionum libris etiam Joannes Calvinus: Dicimus & nos quodam loco cum penitentia obvenire remissionem peccatorum, sed simul addidimus penitentiam non esse causam remissionis peccatorum.

Error Martini Lutheri.

Et Joannis Calvini. L. 3. c. 4.

Sess. 14 c. 4. Amborum errorum Synodus damnat.

Contritio est causa justificationis. c. 6.

Adversum ambos Errones edixit sacrosancta Synodus Tridentina: Fuit quovis tempore ad impetrandam veniam peccatorum hic Contritionis motus necessarius. Definìt non quovis modo, sed ad impetrandam, utiq; in congruè meritorij ac disponentis principij genere, peccatorum veniam semper fuisse necessariam, idèd; ejus non solam necessitatem, sed & causalitatem spectare ad immobile dogma Christianum. Ejus dignitatem ac meritoriam causalitatem exponit elegàter in libro de Penitentia Tertulianus: Quàm ineptum, quàm iniquum, penitentiam non adimplere, & veniam delictorum suscinere? Hoc est, pretium non exhibere, & ad mercem manum emittere. Hoc enim pretio Dominus veniam addicere iustificatur, hæc penitentia compensatione redimendam proponit impunitatem. Si

ergo

ergo qui venditant, prius nummum, quo paciscuntur, examinant, ne scalp-  
tu, neve rasi, ne adulter, etiam Dominum credimus Pœnitentia probatio-  
nem prius intrare, tantam nobis mercedem, perennis scilicet vita, concessurum.  
Nequaquam de Pœnitentium satisfactione agit, sed de Catechume-  
norum Contritione. Quod ipsum in libro de Æthiopis Baptismo  
tradit sanctus Fulgentius, aicens ad peccatorum veniam requiri &  
Contritionem & Baptisma, & hoc illius esse mercedem: Ideo quisque  
dignus Baptismo iudicatur, quando precedit fidei confessionisq; meritum, cui  
tamquam in mercedem sancti Baptismatis debeat tribui Sacramentum. Et  
iterum: Quia ille Iustitia, qui credulitatis & confessionis persolvit officium,  
non consequeretur sancta Regenerationis effectum? Quæ omnia adeò clara  
sunt, ut in libro de duabus animabus scribat sanctus Augustinus: Vox  
est ista natura, nullum stultum rei huius notitia deseruit. Hoc nobis etiam  
nisi penitus insitum esset, periremus. Potest aliquis dicere se non peccare,  
non autem sibi esse, si peccaverit, penitendum, nulla barbaries dicere audebit.

Cap. 5.

Cap. 14.

Contritio  
debet pro-  
cedere ex  
fide,  
Sect. 6. c. 6.

Porro Contritioni huic, ut ad peccatorum remissionem præparet,  
sacro sancta Synodus mandat adesse varias virtutes. Prima est concepta  
ex auditu fides, quâ credamus vera esse quæ Divinitus revelata sunt &  
promissa, atque illud in primis, à Deo iustificari impium per gratiam eius,  
per redemptionem quæ est in Christo Iesu. Licet istic de sola Catechu-  
menorum Contritione loquatur, eandem tamen fidem in Pœniten-  
tibus palam supponit. Loquitur adversus Martinum Lutherum,  
blaterantem à nobis abijci fidem ac Dei verbum, confidi in humano  
Contritionis opere, idèdque super arenam ædificari. Ait fidem esse  
primum Contritionis exordium & imum fundamentum, proinde quæ  
nec istam à nobis abijci, nec hanc esse arenam humani operis, sed cor-  
dibus nostris per Jesum Christum à Deo infixam petram solidissimè  
charitatis.

Et habere  
adjunctam  
spem,  
Sect. 6. c. 6.

Altera Contritionis comes debet esse spes veniæ, & Divinæ mi-  
sericordiæ fiducia, quâ fidamus Deum propter Christum fore nobis pro-  
pitium. Loquitur Synodus ex prima ad Corinthios Epistola, ubi  
Apostolus linguarum, Prophetiæ, virtutum, aliorumque id genus  
charismatum gratias gratis datas adseverat esse dumtaxat usque ad  
firmè plantatam ac radicatam Ecclesiam temporales, idèdque suo  
tempore cessaturas, at verò fidem, spem, charitatem esse excellentio-  
rem, perpetuam, & immobilem totius Ecclesiæ viam, quæ semper  
maneant, & sine quibus nec acquiri valeat Justitia aut peccatorum  
remissio, nec conservari. Et hinc ad impetrandam peccatorum ve-  
niam, non solam pœnitentiam requirit in libro de fide & operibus  
sanctus Augustinus, sed & illam de Divina bonitate fiduciam, quâ

Cap. 20.

omnium omnino præteritorum remissionem in Baptismo non dubites te acceperum. Ejus absentia fratricidæ Cain & Judæ proditoris Pœnitentiam demutavit in intolerabilem conscientieæ torturam, & laqueum temporalis ac sempiternæ damnationis. Hinc Fletui, primo Pœnitentiæ gradui, solennem deprecationem veniæ, firma quæ in Deum & Ecclesiam spei professionem primitivus Patrum Canon meritò adjunxit.

Tertia Contritionis comes debet esse votum præstandi reliqua, quæ ad rite suscipiendum Pœnitentiæ seu etiam Baptismatis Sacramentum requiruntur. Utrique dum & Catechumeni & Pœnitentes proponunt inchoare vitam novam, & servare Divina mandata. Loquitur Synodus ex sancti Matthæi Evangelio, ubi Dominus mandat Apostolis, ut baptizandos doceant omnia sua Præcepta. Et hinc quod antiqua baptizandorum professio non solum hæc, *Renuncio Diabolo, omnibusq; eius pompis & operibus*, sed & hæc contineret verba, *Et coniungor Christo*, testatur in pluribus locis sanctus Joannes Chrysostomus. Omnem Christi legem plenè servandam solenni pacto ac stipulatione spondebant. Et hinc quædam Ecclesiæ, professionem istam non plenè exigentes, de Sancto canibus dato & grandi Apostolicæ disciplinæ neglectu culpant graviter & meritò in libro de fide & operibus sanctus Augustinus. Ex eodem principio Contritionem passim appellat conversionem cordis, quod nempe per ipsam mens nostra à creaturæ dilectione transferri debeat, non solum ad peccati dolorem, odium, detestationem, & melioris vitæ desiderium, sed etiam ad puram Dei charitatem, & firmam de eius mandatis exequendis contestationem & votum, de quo scribit in literis ad sanctum Paulinum: *Nostri votum maximum est, quo nos vivimus in Christo esse mansuros.*

Quarta tandem Contritionis comes esse debet firma voluntas & ardens desiderium suscipiendi Baptismatis aut Reconciliationis, de quo sacrosancta Synodus: Catechumeni *proponunt suscipere Baptismum*. Et lapsorum Pœnitentia continet non modò cessationem à peccatis, & eorum detestationem, aut cor constitutum & humiliatum, verum etiam eorundem sacramentalem Confessionem, saltem in voto, & suo tempore faciendam, & Sacerdotalem Absolutionem. Loquitur ex sancti Augustini ad Vitalem Carthaginensem Epistola, laudante Ecclesiam, orantem solenniter pro Catechumenis, ut eorum Regenerationis desiderium, atque ita inchoatæ Contritionis plenitudinem inspiret. Et in libris de Baptismo adversum Donatistas scribit idem Augustinus: *Baptismus potest inesse ubi conversio cordis defuerit; conversio autem cordis potest inesse non percepto Baptismo, sed contempto non potest.* Neque enim ulla

Et votum  
Sacramenti.

Tertia Contritionis comes debet esse propositi servandi omnia Dei mandata.

Ep. 99. q. 5.

Quarta comes est desiderium Sacramenti. Sess. 6. c. 6. Sess. 14. c. 4.

Epist. 107.

L. 4. c. 35.

*modo dicenda est conversio cordis ad Deum, cum Dei Sacramentum contemnitur, id est, negligitur, ac non desideratur. Et ad Regij Prophetæ verbum, Quemadmodum desideras cervus ad fontes aquarum, scribit in explanationibus Psalmorum: Non male intelligitur vox esse eorum, qui cum sint Catechumeni, ad gratiam sancti lavacri festinant. Unde & solenniter, utique in Sabbatho sancto ad regenerantis fontis consecrationem, cantatur hic Psalmus, ut ita desiderens remissionem peccatorum, quemadmodum desideras cervus ad fontes aquarum. Hocce desiderium adeò necessarium semper judicavit Ecclesia, ut supremam Catechumenorum classem ex Apostolico instituto vocârit Competentes, id est, unum aliquid simul petentes, de quo laudatus Augustinus in Sermonibus de diversis: Quid est illud unum, quod petunt vel concupiscunt? Baptismi Sacramenta: Ut qui erant vasa Diaboli, mereantur esse vasa Christi. Patem semper de Reconciliationis Sacramento fuisse rationem, lucet ex sancto Cypriano, multis in locis adseverante ipsum nulli lapsorum posse impendi, nisi qui ejus dispensatricem & custodem Ecclesiam serventer ac frequenter pulsasset. Rationem dant in libro de Baptismo Tertullianus, & in laudatis de eodem Sacramento libris laudatus Augustinus, adferentes Regenerationis, adeòque & Reconciliationis Sacramenta ex Christi Domini instituto esse fidei & Contritionis vestem, subsidiarium auxilium, & necessariam nostræ justificationis concavsam, adeòque sine ejus saltem voto & desiderio nullum posse esse Contritioni effectum, nullam veram Contritionem.*

## CAPUT III.

*Exponitur Contritionis actus fundamentalis, de quo sacrosancta Tridentina Synodus: Deum tanquam omnis iustitia fontem diligere incipiunt, &c.*

Omnis Contritio essentialiter est Dei dilectio.  
Sess. 14. c. 4

**O**Mnem veram, licet imperfectam, quæ passim Attritio dicitur, Contritionem esse essentialiter puram Dei charitatem, lucidè edicunt verba ista. Et licet de sola Catechumenorum contritione loquantur, eamdem tamen esse de Pœnitentium Contritione rationem, lucet ex ejusdem Synodi de ipsa verbis: *Continet cessationem à peccatu, & eorum detestationem. Utique detestationem ortam ex iustitiæ dilectione. Item ex hisce verbis: Quamvis sine Sacramento Pœnitentia per se ad justificationem perducere peccatorem nequeat, tamen eum ad Dei gratiam in Sacramento Pœnitentia impetrandam disponit. Utique proxime & sufficienter. At verò proximam, & licet non nisi cum Sacramento sufficientem istiusmodi dispositionem debere esse charitatem* definit

definit alibi eadem Synodus: Si quis dixerit sine praeveniente Spiritus sancti inspiratione, atque eius adiutorio hominem credere, sperare, diligere aut poenitere posse sicut oportet, ut ei iustificationis gratia conferatur, anathema sit. Voces, Sicut oportet, desumptæ sunt ex sancti Augustini Enchyridio: Omnium Præcepti finis est charitas, id est, ad charitatem refertur omne Præceptum. Quod verò ita sit vel timore pœnæ, vel aliquâ intentione carnali, ut non referatur ad illam charitatem, quam diffundit Spiritus sanctus in cordibus nostris, nondum sit quemadmodum fieri oportet, quamvis fieri videatur. Eundem in sensum exponit easdem voces in libro adversus sermonem Arianorum. Quocirca quemadmodum oportet poenitere est ex fide & charitate peccatum odisse ac detestari, quod quicumque necdum fecerit, justificationis gratia necdum est dignus. Dicit namque sanctus Joannes Apostolus: *Qui non diligit, manet in morte.*

Sess. 6.

Can. 3.

Cap. 121.

Cap. 25.

Probatur  
ex Scrip-  
turis.Et quia  
omnis Dei  
lex est de  
charitate.

Contritionem omnem esse essentialiter Dei dilectionem clamant Scripturæ omnes Canonice, omnes Ecclesiæ Patres, omnes Synodi, quorum omnium cuncta testimonia si velim adducere, oportebit grandia volumina complere. Et in re lucida piget & memetipsum & Lectorem quasi frustra fatigari. Nonne Propheta dicit voculam, Dilige, esse breve verbum, in quo omnem legis suæ amplitudinem Deus conclusit? Hinc frequentissimè edicit Augustinus: *Dilige, & fac quod vis.* Eandem fuisse sancti Joannis Apostoli assiduam atque extremam vocem adfirmat sanctus Hieronymus in commentarijs Epistolæ ad Galathas. Et ipse Dominus dicit: *Qui non diligit, Sermones meos non servat.* Dei & proximi dilectionem ait esse unicum suum Præceptum, unicum suæ prædicationis & passionis finem & fructum, unicum suarum ovium ab hædis discrimen, & in illo omnem pendere Legem ac Prophetas. Et Apostolus Paulus: *Plenitudo legis est dilectio. Qui diligit, legem implevit. Non accepisti spiritum servitutis iterum in timore, sed accepisti spiritum adoptionis filiorum, in quo clamanus, ABBA, PATER.* Quæ plurima istiusmodi loca considerans Tertullianus scribit in libro de Patientia: *Dilectio summum fidei Sacramentum, Christiani nominis thesaurus, quem Apostolus totis viribus sancti Spiritus commendat.* Sine hac nullam impleri legem, nullum servari Domini mandatum, nullum mentis nostræ opus aut motum esse quemadmodum oportet bonum clamat assidue sanctus Augustinus. Cum Apostolo adfirmat antiqui & novi Testamenti palmare discrimen esse timorem & amorem, idèdque cunctos, qui Deum adhuc uti Dominum dumtaxat metuunt, & non uti Patrem castè diligunt, etiamnum errare & hære in veteri Testamento, ac esse carnales minarum servos, à Divinæ,

Cap. 12:



quæ solâ dilectione acquiritur, adoptionis & filiationis, seu Christianæ justificationis gratiâ multum alienos. Et hinc Dominicam, *Pater noster*, quam laudata Apostoli verba, *Abba, Pater*, omnino respiciunt, orationem non fuisse in veteri Testamento, & à solis Deum castè diligentibus posse veraciter dici, frequenter leges apud sanctum Joannem Chrysostomum. Proinde & per timorem solum citra charitatem de peccatis concepta Contritio est Contritionis fucus, non est quemadmodum oportet, Evangelicæ Pœnitentiæ legem non adimplet, est dolor servilis & judæicus, non filialis & Christianus.

Probarur  
ex Baptis-  
mali pro-  
fessione.

Psal. 77.

Psal. 33.

Psal. 77.

Tract. 19.

Ser. 60. c. 1.

Quod Baptismatis effectum sine casta Dei dilectione non posse accipi docuerint constanter Apostoli, lucet ex Baptismalibus per ipsos institutis professionibus, per quas omnis baptizandus solenniter profiteri debet se credere, non tantummodò Deum aut Deo, sed etiam in Deum, Patrem, Filium, & Spiritum sanctum. Professionem istam frequenter laudat & exponit S. Augustinus: *Credere in Deum plus est quàm credere Deo, Nam & homini cuilibet plerumq; credendum est, quamvis in eum non sit credendum. Hoc est ergo credere in Deum, credendo adhaerere ad bene operandum operanti Deo, QUIA, SINE ME, inquit, NIHIL POTESTIS FACERE.* Et iterum: *Omnes qui credunt in Christum, sic credunt ut diligant. Hoc est enim credere in Christum, diligere Christum, non quomodo daemones credebant, sed non diligebant, & idè, quamvis crederent, dicebant, QUID NOBIS ET TIBI, FILI DEI.* Hinc etiam scribit de carnali Judæorum populo: *Credidit Deo, sed non credidit in Deum.* Et in tractatibus super sancti Joannis Evangelium: *Dei opus est ut credatis in eum, quem Deus misit. Ut credatis in eum, non ut credatis ei. Sed si creditis in eum, creditis ei, non autem continuò qui credit ei, credit in eum. Nam & daemones credebant ei, & non credebant in eum.* Rursus etiam de Apostolu ipsius possumus dicere, *Credimus Paulo, sed non credimus in Paulum: Credimus Petro, sed non credimus in Petrum.* Quid est ergo credere in eum? Credendo amare, credendo diligere, credendo in eum ire, & eius membris incorporari. Ipsa est fides, quam de nobis exigit Deus, & non invenit quod exigit, nisi donaverit quod inveniat. Non qualiscumque fides, sed quæ per dilectionem operatur. Et in Sermonibus de Verbis Domini: *Multum interest, utrum quis credat ipsum esse Christum, & utrum credat in Christum. Nam ipsum esse Christum & daemones crediderunt, nec tamen in Christum crediderunt. Ille enim credit in Christum, qui & sperat in Christum, & diligit Christum. Nam si fidem habet sine spe ac sine dilectione, Christum esse credit, non in Christum credit. Qui ergo in Christum credit, credendo in Christum venit in Christum, & quodam modo unitur in eum, & membrum in eius corpore efficitur. Quod fieri non potest, nisi & spes*



& spes accedat & caritas. Ex quibus lucidè vides eos, qui Baptizandis sine Dei dilectione promittunt remissionem peccatorum, longissimè abire à doctrina Patrum atque Apostolorum, qui suo à cunctis Catechumenis ante Baptismum reddendo Symbolo dedere hoc caput: *Credo in Deum Patrem omnipotentem.* Eadem est ratio Contritionis ad Reconciliationis Sacramentum requisitæ: Quod enim etiam hoc præcedere olim consuevit similis fidei professio, nobis suprà dixit sanctus Episcopus Crodogangus.

Quod ipsum lucidissimè patet ex natura istius Sacramenti, ex natura præsertim sacramentalis confessionis & absolutionis, quam præfiguravit Dominus, dum suâ virtute suscitatum è mortuis Lazarum Discipulis tradidit à cadaverinis institis & ligamentis solvendum. Confessionem à solo jam per Deum vivificato ac suscitato peccatore fieri posse tradit sanctus Augustinus in Sermonibus de Verbis Domini: *Quare iam confiteri in accusatione peccati tui, nisi quia ex mortuo vivum factus? Scriptura quippe ait: A MORTUO, QUASI QUI NON SIT PERIT CONFESSIO.* Si perit à mortuo confessio, qui confitetur, vivit. Et si peccatum confitetur, utique à morte revixit. Si peccati confessione revixit à morte, quis eum suscitavit? Spiritu mortuum quis suscitavit, nisi qui remoto lapide clamavit, LAZARE VENI FORAS? Quid est autem foras prodire, nisi quod occultum erat foras prodire? Qui confitetur, foras prodit. Foras prodire non posset, nisi resuscitatus esset. Et in explicatione Psal. morum: Dominus Lazarum voce de sepulchro suscitavit, ipse clamando animam reddidit, ipse terrenam molem terreno sepulchro impositam vicit, & processit ille vincit. Fit hoc in corde Pœnitenti. Cùm audis hominem pœnitere peccatorum suorum, iam revixit: Cùm audis hominem confitendo proferre conscientiam, iam de sepulchro educit, sed nondum solutus est. Et in alio de Domini Verbis Sermone: Vide genus resurrectionis. Processit Lazarus de monumento vivus, & ambulare non poterat. Et Dominus ad Discipulos: SOLVITE EUM, ET SINITE ABIRE. Ille suscitavit mortuum, illi solverunt ligatum. Pergit de quibusque Pœnitentibus: Resurrexerunt iam isti. Revixerunt quibus displicet quod fuerunt. Sed reviviscences ambulare non possunt. Hac sunt vincula ipsius reatus. Opus est ergo ut qui revixit solvatur, ut abire permittatur. Hoc officium Discipulis dedit, quibus ait, QUAE SOLVERITIS IN TERRA, SOLUTA ERUNT IN COELO. Quæ est frequentissima & constantissima sancti Augustini doctrina. Eandem in literis ad Franconem Tungrensem Episcopum sequitur Nicolaus primus Pontifex: *Postquam vivificante gratiâ te foras vivificatum per confessionem exeuntem adspicimus, quem in sterfus labe mortuum putabamus, incomparabiliter exultamus.* Et in li-

Et ex natura Sacramenti Pœnitentiæ.

Ser. 8. c. 1.

Psal. 101.

Ser. 44 c. 6.

Epist. 43.

Epist. 65.

L. 3. c. 28.

L. 1. c. 6.

L. 21. c. 9.

L. 1. c. 16.

Epist. 228.

L. 2. c. 7.

C. 143. 144

Psal. 54.

Cap. 8.

teris ad Lotharingæ Episcopos : *VValdrada*, Lotharij secundi Regis pellex, merito inter mortuos reputata est, quæ nimirum neque ut viva vocem prædicantium audit, neque in suis penetralibus occultata, immò iam særda iacens, per confessionem foras egreditur. Apud Baldricum Noviomensem Episcopum in Ecclesiæ Cameracensis historia exstat eruditissima Epistola, quâ Gerardus Cameracensis Episcopus scribit ad Archidiaconos Ecclesiæ Leodiensis: *Tunc vera est absolutio Præsentis, cum interni arbitrium sequitur Iudicis. Quod bene quatrduani mortui resuscitatio illa significat, quæ videlicet monstrat, quia prius mortuum Dominus vocavit & vivificavit, dicens, LAZARE VENI FORAS, & postmodum qui vivus egressus fuerat, à Discipulo est solutus. Illum porro Discipuli viventem solvunt, quem Magister resuscitavit mortuum. Si enim Discipuli Lazarum mortuum solverent, factorem magis ostenderent quam virtutem. Ex qua consideratione intuendum est, quod illos nos debemus per pastoralis auctoritatem solvere, quos Auctorem nostrum cognoscimus per resuscitantem gratiam vivificare. Quò contrà considerandum est nostro non posse arbitrio solvi, quos internus arbiter nullo spiritu satisfactionis animavit. De verbo ad verbum hæc desumpsit ex undecima sancti Eligij Noviomensis seu Tornacensis Episcopi ad Pœnitentes homilia, quæ & ipse Eligius adfirmat se à sancto Gregorio magno mutatum. Quoad substantiam exstant apud Gregorium in morali expositione Prophetæ Job, de verbo autem ad verbum in sancti Patrij Collectaneis super Evangelium sancti Joannis. Eodem exemplo & doctrinâ utuntur in libris de Lotharij Regis divortio etiam Hincmarus Metropolitæ Remensis, & in literis ad Gouherium Bonæ Spei Presbyterum sanctus Ivo Episcopus Carnutensis. Hanc à solo Domino resuscitati, & per Apostolos soluti Lazari allegoriam esse etiam sancti Ambrosij in libris de Pœnitentia, ab omni semper Ecclesia fuisse probatam, ideòque hæreticas Joannis Wicleffi nugas etiam ab ipsa efficaciter expugnari, insigniter & amplè ostendit in opere de Sacramentis Thomas Waldensis. At verò vitam illam, quam non Discipuli per Ecclesiæ claves, sed secreto suæ Majestatis opere solus in Pœnitentibus operatur Deus, esse castam Divinæ Justitiæ dilectionem, natamque inde peccati detestationem & odium, tradit in Psalmorum Commentarijs sanctus Augustinus: *Vita nostra dilectio est. Adfidua & nimium manifesta est hæc ejus doctrina, desumpta ex sancto Joanne Apostolo: Qui non diligit, manet in morte. Qui ergo diligit, jam vivere cæpit. In tractatu de utilitate jejunii dicit id esse adeò lucidum, ut etiam diabolus sciat & sentiat vitam nostram esse charitatem. Hanc doctrinam non penetravit auctor**

aut confessor horum, à Pio quinto Pontifice iustissime proscriptorum, articulorum: *In peccato sunt duo, actus & reatus. Transiente autem actu, nihil manet nisi reatus, sive obligatio ad poenam. Unde in Sacramento Baptismi aut Sacerdotis absolutione proprie reatus peccati duntaxat tollitur, & Ministerium Sacerdotum solum liberat à reatu. Peccator Pœnitens non vivificatur ministerio Sacerdotis absolventis, sed à solo Deo, qui Pœnitentiam suggerens & inspirans vivificat eum & resuscitat, ministerio autem Sacerdotum solum reatus tollitur.* Vera animæ nostræ vita est illi & per actualem charitatem, & per habituales gratias unitus Deus: Habitualis gratia, quia non à solis poenæ, sed etiam à culpæ reatibus liberat, plenamque confert remissionem peccatorum, est unio, inhabitatio, & vita principalior, atque ita peccator, quod illa per Sacramentum diffundatur in nostris cordibus, nequaquam vivificatur à solo Deo, sed etiam à ministerio Sacerdotum. Solus sine adiumento in ministeriale adiutorium Sacramento Deus solam actualem suæ dilectionis & contriti cordis vitam peccatoribus inspirat, recipiendæ jam laudatæ habituali vitæ dispositionem penitus necessariam: Atque ita lucet sine hac ad istam nemini patere ingressum.

Eandem veritatem palam prædicat sacrosancta Tridentina Synodus, definiens Contritionem esse dolorem, odium, & detestationem de peccato commisso. Esse debet non de incurso peccati supplicio aut ejus reatu, sed de ipso peccato, adedque Dei ac Justitiæ dilectio. Etenim odium infamiæ ex dilectione famæ, morbi odium ex sapientis dilectione, odium captivitatis aut servitutis ex dilectione libertatis, & generatim quodvis cujusvis mali odium nascitur ex dilectione apppositi boni. At verò bonum commisso peccato directe adversum est Divina Justitia, seu animam nostram suâ inhabitatione iustificans Deus, adedque iniquitatis detestatio & odium nasci non possunt, nisi ex ipsius casto amore. Et hinc ad nescio quem Anastasium scribit beatus Augustinus: *Inimicus Justitiæ est qui poenâ timore non peccat, amicus autem erit, si eius amore non peccet. Tunc enim verè timebis peccare. Nam qui gebennas metuit, non peccare metuit, sed ardere. Ille autem peccare metuit, qui peccatum ipsum sicut gebennas odit.* Est Regis Prophetæ Philosophia: *Iniquitatem odio habui, & abominatus sum, legem autem tuam dilexi.* Pergit Augustinus: *Tantum peccatum odit, quantum Justitiam diligit.* Et in libris de Dei civitate scribit: *Quod quis sine illicente amore non habuit, sine urente dolore non perdit. Ex eius amissione tantum necesse est ut urat dolor, quantum baserat amor.* Et de fidelibus Romanis, qui in Gothica urbis deprædatione amiserant sua omnia, ait in alio ejusdem operis libro: *Quantum hac amando peccaverint, perdendo sen-*

Probat  
rursus ex  
Tridentino  
Cœcilio.

Epist. 144.

L. 21. c. 16.

L. 1. c. 10.  
sen-

*senferunt. Tantùm quippe doluerunt, quantùm se doloribus inferuerunt. Loquitur ex Apostolo: Omnium malorum radix est cupiditas, quam quidam appetentes inferuerunt se doloribus multis. Dolor & odium sunt proprius, parenti inseparabiliter nexus, & adæquatè semper commensuratus, dilectionis foetus, ideòque commissæ iniquitatis dolorem, detestationem, & odium ex Iustitiæ dilectione & nasci oportet, & ejusdem cum ipsa esse modi, ponderis, mensuræ. Adeò fundata est definitio Tridentina. Quod sola Dei dilectio Domini Discipulos & filios à mundi seu diaboli discipulis ac filijs discernat, quod sola ab hædorum sinistra ad ovium dextram transferat, quod sola nobis Sacramenta prodesse faciat, atque ita illam esse palmarum & fundamentalem Contritionis & pœnitentiæ actum, incessanter Augustinus, Patres omnes, ac res ipsa clamant; verùm in re lucida nolim ego Lectorem pluribus fatigare.*

## CAPUT IV.

*Sacræ Synodi verba, Deum tamquam omnis Iustitiæ fontem diligere incipiunt, largiùs exponuntur.*

Epist. 121.  
221.

Deus est  
suprema  
Iustitia.

**O**Mnibus fidelibus, immò omnibus hominibus nihil magis in voto est quàm Deum optimum maximum, licet non intueri, saltem apprehendere, & nihil nobis est magis impossibile. Hanc infirmitatem adiuturus S. Augustinus, nescio cui fratri Consensio suadet priùs concipere Iustitiā, & ad ejus tunc speciem seu similitudinem concipere Deum. At ecce hinc novus error. Mibi, respondet ille, *qui subtilitatem disputationis tepido percipere corde vix possum, videbatur nihil vivum secundùm substantiam inesse Iustitiæ, ideòq; non possum adhuc Deum, id est, viventem naturam, Iustitiā similem cogitare, quia Iustitia non in se, sed in nobis vivit, nisi fortè non huius humane æquitatis, sed illa, quæ Deus est, sola asseratur esse Iustitia.* Existimavit Iustitiam non esse vivam atque incommutabilem substantiam, sed inhærens nobis accidens & mobilem qualitatem, ideòq; illi cum Deo nihil esse similitudinis aut paritatis. Reposuit verò S. Augustinus aliam esse participatam & cuivis homini propriam, aliam supremam & omni homini communem Iustitiā, cujus æquali aut inæquali participatione æqualiter aut inæqualiter iusti aut iusta sint iusti omnes & iusta omnia: Eam esse incommutabilem, ac mente nostrâ longè superiorem omnium iustorum regulam, de qua nemo possit, & secundùm quam omnes debeant judicare. *Est planè, inquit, ille summus Deus vera Iustitia, vel ille verus Deus summa Iustitia, quam profectò esurire & sitire, ea est nostra*

*in hac peregrinatione iustitia, & quâ postea saturari, ea nostra est in aternitate plena iustitia. Esse dicit & vitâ quandam, quæ essentialiter vivat, & sui participatione vivere faciat viva omnia, quæ sit omnis vitæ fons, & vita vitarum. Dari item quandam supremam, substantialem, atque incommutabilem bonitatem, pietatem, veritatem, temperantiam, castitatem, sanctitatem, pulchritudinem, cujus participatione & dono sint bona, pia, vera, temperantia, casta, sancta, pulchra, quæcumque sunt talia, & de quibus nemo iudicet, sed secundum quas iudicari oporteat de istis omnibus, est sublimis & constans sancti Augustini Theologia. Eam non intellexerunt etiam Sophistæ illi, qui apud Matthæum Parisiensem docuerunt multas ab æterno fuisse veritates, quæ non sunt Deus. Propositionum, quas Dialectici vocant æternæ veritatis, multitudo dedit ansam errori. Rectè verò reposuerunt synodaliter adunati Episcopi: Hunc errorem prohibemus, & assertores eius ac defensores excommunicamus. Firmiter enim credimus & adserimus, quod una sola veritas fuit ab æterno, quæ Deus est, & nulla quæ non sit Deus. Ea est incommutabilis ac suprema veritas, quæ omnes laudatas propositiones sui participatione facit ab æterno veras.*

Deus est  
suprema  
vita, &  
omnis vir-  
tus.

Et supre-  
ma veritas  
A. 1243.

Omittere nolumus quædam sancti Augustini verba in libro de vera Religione: *Quarendum est cur nos offendat, si duabus fenestris non super invicem, sed iuxta invicem locatis, una earum maior minorve sit, cum æquales esse poterint, si verò super invicem fuerint, ambagè, de medio quamvis impares, non ita offendat ista inæqualitas, & cur non multum curemus, quando sit una earum aut maior aut minor, quia duæ sunt. In tribus autem sensus videtur expetere, ut aut impares non sint, aut inter maximam & minimam ita sit media, ut tamen præcedat minorem, quando à maiore præceditur. Plures adducit ædificiorum ac fabricarum figuras & proportionem, quarum congruitate aut incongruitate ipse statim sensus delectatur aut offenditur, iudicatque rectas esse aut vitiosas. Judicari id dicit ex quadam suprema supra omnem intellectualem creaturam lucente regulâ & arte, de qua concludit: Ambigendum non est incommutabilem naturam, quæ supra rationalem animam sit, Deum esse, & ibi esse primam vitam, & primam essentiam, ubi est prima sapientia. Nam hæc est illa incommutabilis veritas, quæ lex omnium artium rectè dicitur, & ars omnipotentis artificis. Hanc artem, hanc veritatem, hanc iustitiam, hanc castitatem, hanc quamvis regulam adeò nulla humana iniquitas aut machina possit evertere, ut etiam grandes in propriis oculis Theologi, dum quidquam adversum illas conantur facere probabile, revincantur à simplicibus rusticis & imperitis cerdonibus, utique per lumen istud, de quo scriptum est: Signatum est super nos*

Cap. 50.

Cap. 31.

Quid sit  
diligere  
Deum ut  
omnis ju-  
stitiæ fon-  
tem.

Epist. I. c. I.

Ea est vera  
Dei dilec-  
tio.

L. 2 c. 9.

L. 8. c. 10.

Cap. 3.

Sufficit &  
requiritur  
ad imple-  
dam Dei  
legem.

Sufficit, li-  
cet non sit  
expres-  
sa.

Tomo 2.

Epist. I.

*lumen vultus tui, Domine.* Quocirca Deum optimum maximum tam-  
quam omnis justitiæ fontem diligere est lumine isto auctari, supremâ  
justitiæ & bonorum operum regulâ delectari, amplecti & sequendam  
decernere, omniâque adversus illam facta à nobis flagitia seu facino-  
ra odisse & detestari. Hoc, inquam, est Deum Patrem diligere, ejus-  
que cum Spiritu sancto Divinum Verbum, de quo ad Corinthios  
scribit Apostolus: *Qui factus est nobis sapientia à Deo, & iustitia, &*  
*sanctificatio, & redemptio.*

Hanc esse veram & germanam Dei dilectionem tradit frequentissi-  
mè laudatus Augustinus. In libris ad sanctum Pontificem Bonifa-  
cium: *Quid est boni cupiditas, nisi charitas!* Et in libris de sanctissima  
Trinitate: *Quid est dilectio vel charitas, quam tantopere Scriptura com-  
mendat, nisi boni amor?* utique non boni Angeli, boni hominis, bonæ  
animæ, aut cujusvis alterius privati, sed generalis & supremi boni, de  
quo pergit: *Amandus est Deus, non hoc vel illud bonum, sed ipsum bonum.*  
*Quarendum enim bonum anima, non cui supervolet iudicando, sed cui bareat*  
*amando. Et quid hoc nisi Deus? Non bonus animus, non bonus Angelus, aut*  
*bonum calum, sed bonum bonum.* Hoc est, ipsum supremum & incommu-  
tabile bonum, fontem omnis boni & bonitatis. Hunc amorem alibi  
vocat dilectionem & suavitatem justitiæ, bonam voluntatem, amo-  
rem honesti, dilectionem gratis amplectendæ pulchritudinis, veri  
concupiscentiam, amplexum castitatis. Omnia sunt ejusdem rei varia  
dumtaxat nomina: Sunt vera & casta Dei dilectio, at secundum aliud  
& aliud ejus attributum seu perfectionem. Opera nostra, ut bona sint  
& Dei legem impleant, ex fontium istorum quopiam debent omnino  
procedere.

Quæstio est, An talis dilectio sufficiat etiam ad Contritionem?  
Quæro, *Ad Contritionem?* Quod enim ad cuncta extra Contritionem  
bona opera, Divinarumque de ipsis legum adimpletionem sufficiat,  
non possum hæere vel dubitare. Et hinc eos, qui expressam Dei sub  
explicita Deiratione dilectionem requirunt, existimo falli. Eorum  
unus fuit Joannes de Rockyzana, Hussitarum in Bohemia Princeps,  
aiens hominem omni temporis momento, incessanter & sine inter-  
polatione, sub præcepto teneri ad Deum elicitò & expresse actu con-  
templandum ac diligendum. Eandem Divinæ contemplationis ac  
dilectionis perpetuitatem in literis apud Lucam Dacherium exstanti-  
bus admodum commendat Odo, vir insigniter eruditus & sanctus,  
nescio cujus in Gallia cœnobij Clericus Regularis, scribitque: *Hoc*  
*quod dico senserunt esse verissimum, qui dixerunt fornicationem esse momen-*  
*taneum à Christi contemplatione recessum. Perfecti etenim viri interna*  
*dulci-*



*dulcedini tanto dilectionis ardore per contemplationem adherent, ut cum per desidiam, seu per negligentiam, vel modicum ab ea recesserint, fornicatos se iudicent. Scribit ex Divina sancti Augustini Patris sui doctrina, rectèque adjungit: Sed huiusmodi castitatem tenere fragilitatis nostra est valde difficile, & pœnè impossibile. Eam hac in vita esse dicit rem operationis & voti, non nostrarum virium, aut Divini Præcepti. Joanni item Rockyzanæ in Synodo Basileensi rectè respondit Fr. Joannes Ragulinus, Ordinis Prædicatorum tunc Procurator generalis, postea Basileensis Episcopus, & sanctæ Romanæ Ecclesiæ Cardinalis: Hoc est proprium Angelorum & Compræhensorum in patria. Sufficere adserit supremi iusti aut boni dilectionem virtutalem, quæ quid sit exponi non possit uno verbo, nec est hujus loci. Expressam tamen Dei dilectionem requiri adfirmo ad Contritionem. Requiritur enim expressa confessio, quâ Catechumenus credere se contestetur in Deum Patrem, Deum Filium, Deum Spiritum sanctum; quâ expressè contestetur se conjungi Christo, & legem ejus in perpetuum servare; quâ tamquam filius prodigus revertatur ad Patrem. Et hinc disertè ait sacrosancta Tridentina Synodus: Deum diligere incipiunt.*

Verùm quare addit, *Tanquam omnium iustitia fontem?* Respondeo quod velit dilectionem illam esse gratuitam & castam, de qua in Psalmorum commentario sanctus Augustinus: *Deus noster laudetur voluntate, ametur charitate. Gratuitum fit & quod amatur, & quod laudatur. Quid est gratuitum? Ipse propter se, & non propter aliud. Si enim laudas Deum, ut des tibi aliquid aliud, iam non gratis amas Deum. Erubesceres, si te uxor tua propter divitias amaret, & fortè, si tibi paupertas contingeret, de adulterio cogitaret. Cum ergo te à coniuge gratis amari velis, tu Deum propter aliud amabis? Quod præmium accepturus es à Deo, si avarus? Non tibi terram, sed seipsum servat, qui fecit cælum & terram. Quis Judæus, quis Samaritanus, quis Platonius, quis Marcionista non amat Deum? Verùm de judaico amore dicit Regius Propheta: Velut iumentum factus sum apud te, & ego semper tecum. Exponit in libris de Dei civitate laudatus Augustinus: Velut pecus, seu jumentum, dicit, utique non intelligens. Ea quippe à te desiderare debui, quæ mihi cum impijs non possunt esse communia. Tamen ego semper tecum, quia etiam in carnalium rerum desiderio Deos alienos non quæsi. Canis dominum aded diligit, ut ipsi non solum adsit semper & adhæreat fidelissimè, sed & in invasores pro ipso pugnet usque ad sanguinem. Nempe osam sibi diligit, & à domino sperat, ideoque illum non diligit, sed seipsum. Eodem modo idola fugit, & apud Domini altare fidus mansit carnalis Judæus: Ut pecus ob terrena gaudia & semetipsum,*

Ad Contritionem requiritur expressa Dei dilectio.

Psalm. 53.

Deum ut omnis iustitiae fontis diligere est ipsum diligere gratias. Carnalis & judaica Dei dilectio exponitur.

non ut homo ob bona rationalia & ipsum Deum, quem proinde tractabat non uti supremum suum Dominum, sed uti satellitem suarum cupiditatum. Eodem modo illum diligunt Platonici, Marcionitæ, immò & Calvinistæ, Lutherani, & cuncti generatim hæretici, qui sancti & Angelorum in futuro sæculo æqualitatem, & alia spiritalia bona ab ipso quidem sperant, verùm ad illam formam, de qua in libris de libero arbitrio sanctus Augustinus: *Qui æqualitatem Angelorum desiderant propter inanem gloriam suam, non idè volunt esse aequales Angelis, sed Angelos sibi. Itaque in tali voluntate perseverantes equabuntur supplicio pravicatoribus Angelis, potestatem potiùs suam, quam Dei omnipotentis diligentibus. Talibus enim ad sinistram constitutis, quia non quaesierunt Deum per humilitatis ianuam, & immisericorditer superbè, vixerunt, dicetur: ITE IN IGNEM AETERNUM, QUI PRAEPARATUS EST DIABOLO ET ANGELIS EIUS. Æqualitatem istam ambiunt, non ut Deo, in quem rebelles & blasphemii sunt, per ipsam plenè subijciantur & serviant, sed ut curiosæ ac elatæ suæ mentis libidinem expleant, idèdque semetipsos diligunt, non Dominum Deum, eumque & ipsi demutare conantur in ministrum & executorem suarum cupiditatum. Non castam benevolentiam, sed impurissimam avaritiam & concupiscentiam esse istiusmodi dilectionem ostendit eleganter in libris de vita contemplativa Julianus Pomerius: *Qui amicum propter commodum quodlibet amat, non amicum amare convincitur, sed commodum. Et idè Deum, quo nihil est maius aut melius, propter quid diligitur? Propter seipsum perfectè diligitur. Si verò saltem propter illa, qua præstat, amatur, non utique gratis amatur, quia iam illud, propter quod diligitur, ei, quod dictu quoque nefas est, antefertur. Quam germanè Christianam doctrinam in literis ad fratres Carthusienses multùm prædicat, & insigniter elucidat etiam S. Bernardus. Hinc ergo sacrosancta Tridentina Synodus illum diligendum definit, non propter nostrum temporale vel æternum commodum, sed propter illummetipsum, tamquam omnis Justitiæ fontem, tamquam supremam & incommutabilem, cui nos plenè subijcimus & perpetuùm servire profiteamur, disciplinæ & vitæ humanæ regulam, & ex hac dilectione concipiendum commissorum peccatorum odium & detestationem: Hæc est pœnitentia, quam agi oportet ante Baptismum.**

Eriam vita  
æterna po-  
test carna-  
liter diligi.  
L. 3. c. 9.

L. 3. c. 25.

Epist. II.

## CAPUT V.

*Exponuntur varij Divina dilectionis gradus seu species.*

**V**arias Divinæ dilectionis classes seu gradus distinguit in libro de natura & gratia sanctus Augustinus, dicens aliam charitatem esse inchoatam, aliam provectam, aliam magnam, aliam perfectam. in quinto & sexto super sancti Joannis Apostoli literas tractatu distinguit charitatem natam, nutritam, adultam, robustam, & perfectam. Adultam, robustam, ac perfectam laudat in literis ad Anastasium: Nunc hanc, nunc illam laudat ubique passim. Etiam nata seu inchoata charitas est illi duplex: Nempe & prima, quâ legi Dei secundum interiorem hominem condelectari incipimus, charitatis scintilla, seu prima & adhuc diluta bonæ voluntatis exordia; nec non & prima Divinæ bonitatis super omnia, non quoad vires, & effectum, sed quoad solum affectum dilectio. Grande est inter hasce charitates discrimen, utramque tamen quandoque ex alijs & alijs principijs vocat natam dumtaxat & inchoatam. Priorem subinde etiam vocat solummodò conceptam.

Dei item super omnia charitatem in eam, quæ viribus & effectui, & in eam quæ solo adfectu talis sit, distinguit admodum frequenter, præsertim in libro de gratia & libero arbitrio: *Qui vult facere Dei mandatum, & non potest, iam quidem habet voluntatem bonam, sed adhuc parvam & invalidam; poterit autem, cum magnam habuerit ac robustam. Quando enim Martyres magna illa mandata fecerunt, magna utique voluntate, hoc est, magnâ charitate fecerunt, de qua charitate ipse Dominus ait: MAIOREM HAC CHARITATEM NEMO HABET, QUAM UT ANIMAM SUAM PONAT PRO AMICIS SUIS. Ipsam charitatem Apostolus Petrus nondum habuit, quando temerè ter Dominum negavit. Et tamen quamvis parva & imperfecta, non deerat, quando dicebat Domino: ANIMAM MEAM PRO TE PONAM. Putabas se posse quod se velle sentiebat.* Dei super omnia quoad solum adfectum dilectio est illa, quâ Deo servire, obedire ejus mandatis, & mori potius quam in eorum prævaricationem labi volumus & spondemus; quâ item mandata illa, dum nulla fortioris tentationis illecebra aut violentia nos pulsant, omninò adimplemus; verùm tentationum istarum vincendarum vires necdum habemus. Aptissimum ad hæc exponenda est sancti Petri Apostoli exemplum. Etenim in novissima cœna, dum pedes sen leviores delictorum restantium reliquias à Domino ablutus spondebat cum eodem in carcerem & in mortem ire, Dominum super omnia omniò

Cap. 70.  
Diversi  
Divine dilectionis  
gradus.

Epist. 144.

Alia quo-  
ad vires &  
effectum,  
alia quoad  
solum affe-  
ctum est  
super om-  
nia.

Quid sit  
Dei super  
omnia di-  
lectio quo-  
ad solum  
adfectum.

Cap. 6.

Ser. 149.

c. 2.

Serm. 127.

diligebat; verum adfectu tantum, necdum viribus & effectu: Quod enim quæ volebat ac spondebat necdum posset seu valeret, ostiaria judaici Pontificis ancilla ostendit. Eandem distinctionem sanctus Augustinus laudat in libro de Pastoribus: *Attendite illos homines volentes bene vivere, iam statuentes bene vivere, & minus idoneos mala pati, sicut parati sunt bona facere.* Et de sancti Petri promissione rursum dicit in sermonibus de tempore: *Petrus necdum vires acceperat, quibus impleret promissum.* Et iterum in alio sermone: *Fuit quidem Domini dilectio in voluntate, sed non fuit in virtute, sicut ipse Dominus dixit, SPIRITUS QUIDEM PROMPTUS EST, CARO AUTEM INFIRMA.* Etiam apud sanctum Paulum Apostolum alia velle dumtaxat, alia gratia in nobis operatur & perficere; alius adhuc infirmus est in fide, alius autem adeo robustus & firmus, ut neque mors, neque vita, neque infernus, neque Angelus, neque Potestas, neque ullius creaturæ amor aut metus separare possit à charitate, quæ est in Christo Jesu. Et hinc sacrosancta Tridentina Synodus rectissime in fidei Canonem recepit hæc Augustini verba: *Deum impossibilia non iubet, sed iubendo monet & facere quod possis, & petere quod non possis, & adiuvat ut possis.* Hæc charitatis distinctio est bene notanda.

Quid sit  
adultæ  
charitas,  
quid robu-  
sta.

Epiſt. 144.

Quas nutritæ charitati vires sanctus Augustinus præcisè adſcribat; longa est discussio, & nostro proposito non necessaria. Adultæ verò & robustam charitatem patenter exponit in literis ad Anastasium Episcopum, de Apostoli verbis, *Humanum dico propter infirmitatem carnis vestra, sicut enim exhibuistis membra vestra servire immunditiæ & iniquitati ad immunditiam, ita nunc exhibete membra vestra deſervire iustitiæ ad sanctificationem,* scribens in hunc modum: *Quid est sicut illud, ita & hoc, nisi quemadmodum ad peccandum nullus vos cogebat timor, sed ipsius libido, voluptasq; peccati, sic ad iustè vivendum non vos supplicij metus urgeat, sed ducat delectatio charitasq; iustitiæ.* Et hæc quidem, quantum mihi videtur, nondum est perfecta, sed quodammodo adultæ iustitiæ. De verbis, *Humanum dico,* pergit: *Non frustra præmitteret Apostolus, HUMANUM DICO PROPTER INFIRMITATEM CARNIS VESTRÆ, nisi quia plus aliquid dicendum fuit, si iam illi, Romani fideles, ferre possissent. Plus quippe servituti debetur iustitiæ, quam peccato soleant homines exhibere. Nam pœna corporis, etsi non à voluntate, tamen revocat ab opere peccati. Nec facile quisquam est qui committat quo immundam percipiat voluptatem, si cruciatus vindictæ certum est continèd secuturos. Iustitiæ verò sic amanda est, ut ab eius operibus etiam pœna corporales non colibere non debeant, atque inter manus crudelium inimicorum luceant opera nostra coram hominibus, ut quibus placere possunt, glorificent Patrem*

nostrum, qui in calu est. Sicut ergo ille est nequissimus, quem nec pœna corporales deterrent ab iminundu operibus sordida voluptatu, ita ille iustissimus, qui nec pœnatum corporalium terrore revocatur à sanctis operibus luminosissima charitatis. Eam, quæ solas mundi suaves libidines, adultam; quæ insuper tormentorum quorumvis atque ipsius etiam mortis terrores & violentias superare possit, ait esse charitatem robustam. Densissima & lucidissima est hæc Augustini doctrina, cujus testimonia omnia qui describere voluerit, implebit grande volumen. Et hanc charitatem habuere Martyres omnes, habereque debent Ecclesiæ Pastores, utpotè quorum sit pro fratribus animas ponere, & habere non vana martyrij desideria, sed fidem Martyre dignam.

Nostro in corpore robusta ætas semper supponit ac includit adultam, nemoque est plenè validus, nisi plenè adules: Non sic in charitate. Plures enim esse ac fuisse mulieres, quæ martyres esse possint, & tamen nequeant Virgines permanere, advertit in libro de bono conjugali, & in libro de sancta virginitate B. Augustinus. Quosdam item in equuleo, ungulis, catasta, & alijs exquisitis gentilium tormentis fuisse constantissimos, ad Regij autem fisci minas, & inde secururam suarum prolium perpetuam paupertatem defecisse à Divini nominis confessione, authentica Martyrum Acta testantur. Et adversus Dioscorum, qui orthodoxos Episcopos sub impositæ hæresis furo tamquam orthodoxiæ Præles damnarat in Ephesino latrocinio, in Synodo Chalcedonenſi exclamavit Basilii Seleuciensis Episcopus, Isaurorum Metropolita: *Si apud Iudices habuissem, martyrium sustinuissem.* Quod ipsum ad Constantium Augustum dixit sanctus Hilarius Episcopus Pictaviensis. Maluissent à gentilibus tyrannos tamquam Christiani trucidari, quam à simulantibus orthodoxiam Episcopis aut Regibus tamquam hæretici damnari: Virâ quam samâ iniquè spoliari. Ejusmodi varias adultæ & robustæ charitatis permixtiones in humanis mentibus figit ex occultis suæ providentiæ rationibus Divina Majestas, scribitque de illis in libro de sancta Virginitate beatus Augustinus: *Latent ista in facultatibus animorum, tentatione panduntur, experientiâ propalantur.*

Perfectam hujus vitæ charitatem exponit idem Doctor in tractatibus super Epistolam sancti Joannis Apostoli: *Sunt homines qui cum patientia moriuntur, sunt autem quidam perfecti, qui cum patientia vivunt. Quid dixi? Qui adhuc desiderat istam vitam, quando illi venerit dies mortis, patienter tolerat mortem. Luctatur adversum se ut sequatur voluntatem Dei, & hoc potius agit animo quod eligit Deus, non quod eligit voluntas humana. Ex desiderio vitæ præsentis fit lucta cum morte, & adhibet pa-*

Subinde inter se variè cõmiscentur.

Cap. 23.  
C. 44. 47.

Act. x.

Cap. 47.

Quid sit perfecta charitas.  
Tract. 9.

*stentiam & fortitudinem, ut a quo animo moriatur. Iste patienter moritur. Qui autem desiderat, sicut dicit Apostolus, dissolvi & esse cum Christo, non patienter moritur, sed patienter vivit, & delectabiliter moritur. Et in libro de Pastoribus: Numquid frumenta timent ne mittantur in horreum? Immo optant vehementer ac desiderant. Numquid oves timent ne ponantur ad dexteram? Immo nihil eis tam tardum est, quam donec fiat. Et in commentarijs Psalmorum: Si veniat tentatio martyrij ducendi, Perfecti quid dicunt ex hac opportunitate? Bonum est mihi dissolvi & esse cum Christo. Alacres currunt, aut nihil aut modicè de terrena fragilitate contristantur. Loquitur ex Apostolo scribente ad Philipenses: Desiderium habeo dissolvi, & esse cum Christo multò magis melius, permanere autem in carne necessarium propter vos. Et hæc charitas tam adultam quam robustam semper includit. Etenim qui omnia mundi delectabilia & terribilia cum delectatione & desiderio perdit ac subit, nulla eorum cupiditate aut metu possit à Dei dilectione superari.*

Cap. 4.

Cap. 18.

Idem in libro Apologetico tradit Tertullianus: Nos Christiani per quævis mundi hujus mala nullo modo laedimur, quia nihil nostrâ refert in hoc mundo, nisi de eo celeriter excedere. Et in libro de Spectaculis: Mori cum voluptate debemus. Nam quid est aliud votum nostrum, quam quod & Apostoli, exire de sæculo, & recipi ad Dominum? Et hinc primitivos fideles, quod admirandâ hâc flammâ passim arderent, à gentilibus appellatos fuisse dicit Expeditum morti genus. Integras sanè civitates quandoque ad martyrium se obtulisse, & quasi ad solennes epulas gaudenter properasse, scribit in libro ad Scapulam, & plures alij authenticæ Scriptores confirmant. Christi Domini Sanguis in ipsorum præcorpijs tunc bulliebat: Ideòque cum Apostolis gaudebant, quoniam digni habebantur pro nomine Jesu contumelias, carceres, mortem pati. Abstrusum istud & admirabile gaudium animalis homo non percipit: Solus expertus potest credere quid sit Jesum diligere. Quod item in terræ motibus, horrenda mortis causa, parentes nostri non timerent, ideòque gentilibus admirationi essent, adserit in secunda apologia Martyr Justinus. Defunctum fratrem suum Satyrum, ut sese brevi ad Dominum sequi impetret, obtestatur sanctus Ambrosius. Et ad Ecclesiæ Thessalonicensis Clerum de defuncto nuper eorum Episcopo sancto Acholio scribit: Cupiebat Apostolico Spiritu iam dudum terras relinquere, sed tenebatur votu universorum, sicut de Apostolo legimus, quia remorari eum diutius in carne erat Ecclesiæ necessarium. Et in literis ad Horontianum Episcopum: Vbi perfecta charitas, ibi omnia fides, omnis spes. Hanc charitatem habens nihil times. Non potest timere martyrium. Insigniter id ostendit.

Epist. 12.

Epist. 44.



Patienter vivere est ad ipsam omninò necessarium: Futuræ vitæ desiderium debet ista patientia, quam patienter requirit & Apostolus, esse omninò temperatum. Et hinc ad sanctum Antonium, cœlestis regni longè cupidissimum, apud sanctum Hieronymum dixit sanctus Paulus Eremita: *Non debes quærere quæ tua sunt, sed quæ aliena. Expedit quidem tibi, sarcina carnis abiecta, Agnum sequi, sed & ceteris expedit fratribus, ut tuo insistantur exemplo.* Et ad Ancyranam Ecclesiam de defuncto ejus Episcopo Athanasio scribit Basiliius magnus: *O quoties animum meum non nihil contra hunc virum indignationis subiit, quod totus hoc desiderio tenebatur, ut dissolveretur & esset cum Christo, nec hoc pluri faciebat, ut diutius propter nos in carne maneret.* Et hinc ad lacrymosas filiorum voces, *Cum nos Pater deseris, aut cui nos desolatos relinquis?* Salva sunt tua tibi præmia, nostri potiùs miserere quos deseru, respondit jam cœlo vicinus sanctus Martinus: *Domine, si adhuc populo tuo sum necessarius, non recuso laborem, fiat voluntas tua.* Juxta Apostolum charitas patiense est, & omnia suffert, ideòque nimium Christi Domini & futuræ vitæ sine laudata jam patientia desiderium nescio quid vitij aut imperfectionis habet: Quærir quæ sua sunt, & oritur ex proprio sui amore, qui est venenum charitatis. Esse nos oportet imitatores sancti Salvij Albigenis Episcopi, quem defunctum è cœli gaudijs ad Gallicanas, quod illis à sanctis Angelis iudicaretur necessarius, Ecclesias ac vitæ præsentis ærumnas promptè rediisse laudat in Francorum historia sanctus Gregorius Episcopus Turonensis. Esse item imitatores Apostoli, qui pro fratribus suis iudicis paratus erat separari à futura in perpetuum beatitudine, & à Christo esse anathema: Ita locum istum, adseverans fuisse excessivam charitatem, sanctus Joannes Chrysostomus adsiduè exponit. Perfecta charitas est perfecta sub Deo obedientia, ideòque ad omnem ejus nutum debet esse expedita.

Patienter vivere omninò requiritur ad perfectam charitatem.

Epist. 61.

L. 7. c. 1.

Perfecta charitas excludit omnem adfixivum creaturæ amorem. L. 1. c. 4. Quid sit amor adfixivus. Cap. 4. L. 3. c. 15.

Omnem adfixivum creaturæ amorem non solummodò vincere, sed etiam excludere à nobis debet atque extinguere. Adfixivum porò amorem exponit sanctus Augustinus in libris de doctrina Christiana: *Frui est amore alicui rei inhaerere propter seipsam.* Et in trigesima septima homilia: *Ad usum adsumenda sunt bona temporalia, non eis vinculo amoris quasi glutino inhaerendum. Non facias tibi membra, quæ cum caperint praeiici, dolebis atque cruciaberis.* Et in libris de libero arbitrio: *Inbaremus ac implicamur subditi eis rebus, quas nobis subditi esse oportet, quia eis conglutinamur, atque velut membra animi facimus, quod sit amando.* Adfixivus ergo amor est ille, quo possessis seu speratis temporalibus rebus, contra Regij Prophetæ mandatum, cor apponi-

mus, quo eis menti nostræ adglutinamus, & quasi membra facimus, idèdque perdere aut non adipisci non possumus sine dolore. Ejusmodi rerum amissio est quasi animæ ex abscisso membro vulnus, idèdque illa statim gemitus aut lacrymas fundit quasi suum sanguinem, atque ita indiget medicina officiosæ consolationis. Est Apostoli ad Corinthios doctrina, amores istos eleganter vocantis ligna, scænum, stipulas, Divino nostro fundamento superædificata seu adfixa, idèdque per poenalem nati ex ipsorum amissione doloris ignem exurenda. Istiusmodi amores omnes perfectæ charitati repugnare, & ab ipsa, ut perfecta sit, debere absumi, non solus Augustinus docet aut Apostolus Paulus, sed res ipsa clamat: Ea namque charitas debet delectabiliter mori, idèdque non solum aurum, argentum, uxorem, filios, possessiones, sed & propriam vitam cum gaudio & desiderio deponere, quod fieri non possit, nisi extinctus sit omnis amor adfixivus.

Perfecta  
charitas  
expellere  
debet om-  
nem timo-  
rem servi-  
lem.

Cap. 33.

Et hinc in prima sua Epistola scribit etiam sanctus Joannes Apostolus: *Perfecta charitas foras mittit timorem.* Bonorum ac malorum temporalium timorem, de quo Augustinus in libro de Agone Christiano: *Perfecta charitas nec cupiditatem habet sæculi, nec timorem, id est, nec cupiditatem ut acquirat res temporales, nec timorem ne amittat. Per quas duas ianuas intrat & regnat inimicus, qui prius Dei timore, deinde charitate pellendus est.* Notanda sunt verba, *Prius Dei timore, deinde charitate pellendus est.* Per Dei quippe timorem intelligunt servilem gehennarum metum, adfirmantque etiam illum pelli à perfectâ charitate. Quod ipsum lucidiùs idem Augustinus adseverat in tractatibus supra laudatam sancti Joannis Epistolam, & adjungit causam: *Perfecta charitas facit perfectam Iustitiam, & non habet quare timeat, immò habet quare desideret, ut transeat iniquitas, & veniat regnum Dei.* Dat omnium peccatorum remissionem, idèdque & bonam ac securam conscientiam, cui firma sit in Deum fiducia, proindeque nullus metus servilis gehennarum. Est porro alius timor castus, quem in sæculum sæculi permanere adfirmat Regius Propheta: Est charitatis non minister, sed propria & germana proles, idèdque ab illa nequaquam pellitur aut evacuatur.

Tract. 9.

Volaticos  
creaturæ  
amores nō  
excludit.

Dixi solos rerum temporalium adfixivos amores pelli à perfectâ hujus vitæ charitate. Volaticos enim, quorum objecta sine doloris sensu amittuntur, illa non pellit. Quis enim hujus vitæ justus necessariam alimentorum mensuram quandoque non excedit? Quis amænâ aurâ, eleganti fabricâ, nictō prato, alijsq; elegatissimis Dei operibus quandoq; non delectatur? Nemo adeo sanctus est, qui vario venialium peccatorum pulvere indies non maculetur, & singulis momentis ad

cœlestem Patrem gemere non debeat: *Dimitte nobis debita nostra.* Etiam in bono nos immobiliter & indeclinabiliter non figit hęc perfectæ dilectio, ideoque qui per ipsam stat, assiduus vigilare debet ne cadat; cum timore & tremore operari salutem suam, ne quando irascatur Dominus, & pereamus de via iusta. Et hinc ad præsentem vitam redituro sancto Salvio Dominus merito promisit & fecit mali istius securitatem: *Ego sum custos tuus, donec reducam te in hunc locum.* Inter nostram, licet perfectam, & vitæ futuræ charitatem est grandissima distantia: Hęc nos non solum à volaticis etiam amoribus, seu ingeneratæ nobis concupiscentiæ ad sensibus levissimis, sed insuper ab ejus motibus integrè liberabit, ideoque erit plenissima ex toto penitus corde. Adeo firmè nos Deo ac ejus legibus adfiget, ut ipsas infringere nec volituri simus, nec valituri. Et hæc & alias utriusque charitatis differentias insigniter & amplè illustant S. Augustinus, sanctusq; Bernardus: Verùm hæc necessaria non sunt proposito præsentis.

## CAPUT VI.

*Quanta & qualis charitas requiratur ad Contritionem generatim sumptam.*

**Q**uidam requirunt charitatem robustam. Fundare se possint in sancti Joannis Chrysostomi ad populum Antiochenum homilij, dicentis de prærequilita ad Baptismum Pœnitentia: *Pœnitentiam agens non eadem amplius attingit negotia, quorum pœnituit, ideoq; iubemur dicere, ABRENUNCIO TIBI SATHANA, ne amplius ad eum revertamur.* Per Baptismum deleri dicit sola peccata seu culparum reatus, nequaquam vitia aut vitiosas consuetudines, ideoque illas longa virtutum ante Baptismum exercitatione delendas, parandasque vires, quibus percipiendam in Baptismo gratiam & vestem nuptialem custodire valeamus. Easdem vires in homilia de non contemnenda Dei Ecclesia ac Divinis Mysterijs requirit ad legitime percipiendam Eucharistiam, utpotè ignem cœlestem & arcanam flammam, de qua pergit in homilia de sancto Philogonio Patriarcha Antiocheno: *Ne igitur accesseris stipulam adferens, non ligna, non scænum, ne augeas incendium, exurasq; animam, sed accedens feras lapides pretiosos, aurum, argentum, quo puriorem reddas materiam, multoq; cum lucro discedas.* Et in homilij supra primam ad Corinthios Epistolam mandat conmunicantem esse à cupiditatibus immunem. At verò à ligno, scæno, stipulis, seu adfixivis creaturæ amicis immunis, soloque bonorum operum auro, argento, & pretiosis lapidibus ornata charitas est patenter ad minus robusta. Et ipsa profectò naturalis ratio por-

Aliqui ad Contritionem requirunt charitatem robustam, Homil. 21.

Tom. 7.

tandum in vase fictili thesaurum nemini credat, nisi qui habuerit prudentiam & vires illius ab omni periculo conservandi. Et hinc Regi, qui volens committere bellum adversus alium Regem, sedens prius computat sumptus necessarios, si possit cum decē millibus occurrere millibus viginti, ne scdam postea pacem cogatur supplicare, Baptizandum comparat in Evangelio Dominus, mandatque illi ad pugnandum cum diabolo & ejus Angelos expugnandos adesse non solummodò voluntatem & adfectum, sed etiam robur & vires. Parabolam istam sancti Ecclesiæ Patres ita passim exponunt, & nominatim in literis ad Hilarium Syracusanum sanctus Augustinus. Hinc item Catechumenos & Pœnitentes multis per annos probationibus exercuit olim & scrutata est Ecclesia, ut nempe illis validam, quâ percipiendum domum custodirent, charitatem conciliaret. Hinc item proximè ante doni impartitionem illos Sathanæ & ejus operibus renunciare, & cum Deo Patre ac Filio ejus Jesu Christo solenniter coram multis testibus stipulari jussit, non solum de prompta ad Evangelicæ vitæ custodiam voluntate, sed & de futura ejus sub horrendis reatibus custodia. Quæ stipulatio palàm videtur supponere sufficientes vires. Quis enim stipuletur rem, cujus sibi non speret adesse potestatem? Et hinc illos, qui postea lapsi declarârunt laudatas vires sibi stipulantibus defuisse, sanctus Cyprianus & alij Patres passim dicunt solis verbis, & non factis, adeoque dolosè & mendaciter renuntiasse. Hinc item Godescalcus, monachus miserabilis, sacratissima & verissima Exorcismi, Baptismi, Chrismatism, Eucharistiæ, & manus impositionis Sacramenta illis, qui post eorum perceptionem pereunt, dixit frustratoriè & perfunctoriè fuisse data, ipsosque per illa nec justificatos, nec redemptos. Ita eum adseruisse scribit in literis per Jacobum Sirmondum publicatis sanctus Amulo Archi-Episcopus Lugdunensis. Et apud sanctum Augustinum incognitus, verustus tamen, de salutaribus documentis libri Auctor scribit: *Charitas, qua deferri potest, non fuit vera.* Exponit in literis ad Henricum Senonensem Archi-Episcopum sanctus Bernardus, distinguens fidem mortuam, seu vivificantis dilectionis anima orbam; probatam seu in bonis operibus finaliter perseverantem, & fictam de qua pergit: *Fictam ego arbitror illam vocari fidem, qua suscepta quidem ex charitate moveri visa incipit ad operandum, sed non perseverans deficit ac moritur tamquam abortiva.* Eo utique sensu fictam dixerim nominatam, quo vasa figuli vocamus ficticia, non quia utilia non sint quamdiu durant, sed quia fragilia cum sint, diu minimè durant. De hac fidei fictione puto illos notari, qui ad tempus credunt, & in tempore tentationis recedunt.

Ex

Ep. 89. q. 4.

Cap. 7.

Epist. 42.

Ex hoc principio scribit in Præscriptionum libro Tertullianus: *Nemo Christianus, nisi qui ad finem usque perseveraverit.* Fragilis ergo, licet adfectu ad omnem Dei legem prompta, sine viribus & robore charitas est etiam ficta, & nunquam videtur fuisse vera, id est, sufficiens ad effectum Sacramenti.

Respondeo tamen omnino sufficere. Etenim sanctum Petrum Apostolum, dum cum Domino in carcerem & mortem ire spondebat, & pedes ablatus Eucharistiam à Domino perceperat, quis dubitet fuisse in vera charitate, & ejus virtute in Baptismo justificatum? Quod tamen fragilis, parva, infirma, & solo adfectu, non robore & viribus super omnia fuerit, supra audivimus à sancto Augustino, adfirmavitq; ipse Dominus: *Spiritus quidem promptus est, caro autem infirma.* Eidem infirmitati omnes usque ad acceptum in Pentecoste Spiritum sanctum fuisse subjectos Apostolos, constantissime laudatus Augustinus tradit, & vario documento possit lucidè ostendi. Non solis aurum, argentum, ac lapides pretiosos, sed & ligna, scænum, stipulas superædificantibus, varièque adhuc infirmam charitatem habentibus, Christum Dominum esse fundamentum, id est, justitiæ & sempiternæ vitæ per Sacramenta sua impartitorem, scribit ad Corinthios Apostolus Paulus. Et Regius Propheta cantat: *Imperfectum meum viderunt oculi tui, & in libro tuo omnes scribentur.* Exponit in libris de Baptismo laudatus Augustinus: *Sicut in Sacramentis veteris Testamenti vivebant quidam spirituales, ad novum scilicet testamentum, quod tunc occultabatur, occultè pertinentes; sic & nunc in Sacramento novi Testamenti, quod iam revelatum est, plerique vivunt animales. Qui proficere si nolunt ad percipienda quæ sunt Spiritus Dei, ad vetus Testamentum pertinebunt. Si autem proficiunt, & antequam capiant ipso profectu & accessu ad novum pertinent, et si prius, quam spirituales fiant, ex hac vita rapiantur, custoditi per Sacramenti sanctitatem in terra viventium computantur, ubi est spes nostra & portio Dominus. Nec invenio, quid verius intelligatur in eo, quod scriptum est, IMPERFECTUM MEUM VIDERUNT OCULI TUI, ET IN LIBRO TUO OMNES SCRIBENTUR.* Solum proficiendi studium & promptum adfectum requirit, non robur aut actuale profectum. Istud verò proficiendi studium & charitatis adfectum esse Baptizandis ac Reconciliandis penitus necessarium affirmat palam & in hoc ipso loco, & in alijs infinitis. Eandem semper fuisse universalis Ecclesiæ immobilem fidem edicunt ac evincunt Baptismales Renuntiationes, quas ex casto in Deum & ejus legem adfectu oportere, ac semper oportuisse fieri, nemo Christianus ausit vel ambigere, longè minùs inficiari. Et hinc de Catechumenis dicit

Sufficit quævis, licet solo adfectu, Dei super omnia charitas.

L. 1. c. 15.

Et omnino requiritur.

sacrosancta Synodus Tridentina: *Deum tanquam omni iustitia fontem, diligere incipiunt, ac propterea moventur adversus peccata, utique omnia, per odium aliquod & detestationem.* Hanc dicit esse pœnitentiam, quam ante Baptismum oportet agi.

S Joannes  
Chryso-  
stomus, expo-  
nitur.

Sancti Joannis Chrysoptomi in oppositam partem adducta testimonia continent consilium, non præceptum. Loquitur ex illis principijs, ex quibus parvulorum & Clinicorum Baptisma non plene probavit, quod ambo passim tepidè viverent postmodò, & à percepta gratia frequenter laberentur, utique ob non peracta Catechumenatus exercitia, perceptumque Sacramentum ante roboratam ac validè radicatam Dei ac Divinæ legis dilectionem. Et quidem Clinicos eodem ex fundamento suspectos olim habuit omnis sub cœlo Ecclesia, ideòque irregulares censuit, & arcuit à Clero. Eveniebat enim passim ipsis, quod evenire hodie videmus illis monachis, quibus cum dispenſatur in tempore aut rigore Novitiatus. Eos tamen fuisse, licet cum infirma & quoad solum adfectum super omnia charitate, fructuosè Baptizatos ac Reconciliatos, donatosque pleno utriusque Sacramenti effectû, palàm agnoscit laudatus Chrysoptomus, multis ostendit in literis ad Magnum Episcopum S. Cyprianus, crediditque semper Ecclesia universa. Memoratum Chrysoptomi consilium quidam hodie Pœnitentiales Presbyteri æmulantes, grandes peccatores sibi confessos ad Reconciliationis, ac præsertim ad Eucharistiæ gratiam non statim admittunt, sed priùs in meliori vita roborari, à semetipsis in isto robore probari, & tunc ad suas aures & manus reverti jubent. Quæ disciplina est omninò probanda: Opus tamen omninò est etiam spiritu discretionis.

Et Godes-  
calcus.

Et ab hoc consilio & sensu, longè absuit miserabilis monachus Godescalcus, redargutus graviter à laudato Amulone Archi-Episcopo Lugdunenſi. Redargutus fuit delirare cum impuro Joviniano, adversus quem scribit sanctus Hieronymus: *Secunda Joviniani propositio est, eos, qui fuerunt baptizati, à diabolo non posse tentari. Et ne hoc stultè dicere videretur, adiecit: Quicumque autem tentari fuerint, ostendi eos aqua, & non spiritu Baptizatos. Quod & in Simone mago legimus.* Fundamentum ejus erat malè intellectus sanctus Joannes Apostolus: *Omne, qui natus est ex Deo, peccatum non facit, quoniam semen ipsius in eo manet; & peccare non potest, quia ex Deo natus est.* Quem errorem Joviniano adscribit in libro de hæresibus etiam sanctus Augustinus. Eos ergo, qui post Baptisma tentantur & cadunt, non solum robusta, sed omni penitus charitate & justitiâ caruisse semper, homo imperitus deliravit. Et hinc sancti Augustini de victrice Dei gratia & effi-



caci Prædestinatione doctrinam de eodem errore infamare nitens Semi-Pelagiana Gallorum factio, ei apud S. Prosperum impegit hunc articulum : *Quod ab eis, qui non sunt prædestinati ad vitam æternam, non auferat percepta Baptismi gratia originale peccatum.* Eandem infamiam, quin & omnem tunc nati Prædestinatiani erroris fabulam, Augustini discipulis impropere perrexit ejusdem factionis progenies, atque hinc aliqui impactam volunt etiam miserabili Godescalco. Est quæstio inter eruditum Gilbertum Manguinium & Ludovicum Cellotium acriter agitata : Ex ipsa, quicumque illorum vincat, nihil educi possit adversus meam adsertionem.

## CAPUT VII.

Exponuntur verba sacrosancti Tridentini Concilij: *Etsi Contritionem hanc aliquando charitate perfectam esse contingat, hominemq; Deo reconciliare priusquam Pœnitentia Sacramentum actu suscipiatur, ipsa nihilominus Reconciliatio ipsi Contritioni sine Sacramenti voto, quod in illa includitur, non est adscribenda.*

**A**N sola sine actuali Sacramento Contritio quandoque justificet, donetq; Catechumeno aut Pœnitenti remissionem peccatorum, est antiqua quæstio, de qua in generali totius mundi historia scribit, de Valentiniano secundo Imperatore agens, Otto Episcopus Fiisingensis: *Hic est Valentinianus, qui à sancto Ambrosio Catechumenus factus, antequam gratiam Baptismi perciperet, morte præventus est. Qua de re prædictus Episcopus Epistolam lugubrem dixavit. In qua ab eodem reperitur dictum : QUIA QUEM IN CHRISTO REGENERATURUS ERAM, AMISI, IPSE VERO GRATIAM, QUAM POPOSCERAT, NON AMISIT.* Ex qua auctoritate quidam nostri temporis Theologi divinantur post promulgatam sententiam Evangelij, quâ dicitur, *NISI QUIS RENATUS FUERIT, &c.* aliquos sine Sacramento Baptismi, vel effusione sanguinis ob testimonium Passionis Christi, vel attestazione Dominicâ posse salvari, sic ratiocinantes, quod non alligavit Dominus Sacramentum potentiam suam. Non bene considerantes quid secundum quid loquantur auctores, quid opinando, quid asserendo, quid ex magnitudine doloris semet consolando. Quod tamen etsi verum sit, Dei potentiam reguli Ecclesiastici vel Sacramentum non cohiberi, mihi tamen, qui Christianâ regulâ stringor, necessarium erit credere, præter hoc neminem posse salvari. Quare quamvis Deo tanquam omnipotenti, iudæum vel gentilem, vel non Baptizatum sine effusione sanguinis vel attestazione propria possibile sit salvari, mihi tamen hoc credere erit impossibile, & ita Divina potentia in talibus, non sibi, sed

L.4. c.18.

mibi

*mibi alligatur. Et mirum, si hoc pietate ducti dicunt, quare non eadem pietate hoc de parvulis sentiunt. Quod si objiciant, quod isti tamquam adulti credere possunt, quod non illi; audiant quod illi solo delicto originali obligati tenentur, quod non isti. Restat ergo ut nos cum illis, & illi nobiscum Divinam admitemur in falibus, non discutiamus potentiam, exclamantes cum Apostolo: O ALTITUDO. Loquitur adversus sanctum Bernardum, qui ex laudato sancti Ambrosii sermone, & sancti Augustini de Baptismo libris, tamquam ex duabus Christiani dogmatis immobilibus columnis, oppositam sententiam in literis ad Hugonem de sancto Victore constanter defendit. Verum uterque Doctor de solo mortis articulo, & obtinenda tunc per solam sine actuali Sacramento Contritionem justificatione disputat, atque ita & anterioribus & posterioribus temporibus mota fuit & alia quæstio, An detur quæpiam adeo perfecta Contritio, quæ sola sine Sacramento ex statuta Dei lege justificet, donetque remissionem peccatorum.*

Otto impugnat S. Bernardū. Epist. 77.

Error variorum hereticorum.

Apud Tertullianum in libro de Baptismo Caiani, apud sanctum Augustinum Manichæi, & apud Theodoretum in quarto hæreticorum fabularum libro Messaliani sacrasanctum Aquæ Sacramentum exufflarunt uti superfluum, salvari nos & justificari volentes solâ fide & charitate. Errorem resumpsit Almaricus, Theologus Parisiensis, qui tria tempora, primum veterum, secundum novorum Sacramentorum, sine Sacramentis tertium distinguens, suis diebus dixit currere tertium, ideòque Baptismum, Confessionem, Eucharistiam, aliâque externa salutis adjutoria cessare, & homines justificari per solam charitatem. Ita in Philippi Augusti, Francorum Regis, vita scribit Rigordus. Et septimus Joannis Wicleffi per Synodum Constantiensem damnatus articulus est: *si homo debere fuerit contritus, omnis confessio exterior est superflua & inutilis.* Errorem latius exponit Thomas Waldensis. Etiam Petrus de Osma, per Xixtum quantum Pontificem damnatus, sacramentalem peccatorum confessionem garrit esse humani dumtaxat juris, ideòque solam Contritionem justificare. Et ab hisce fabulis Martinus Lutherus & Joannes Calvinus admodum modicè recedunt: Baptismi enim & Pœnitentiæ Sacramenta omni in nostram justificationem causalitate spoliare conantur, eamque transcribere in solam fidem.

A. 1209.

Cap. 147.

Opinio quorundam Theologorum.

Quidam porrò hodie in Ecclesia Theologi, licet laudata Sacramenta profiteantur media necessaria, Catechumenos tamen ac Pœnitentes quavis, quæ Dei dilectionem adfectu super omnia & suscipiendi suo tempore Sacramenti votum includat, Contritione existimant statâ atque infallibili lege justificari, & hanc esse quam sacrosan-

sancta Tridentina Synodus dicit esse charitate perfectam. Fundant se in varijs Divinæ Scripturæ testimonijs. In Regij Prophetæ poenitentiali voce, *Peccavi Domino*, cui statim Prophetæ Nathan subjunxit: *Dominus transulit peccatum tuum*. Ex trigésimo primo Psalm: *Confitebor adversum me iniustitiam meam Domino, & tu remisisti iniquitatem peccati mei*. Ex Esaia Prophetæ juxta septuaginta editionem: *Si reversus ingemueris, tunc salvus eris*. Ex Prophetæ Ezechiele: *Si impius averterit se ab iniustitia sua, iniquitatum eius non recordabor amplius*. Ex Proverbijs: *Ego diligentes me diligo*. Ex sancto Petro Apostolo: *Vniuersa delicta operit charitas*. Ex sancti Joannis Apostoli literis: *Translati sumus de morte ad vitam, quoniam diligimus fratres*. Ex Domini verbo apud sanctum Lucam Evangelistam: *Remittuntur ei peccata multa, quoniam dilexit multum*. Ex alio ejus apud sanctum Joannem verbo: *Qui diligit me, diligitur à Patre meo*. Adducunt loca similia plura, atque ex illis sibi persuadent nullam esse veram Dei super omnia charitatem, cui statim Deus non retribuatur remissionem peccatorum.

Cap. 30.

Cap. 18.

Cap. 8.

Ep. 1. c. 4.

Cap. 7.

Dari talem charitatem omnino profiteor. Disertè enim sacrosancta Tridentina Synodus docet definitam à se Contritionem aliquando esse charitate perfectam, hominemque per ipsam Deo reconciliari, priusquam Poenitentiae Sacramentum actu suscipiatur. Notanda est vox, *Aliquando*: Edicit perfectionem istam non semper Contritioni, seu non omni, quæ veram tamen Dei super omnia charitatem includere debet, Contritioni adesse. Dei super omnia quoad affectum dilectio inesse debet ac semper inest etiam imperfectæ ex gehennarum aut aliarum poenarum servili metu conceptæ Contritioni, quam tamen sine Sacramento non justificare, eadem Synodus disertè definit. Et quod aliquando dumtaxat fit, rarò fit. Quæ omnis doctrina est sancti Augustini. Etenim in libris de Baptismo adversum Donatistas dicit quosdam Catechumenos esse *Divinâ charitate flagrantés*; in libro de fide & operibus scribit plerosque diebus illis, quibus catechizantur, exorcizantur, scrutinia subeunt, & præsertim quibus sacrum Fontem competunt, esse vigilantissimos, charitatis studio fervere, omni curâ pendere ab ore Sacerdotum; in Confessionum libris collegam suum Alipium laudat tantâ Divinæ dilectionis flammâ caluisse, ut juvenis nobilis & Afer, frigoris per naturam impatiens, glaciatum Mediolanensis territorij solum per omnem Quadragesimam ausu insolito calcaret & ambularet nudis pedibus; etiam seipsum adfirmat fuisse amarissimâ cordis Contritione donatum, sagittatum Dei charitate, liberatum sædis cupiditatibus, & antea tenaciter dilectas

Quædam  
Dei chari-  
tas sine  
Sacramen-  
to omnino  
justificat.

Non om-  
nis id facit  
L. 4 c. 22.

Ostenditur  
ex D. Au-  
gustino.

Cap. 19.

suavitates cum gaudio dimisisse; in sexto adversus Julianum Pelagianistam libro ait Catechumenos plures esse correctos à vitijs & rectè vivere; in quarto super sancti Joannis Evangelium tractatu adseverat quosdam abstinere ab omni concubitu, vale facere sæculo, renunciare possessionibus in pauperes distributis, esse insigni Ecclesiasticorum dogmatum peritiâ instructos, & multis fidelibus per omnia meliores: Multos etiam cum Catechumenatu etiam monachismum percepisse, & eundem cum Christianitate fuisse professos in Baptismo, laudati Augustini, Paulini Nolensis Episcopi, & aliorum exempla demonstrant. Quin & plures certasse usque ad mortem pro Christo Domino, fuisseque gloriosos, ac in Dei dilectione non solum adultos, sed & robustos Martyres quis Theologus ignoret? Et tamen de hisce cunctis in adducto super sancti Joannis Evangelium tractatu pergit laudatus Augustinus: *Omnia peccata super illos sunt, & nisi venerint ad salutarem Baptismum, ubi peccata solvuntur, cum omni sua excellentia non possunt intrare in regnum cælorum.* Et in tertio decimo tractatu: *Quantumcunque Catechumenus proficiat, adhuc sarcinam iniquitatis sua portat, non illi dimittitur, nisi venerit ad Baptismum.* Et in laudato adversus Julianum libro pergit de Catechumeno: *Nec dum per remissionem peccatorum est liberatus.* Et in libris de Symbolo ad Catechumenos: *Catechumeni quamdiu sunt, super illos sunt omnia peccata illorum.* Etiam semetipsum, quem Divinâ dilectione & peccatorum Contritione insigniter arsisse jam audivimus, non nisi in Baptismo fuisse à peccatorum maculis seu reatibus liberatum, palam profitetur in libris confessionum. Lucida sunt ejus verba: *Ea per superius laudatam charitatem operans fides me securum non faciebat de prateritis peccatis meis, quæ mihi per Baptismum tuum remissa nondum erant.* Et iterum: *Nonne & hoc peccatum cum cæteris horrendis & funereis in Aqua sancta ignovisti, & remisisti mihi?* Et rursum: *Baptizati sumus, & fugit à nobis sollicitudo vitæ prateritæ.* Utique propter illic primitus perceptam remissionem peccatorum. Hic est enim magnus Baptismi effectus, quem etiam Reconciliationis Sacramento adscribit sacrosancta Tridentina Synodus: *Res & effectus huius Sacramenti est reconciliatio cum Deo, quam interdum in viri pijs, & cum devotione hoc Sacramentum percipientibus, conscientia pax & securitas cum vehementi spiritus consolatione consequi solet.* Pergit Augustinus in quarto super sancti Joannis Evangelium tractatu: *Quomodo non caruit populus Israel populo Egyptianorum, nisi cum venisset ad mare rubrum, ita pressuræ peccatorum nemo caret, nisi cum ad sanctum Baptisma pervenerit.* Et in libro de fide & operibus: *Non sufficit professio receptionis à peccatis*

mor-

L. 1. c. 8.

L. 9. c. 4.

Cap. 2.

Sess. 14 c. 3

Cap. 11.

morealibus, nisi etiam lavacro Regenerationis cuncta præterita, quæ velut persequuntur, peccata deleantur; sicut non sufficit Israëlitis recedere ab Ægypto, nisi ea, quæ insequeretur, hostium multitudo eiusdem mari fluctibus interiret, qui Dei populo transiuro, liberandos, patuerunt. Quæ allegoriâ frequentissimè utitur non solus ipse, sed omnis sanctorum Patrum chorus, constanter adseverans Catechumenorum reatus, ad Ægyptiorum persequentium exemplar, non nisi in aquis mori & suffocari.

Palmare hujus veritatis fundamentum producit sanctus Augustinus in libris de Baptismo adversum Donatistas, adserens cordis conversionem & Baptismatis Sacramentum esse duas invicem necessarias humanæ justificationis concaussas, & adjungens: *Alterum sine altero parum est, utrumque perficit æterna possessionis heredem.* Et in libris adversus Petilianum, Constantinensem Donatistarum Episcopum: *Alterum sine altero non perducit ad regnum cælorum.* Et in libro de unitate Ecclesiæ: *Verumque necessarium est ad Dei regnum capeffendum, & Baptismus & Iustitia* Ambas concaussas ait esse Evangelicam Divinæ Majestatis legem, ideòque sine juncto utriusque concursu neminem regulariter justificari. Et iure merito. Etenim qui dixit, *Nisi abundaverit iustitia vestra plusquam Scribarum & Pharisaorum, non intrabitis in regnum cælorum,* etiam dixit, *Nisi qui renatus fuerit ex aqua & Spiritu sancto, non potest introire in regnum Dei.* Quo argumento adfidue utitur sanctus Augustinus. Quod ipsum adversus Cajanos, garrientes, hominem solâ fide justificari, tradit in libro de Baptismo Tertullianus: *Vbi fides aucta est credendi in Nativitatem, Passionem, Resurrectionemq; Christi Domini, addita est ampliatio Sacramento, obfignatio Baptismi, vestimentum quodammodo fidei, quæ retrò in antiquo Testamento erat nuda, nec potest iam justificare sine sua additi Baptismi lege.* Et in libro de Spiritu sancto magnus Basilii: *Fides ac Baptisma sunt duo modi paranda salutis, inter se cognati & inseparabiles.* Nam fides perficitur per Baptismum, Baptismus verò fundamentum fidei nititur, & utraque res per Evangelicas trium Divinarum Personarum invocatrices voces impletur. Et in tertia catechesi sanctus Cyrillus Hierosolymæ Episcopus: *Neque si quis aquâ baptizetur absque Spiritu, perfectam habet gratiam, neque si quis etiam bene compositis probisq; sit moribus, non recipiat autem signaculum per aquam, intrabit in regnum cælorum. Audax est hic sermo, sed non meus: Iesus enim est, qui hanc tulit sententiam.* Variò id Divino testimonio confirmat. Et illis, qui adolescentem Æthiopem, non per Baptismatis Sacramentum, sed per prævia Catechumenorum mysteria seu ceremonias volebant fuisse justificatum,

Datur ratio à priori.

L. 4 c. 22.

L. 3 c. 56.  
Cap. 22.

Cap. 13.

Cap. 12.

respondit Ferrandus Ecclesiæ Carthaginenfis Diaconus: *Magna sequitur absurditas, ut putesur, illis tantum mysterijs sufficientibus & plenam salutem conferentibus, aqua fontis æterni non renasciturum suscipere, sed renatum.* Adolescens ille plenè catechizatus, ac insigniter contritus, antequam ad sacrum Fontem perveniret, ex morbi violentia incidit in mentis impotentiam, in ipsa fuit baptizatus, & defunctus. Hinc quidam, Baptisma in amente operari non posse rati, illum per laudatos Catechumenorum mysteriosos ritus opinati sunt justificatum. Necessariam Baptismi causalityatem crediderunt ab his supplementam. At credulitatem istam uti absurdam, utpotè quæ non renasciturum, sed jam renatum suscipi à sacro fonte doceret, abjecit Ferrandus, istamque abjectionem sanctus Fulgentius omnino probavit: *Ea mysteria, quæ ante Baptismum in Ecclesiâ geruntur, concipi spirituales hominem faciunt, non renasci.* Hinc est quod perveniet ad salutem, si quem secunda natiuitas educet ad lucem. Ad quam lucem illis homo mysterijs preparatur, sed Baptismati Sacramento perducitur. Hoc est, quod superius dixi, in illis mysterijs esse salutis officium, in Baptismate salutis effectum. Actualis Sacramenti causalityatem impetrandæ justificationi docet adeò necessariam, ut à nullo Vicario possit suppleri. Et hinc parvulorum, qui per solum sine propria fide & charitate Baptismum, & quorundam agonizantium adultorum, qui per solam sine Baptismo aut reconciliatoria Absolutione Contritionem justificantur ob extremam necessitatem, justificationem esse quasi heteroclytam, irregularem, privilegiatam, & singularem gratiam, multis in laudato adversum Donatistas libro ostendit S. Augustinus. Et hanc esse avitam & unanmem omnium sub cælo Ecclesiarum doctrinam, possit etiam ex alijs lucidis principijs demonstrari.

Sola perfecta charitas justificat sine Sacramento.

Quocirca charitas, quæ etiam sine actuali Sacramento hominem Catechumenum aut Pœnitentem infallibili lege donet remissione peccatorum, eamque vires etiam Contritioni communicet, est sola charitas perfecta, quæ vivit patienter, delectabiliter moritur, & omnem rerum creaturarum adfixivum amorem in nobis exstinguit. Hanc enim solam patenter laudat sacrosancta Tridentina Synodus, aiens Contritionem aliquando esse charitate non solum adultam aut robustam, sed etiam perfectam, ideoque tunc hominem Deo, etiam ante susceptum Sacramentum reconciliare. Loquitur ex sancto Augustino in commentario sexti Psalmi: *Perfecta nostra conversio paratum invenit Deum, sicut Propheta dicit, TAMQVAM DILUCULUM PARATUM INVENIMUS EUM. Dum enim nos convertimur, id est, mutatione veteris vitæ resculpimus spiritum nostrum, durum sentimus & laboriosum ad sete-*



nitatem & tranquillitatem Divina lucu à terrenarum cupiditatum caligine retorqueri, & in tali difficultate dicimus, CONVERTERE DOMINE, id est, adjuva nos, ut perficiatur in nobis conversio, qua te paratum invenis, & fruendum te prebet dilectoribus tuis. Et idèd postquam dixit Propheta, CONVERTERE DOMINE, addidit: ET ERUE ANIMAM MEAM, tamquam inberentem perplexitatibus huius sæculi, & spinas quasdam dilacerantium desideriorum in ipsa conversione patientem. Aliam, quæ Deum ad nobis donata peccatorum remissione & reddito suæ fruitionis jure miserandum faciat, aliam cordis conversionem seu Contritionem, quæ illum ad gratias istas mox impartendas non inveniat aut faciat paratum, palàm distinguit Augustinus, & istam dicit esse solam conversionem perfectam, quæ animam eruat ab omni adfixiva cupiditate. Quousque ad gradum istum non pertigit anima, quamvis gemebunda & contrita ad peccatorum remissionem anhelet, addit Deum, licet non donet, non esse crudelem, quod nondum anima tam perfectè oret, ut ei dicat: *Adhuc loquente te, dicam, Ecce adsum.* In nono super sancti Joannis Apostoli literas tractatu dicit non ab inchoata, sed à sola perfectà charitate pelli omnem, etiam gehennarum & futuri Divini judicii timorem, & dat causam: *Perfecta charitas perfectam facit iustitiam, & non habet quare timeat; immodò habet quare desideret, ut transeat iniquitas, & veniat regnum Dei.* Perfecta charitas foras mittit timorem, quia timor tormentum habet. Torquet cor conscientia peccatorum? Nondum facta est iustificatio. Est ibi quod sitillet, quod pungat. Idèd in Psalmo de ipsa perfectione iustitiæ quid dicit? *CONVERTISTI LUCTUM MEUM IN GAUDIUM MEUM, CONSIDISTI SACCUM MEUM, ET CINXISTI ME LÆTITIA, UT CANTET TIBI GLORIA MEA, ET NON COMPUNGAR.* Quid est, NON COMPUNGAR? Non sit quod stimulet conscientiam meam. Peccatorum remissionem statà atque infallibili lege semper dari Contritioni perfectæ non possit lucidiùs pronuciare. Perfectam charitatem esse perfectam iustitiam adfirmat etiam in libro de natura & gratia, item frequenter alijs in libris adversum Pelagianos. Eandem esse dicit laudatam à sancto Petro Apostolo *bonam conscientiam, & spem in Deum*, id est, conscientiam ab omni peccatorum reatu liberam, quæ cum fiducia expectet à Domino vitam æternam. Ex eodem principio Dominicam orationem, non à Catechumenis aut Competentibus, sed à solis jam per sanctam Aquam regeneratis dici permisit antiqua Ecclesia. Quod nempe articulus, *Adveniat regnum tuum*, summum perfectæ charitatis votum, securè dici non possit, nisi à Donatis remissione peccatorum. Et hinc articulos varios, qui perfectam charitatem seu Contritionem sine peccatorum remissione,

Cap 70.

seu cum peccatorum reatu adferebant posse consistere, optimo jure Pius quintus Pontifex damnavit, abolevit, circumscripsit.

Perfecta  
Contritio,  
ut iusti-  
ficet, requi-  
rit Sacra-  
menti vo-  
tum.

L. 6. c. 25.

Rectè verò sacrosancta Tridentina Synodus addit *Ipsam nihilominus reconciliationem ipsi Contritioni sine Sacramenti voto, quod in illa includitur, non esse adscribendam.* Loquitur rursùm ex sancto Augustino in libris de Baptismo adversùm Donatistas: *Deum sanctificat Sacramentum suum, ut homo, sive antequam baptizetur, sive cum baptizatur, sive postea quodcumque ad se veraciter converso id ipsum valeas ad salutem, quod ad perniciem, nisi converteretur, valeret.* Cordis conversionem & Baptismatis, adeòque & Reconciliationis Sacramentum dicit esse duas justificationis nostræ necessarias concausas, istam quæ mutuum necessitatem esse tantam, ut etiam illi, qui ante aut post susceptum Sacramentum justificantur, justificentur per ipsum quod necdum est, aut jam præterijt: Quia nempe nulla cordis conversio quidquam prodest sine ipsius voto. Hocce adseverat esse adeò necessarium, ut etiam bono latroni non possit defuisse. An actu baptizatus ille fuerit, fateatur ambiguum, definit tamen *sine Sacramenti sanctitate non fuisse, quia non eius accipiendæ voluntas defuit, sed non accipiendæ forsan necessitas adfuit.* Baptismi susceptio est solennis ac Divinitus instituta Dominicæ Passionis profitendæ formula, ideòque ejus saltem votum omni penitus Contritioni, uti nobilis portio, debet esse inclusum. Etiam Contritioni Catechumenorum Martyrum. Hinc enim ad sanctam Aquam, tamquam cervi ad fontes, semper ardentissimè anhelant, & ipsam sibi per summa licet discrimina impendi procurant etiam intra carceres: Plurimis exemplis id possit ostendi. Martyrium non est nisi Baptismi Vicarium, ideòque ejus per votum adiutorio habet omnino opus. Vicarium sine Principalis influxu nequit operari.

L. 4. c. 23.

## CAPUT VIII.

*Quæstiones quadam circa justificationem per solam sine actuali Sacramento Contritionem.*

Contritio  
imperfecta  
sine Sacra-  
mento quã-  
doque ju-  
stificat.

Q. 84.

L. 1. c. 15.

L. 2. c. 35.

**P**Rima quæstio est, An imperfecta Contritio nunquam ante susceptum actualiter Sacramentum conferat remissionem peccatorum? Respondeo affirmativè. Etenim Sacramentorum effectus quandoque sine ipsorum concursu dari à solo Deo, multis tradit in quæstionibus super Numerorum librum, in libris adversùm Parmenianum, & in libris adversùm Petilianum, qui sola Pontificæ manus impositione dixerat Spiritum sanctum inferi, sanctus Augustinus.

Factum id adfirmat & in veteri & in novo Testamento. Et singulariter de peccatorum remissione dicit in libro Homiliarum: *Qui dimittit per hominem, potest dimittere & prater hominem. Neque enim minus idoneus est per se dare, quam per alium.* Et ita frequenter, immò semper adultis factum fuit in veteri Testamento. *Retrò*, inquit in libro de Baptismo Tertullianus, *erat salus per nudam fidem ante Domini Passionem.* Per hanc addit fidei, utique per dilectionem operanti, accessisse Sacramentum tamquam vestimentum: Vestimentum efficax, quod fidei ad hominem Christo Domino induendum ac ejus justitiâ vestiendum infirmæ atque insufficienti præberet adjutorium ex opere operato. Antiqui ergo ante Domini in carne adventum homines erant in statu illo, in quo Pœnitentes quosdam posuit in libro de Pudicitia lapsus ad Montanum Tertullianus: *Et nos pœnitentiam debere agnoscimus, sed veniam Deo reservamus.* Debebant de peccatis per charitatem & varia satisfactionis opera conteri, at nullus erat in terris Sacerdos, nullum Sacramentum aut Sacrificium, quod eis daret veniam, quam sibi soli Deus reservabat. Perfecta per statam legem, imperfecta Contritio eos per arbitrariam, cujus consilia nemo hominum penetrat, Divinæ Bonitatis gratiam justificabat, uti factum existimo in Rege David, homicida & adultero, quem in charitate perfectum non fuisse plures existimant, nec sine fundamento. Et peccati transitio, & translationis factæ revelatio fuerunt illi Dei beneficium singulare. Et hinc novi, quod infirmæ nostræ Contritioni Baptismi & Reconciliationis Sacramenta, obtinendæ justificationis efficacia & infallibilia adjutoria providit, per Jesum Christum Testamenti gratia est incomparabiliter magna.

Quæstio secunda est, An aliqui etiam in novo Testamento fuerint per solam sine actuali Sacramento Contritionem, imperfectam justificati? Respondeo adfirmativè. Quidam id probant ex muliere Samaritana, Zacchæo, Maria Magdalena, bono latrone, & alijs id genus, quos Dominus omninò videtur sine Sacramento justificasse. Res tamen incerta est, & in utramque contradictionis partem ab antiquis Ecclesiæ Patribus disputatur. Quidquid sit, ad propositum nostrum non faciunt exempla ista, duas ob causas. Primò, quod Pœnitentium istorum Contritioni, licet non alicujus Sacramenti, tamen Divinæ vocis, *Hodie merum eris in Paradiso, Remittuntur tibi peccata tua*, adjutorium accesserit, omninò æquivalens Sacramento. Deinde, necdum tunc, uti in libris adversus Parmenianum sanctus Augustinus advertit, erat *constitutus ordo Ecclesiæ*: Ex arbitrio, non ex regula Dominus Jesus agebat. Quocirca quærendum est, an post institutum

Hom. 23.  
c. 10.  
Frequenter  
id fecit in  
in antiquo  
Testame-  
to.  
Cap. 13.

Cap. 19.

Quandoq;  
etiam in  
novo.

L. 2. c. 25.

istum ordinem, fixosque nobis novorum Sacramentorum Divinos Canones aliqui unquam fuerint iustificati per solam sine Sacramento actuali imperfectam Contritionem? Et respondeo affirmativè. Pergit enim laudatis adversus Parmenianum libris S. Augustinus: *Constitutum iam ordine Ecclesie, Centurionem Cornelium ante ipsum Baptismum, ante impositionem manu, cum eis qui secum aderant, Spiritu sancto repletum Petrus ipse miratus est.* In Cornelio hoc distinguenda sunt duo tempora; primum à prima ejus fide usque ad accersitum & præsentem Apostolum Petrum, secundum à præsentem Apostolo usque ad actuale Baptismum: Nequaquam in primo, sed ad secundumtaxat temporis exordium fuisse peccatorum remissione donatum, est constans doctrina sancti Augustini. Et tamen non sine fundamento donum istud Petrus Apostolus & omnis cum illo novella Ecclesia sunt admirati: Quod nempe extraordinarium, & Divini novelli Canonis dispensatorium esset, tantæque dispensationis causas & laudata Ecclesia, & ipse etiam Apostolus ignorarent. Nullus usque tunc incircumciscus fuerat donatus Baptismo, & è fidelibus Judæis plures circumcisionem esse necessariam ad Baptisma viam opinabantur, ideoque errorem sanaturus Deus optimus maximus Cornelio cuncta Christianitatis charismata impartivit ante Baptismum, atque ita ostendit circumcisionem illi non debere præmitti. Hanc fuisse germanam istius dispensationis causam lucidè tradit in libris de sanctissima Trinitate, in commentario Psalmi nonagesimi sexti, & in vigesima tertia Homilia laudatus Augustinus, eique alij Patres constanter adstipulantur, atque ita adseverant ab ipso Deo factam Divini Canonis ex tanta totius Ecclesie communi causa dispensationem non posse à nobis in regulam verti. Nihilominus Dominum Deum hanc dispensatione fuisse etiam ex minoribus quandoque causis usum suadent varia per varios gravissimos Scriptores laudata exempla, quibus alibi producendis ego nec velim nec ausim refragari. Domini miserationes sunt super omnia opera ejus. Sunt interim dispensationes atque exceptiones, atque ita laudatam superiùs Evangelij regulam stabiliunt ac firmant, Et hinc in eruditis ad Theodosium Episcopum de Pythoniis literis rectè scribit sanctus Gregorius Episcopus Nyssenus: *Postremum caput propositarum questionum, quomodo Spiritus ante Baptismum adveniat, ampliori indiget disquisitione atque consideratione.* Quod nempe non regulare, sed dispensatorium sit opus istud, ideoque non fiat passim, sed rarò ex gravibus causis.

Tertia quæstio est, An in mortis articulo pius Dominus Deus per specialem quandoque misericordiam suppleat necessariam causam  
lita;

L. 15. c. 19.  
Cap. 12.

Tgm. 2.

litatem sine culpa nostra deficientis Sacramenti, nosque iustificet & salvet ex sola imperfecta Contritione? Antiquissima est hæc quaestio, orta vel potius aucta insigniter ex errore sancti Cypriani, volentis datum in hæresi Baptisma esse irritum & exufflandum, ac insuper fatentis quod exufflandi ac repetendi mos ab Agrippino Antecessore suo per Tertullianum, qui Presbyter ejus fuisse existimatur, persuaso & circumscripto originem duxisset. Hinc enim quaestio Jubajani Episcopi: *Quid fiet de his, qui in præteritum de hæresi ad Ecclesiam venientes sine Baptismo admissi sunt?* Damnatos esse & periisse videntur in erronea Cypriani Synodo docuisse Nemesianus Tubunensis, Sedatus Tuburbenfis, & Secundianus Episcopus Tambeenfis, utique ex Evangelica regula, quæ cordis conversionem & Baptismatis Sacramentum sanxit esse necessariae ac individuas humanæ justificationis causas. Ad eandem sententiam ex eodem fundamento accedit in oratione adversum morosos Baptismi in vitæ finem dilatores sanctus Gregorius Nyssenus Episcopus, argumentum ipsorum, quo susceptum in viridi ætate Sacramentum à se lapsibus maculandum formidare allegabant, refutans: *In electione malorum magis est eligendum, ut salutare lavacrum adsecutus, rursum sit in peccato, quam ut gratia expertis vitam finiat. Nam peccatum quidem veniam fortasse consequatur aut clementiam, cuius magna est spes apud bonos; alteri autem est omnino verita salus ex certa & definita sententia. Nam cum audiero vocem, qua non incutitur, dicentem, AMEN, AMEN, DICO VOBIS, NISI QUIS NATUS FULRIT DESUPER, NON POTEST VIDERE REGNUM DEI, nihil boni possum exspectare eum, qui mysterijs non sunt initiati. Quamnam enim reverà veniam aequum est impartiri eis, qui Regis gratiam adsecerunt contumelia, aris alieni non admittentes rescissionem, nec amplectentes libertatem, qua sua sponte ad eos è cælo descendit, per doni autem contemptum, eum qui donavit, probro & dedecore adfecit? Animam minimè illuminatam, & Regenerationis gratiâ non ornatam, nescio an Angeli suscipiant, postquam fuerit separata à corpore. Quomodo enim, cum non sit ob signata, nec ullum ferat signum sui Domini, quam est verisimile per aërem ferri errantem & vagantem, & minimè quaesitam, ut quæ Domino careat, quarentem quietem & locum in quo maneat, & non invenientem, frustra desentem, & inutiliter penitentem, non secus atque divitem qui induebatur purpura & bysso, quemq; lautus & delicatus omnis generis cibis alebat, materiam ignis, qui non potest extinguui. Agit in nobilem virum & strenuum militem Archiam, natum apud Ponticos in civitate Comanorum, qui Carechumenus ex inita adversum Schytas Nomadas pugna lethali ter læsus pro communi patriæ salute, & in extremis*



clamans, *Montes & sylva Baptizate, arbores & rupes date gratiam*, sine Baptismi gratia fuerat defunctus. Et adjungit Gregorius: *Quas miserabiles voces cum recessisset Comana, pro cuius salute pugnabat, civitas eas magis deflevit, quam casum belli*. Quod nempe crederet Archiam per solam Contritionem suam, licet ardenti Baptismatis desiderio vestitam, non potuisse in extremo mortis articulo salvari. Peiguit Gregorius: *Huc similes sunt ij quoque, qui à morbo repente opprimuntur*, qui oppressi sanctam Aquam, Sacerdotem, aliaque ad Baptismum necessaria inclamantes sine ipso exstinguuntur. Hinc ut omnes illuminationis Sacramentum sani accipiant suo tempore, concludit & serio hortatur. Favet item in libro de adolescentis Æthiopis, qui post peractos exorcismos, scrutinia, catechismum, post acceptum cum Dominica Oratione Symbolum, adeoque & post competitum Sacramentum subito ex infirmitate obmutuerat, amiserat sensum, atque ita baptizatus obierat; in libro, inquam, de hujus adolescentis Baptismo favet sanctus Fulgentius, Ferrando Ecclesiæ Carthaginensis Diacono roganti, *Ergo salvus esset*, per propriam utique Contritionem & peractos in ipso laudatos ritus Sacramentales, *Si nec ad ipsam corporis tinctionem pervenisset*, respondens: *Ne quis dicat quod ille salvus esset, si nec ad ipsam tinctionem corporis pervenisset, cum utique non dicamus illum sine Baptimi Sacramento solâ confessione potuisse salvari. QUI ENIM CREDIDERIT ET BAPTIZATUS FUERIT, SALVUS ERIT*. Illum utique adolescentem, quia credidisse & confessum fuisse novimus, idè per Sacramentum Baptismatis salvum fuisse firmamus. Qui si non baptizaretur, non solum nesciens, sed etiam sciens, nullatenus salveretur. Via enim salutis suis in confessione, salus in Baptismate. Et in libro de fide ad Petrum scribit: *Firmissime tene, & nullatenus dubites, exceptis illis qui pro nomine Christi suo sanguine baptizantur, nullum hominem accepturum vitam aeternam, qui non hic à malis fuerit per fidem pœnitentiamq; conversus, & per Sacramentum fidei & pœnitentia, id est, Baptismum, liberatus*. Eandem sententiam tutatus est ille, de quo ad Hugonem de sancto Victore rescripsit sanctus Bernardus: *Scribis quemdam adserere, ex quo primum dictum à domino legitur, NISI QUIS RENATUS FUERIT EX AQUA ET SPIRITU SANCTO, NON INTRABIT IN REGNUM COELORUM, ex eo neminem absque eodem actualiter percepto Sacramento, vel eius vice martyrio, ullatenus potuisse salvari. Sed etsi forte illud quispiam cum vera fide & Contritione cordis expeteret, sed prævientis mortis articulo adsequi, quod cuperet, non valeret, tamen omnino damnari*. Doctor ille videtur fuisse Otto Episcopus Frisingensis, à quo notatum fuisse sanctum Bernardum, est suprà dictum. Ambo fuerunt Cisterciensis Ordinis

gran-

Cap. 8.

Cap. 30.

Epist. 77.



grandia luminaria, at non per omnia concordēs. Et videtur Otto Catechumenis aut Pœnitentibus, cum sola imperfecta Contritione sine actuali Sacramento morientibus, æternam salutem definitivè non negasse, sed uti de re incerta & intra Divinæ miserationis secretissimos thesauros occultata dumtaxat hæsitasse. Duram tamen à sancto Bernardo memoratam opinionem videntur omninò tenuisse nescio qui Doctores, quos in literis ad Cremonensem Episcopum, apud Gregorium nonum exstantibus, Innocentius tertius Pontifex reprehendit. L. 3 tit. 43. c. 2.

Ad nostram ergo, etiam sibi propositam à dicto Episcopo, quæstionem responder laudatus Innocentius affirmativè: *Presbyterum, quem sine unda Baptismatis extremum diem clausisse significasti, quia in sancta Matris Ecclesia fide, & Christi nominis confessione perseveravit, ab originali peccato solutum, & cœlestis patriæ gaudia esse adeptum adserimus incunctanter. Lege super octavo libro Augustinum de civitate Dei, ubi inter cætera legitur: BAPTISMUS INVISIBILITER MINISTRATUR, QUAM NON CONTEMPTUM RELIGIONIS, SED TERMINIS NECESSITATIS EXCLUDIT. Librum etiam sancti Ambrosii de obitu Valentiniiani, idem adserentis evolve. Sopitis igitur quæstionibus Doctorum, Patrum sententias teneas, & in Ecclesia tua iuges preces hostiasq; Deo offerri iubeas pro Presbytero memorato. Circa Augustini locum, qui non in libris de Dei civitate, sed in libris de Baptismo adversum Donatistas exstat, eruditissimus Pontifex fuit memoria lapsus. Ejus autem definitioni non solus Augustinus & Ambrosius adstipulantur, sed & sanctus Cyprianus, Jubajani Episcopi, Quid de hæreticis pœnitentibus, & sine Baptismo usque ad Agrippini Episcopatum in Ecclesiam admissis credendum esset, interrogationi respondens: Potens est Dominus misericordiâ suâ indulgentiam dare, & eos, qui simpliciter admissi in Ecclesia dormierunt, ab Ecclesia sua muneribus, non separare. Quod Responsum magis encomiis sanctus Augustinus in suis adversum Donatistas Scriptis frequenter exornat. Laudat & aliam sancti Cypriani doctrinam, quâ ex boni latronis, cui non baptizato dictum est, Hodie mecum eris in Paradiso, salute conclusit Baptismi vice aliquando suppleri à martyrio, & adjungit in laudatis de Baptismo libris: Quod etiam atque etiam considerans, invenio non tantum passionem pro nomine Christi id, quod ex Baptismo deerat, posse supplere, sed etiam fidem conversionemq; cordis, si forè ad celebrandum mysterium Baptismi in angustiis temporum succurri non potest. Latronem illum nequaquam Martyrem, sed dumtaxat Confessorem fuisse ostendit insigniter, & pergit: Sed tunc impletur invisibiliter, cum ministerium Baptismi non contemptum religionis, sed arti-*

Imperfecta Contritio sine actuali Sacramento justificat in articulo mortis.

L. 4. c. 21.

L. 4. c. 22.

*culum necessitatu excludit. Eadem Evangelica lex, quæ Contritionem & Baptismum sancit esse duas humanæ salutis necessarias concessas, per solum sine propria Contritione Baptismum dignatur salvare parvulos, & hanc exceptionem statuit in aliam legem. Hinc similem etiam miserationem impendi imperfectè contritis, & Sacramenti copiam non habentibus, moribundis adultis solidè Augustinus concludit. Amborum justificationem fieri dicit aliquid necessarium per singularem misericordiam complente Deo, atque ita esse privilegiatam, quasi irregularem, aut certè factam ex regula speciali. Quam omnem doctrinam in laudatis ad Hugonem Victorinum literis eximie illustrat & confirmat sanctus Bernardus.*

Epist. 77.

Cap. 79.

Cap. 2.

Cap. 15.

Cap. 35.

*Confirmat & quarta Synodus Carthaginensis: Pœnitentes, qui at-  
tente leges Pœnitentia exequuntur, si casu in itinere vel in mari mortui  
fuerint, ubi eis subveniri non possit, memoria eorum & orationibus & obla-  
tionibus commendentur. Et prima Valensis: Pro his, qui Pœnitentia accep-  
ta in bona vita cursu satisfactoriâ compunctione viventes, sine communione  
inopinato nonnumquam transitu in agnis aut itineribus praveniuntur, obla-  
tionem recipiendam, & eorum funera ac deinceps memoriam Ecclesiastico  
affectu prosequendam. Et secunda Aurelianensis: Oblationes defuncto-  
rum, qui in aliquo crimine fuerint interempti, recipi debere censemus, si  
tamen non ipsi sibi mortem probentur proprijs manibus intulisse. Quales  
Canones adduci possunt multi. Quod istud in substantia ipsum pro  
Catechumenis defunctis fieri possit, & rectè fiat, circa Valentianum  
secundum Imperatorem docuit S. Ambrosius verbo & exemplo. Ne-  
que adversatur prima Bracarenfis Synodus: Placuit ut Catechumenis si-  
ne Baptismi redemptione defunctis neque oblationis commemoratio, neque  
psallendi impendatur officium. Nam & hoc per ignorantiam usurpatum est.  
Nequaquam pro illis sacrificia aut alia Ecclesiæ suffragia vetat, sed  
dumtaxat ipsorum nomina, quod certum adversari antiquo Canoni,  
recitari. Neque id existimo factum à sancto Ambrosio. Nec item  
pro Presbytero non baptizato fieri jussu ab Innocentio tertio. Ete-  
nim etiam hodie ipsum non facit Ecclesia Romana. Alia est Cate-  
chumenorum causa, alia Pœnitentium. Hi quandoque obtulerunt,  
perceperunt Eucharistiam, & plenâ communionem fuere gavisi, idè-  
que tamquam in eadem per extremam in vitæ extremo Contritio-  
nem, & à Divina miseratione adjunctum deficientis Sacramenti sup-  
plementum restituti, possint facta ad recitatum ipsorum nomen obla-  
tione honorari; at verò Catechumeni morientes, licet eadem viâ  
justitiam acquirant, non acquirunt characterem Baptismalem, om-  
nium Sacramentorum januam, idè-que pro ipsis offerri non licet, seu  
ipso-*

ipforum nomen in sacrificio recitari. Quidquid sit, adducti Canones lucidè confirmant nostram hìc adsertionem.

Quarta quæstio est, An istud deficientis Sacramenti supplementum Divina miseratione per statam atque infallibilem legem faciat omni Contritioni imperfectæ, cunctisque Catechumenis ac Pœnitentibus, licèt tantùm imperfectè, contritus? Hæc est quæstio inter Ottonem Frisingensem Episcopum & sanctum Bernardum mota præsertim, cujus hic affirmativam partem tenuit, ille negativam. Nec aliud sensisse existimo S. Fulgentium, aut sanctum Gregorium Nyssenum. Agit enim hic adversùm morosos Baptismi ultra consuetum Catechumenatus terminum dilatores, & de ipforum dumtaxat, licèt converso ad Deum cordè Sacerdotem & Sacramentum moribundi inclament, salute se multùm dubitare dicit, ipsam eis disertè non abjudicat. Et quomodò sanctus Fulgentius, cujus tamen verba duriora fateor, possit à sancto Augustino discordare? Sanctus quippe Augustinus pro solis illis, quos non contemptus seu gravis neglectus, sed merà citra culpam necessitas Sacramento spoliât, in suprà adductis locis definit, adeòque de negligentibus, licèt in extremis negligentiam purgent, & ex animo ad Dominum clament, videri possit etiam ipse dubitasse. Sanè in literis ad Honoratum Thabennensem Episcopum docet hostilis incurfionis tempore, quo plurimi Contritione ad Deum conversi Regenerationem aut Reconciliationem, omnes consolationem solent exposcere, Sacerdotes ac alios Ecclesiæ Ministros non posse fugere, & adjungit causam: *Si Ministri desint, quantum exitium sequitur eos, qui de isto seculo vel non regenerati exeunt, vel ligati? Quantum est etiam luctus fidelium suorum, qui eos secum in vitam æternam requirunt non habebunt?* Eos à vita æterna non excludit, sed ad Divinæ miserationis incertum dumtaxat suspendit. Etiam in literis ad Theodorum Foro-Juliensem Episcopum scribit de infirmis Pœnitentiæ actionem & Reconciliationis gratiam simul poscentibus, & ante hujus perceptionem defunctis, sanctus Leo magnus: *Non necesse est nos eorum, qui sic obierint, moria affectus, discurrere, cum Dominus Deus noster, cuius iudicia nequeamus comprehendere, quod Sacerdotale ministerium implere non potuit, suæ Iustitiæ reservaverit, ita potestatem suam timeri volens, ut hic error omnibus prosit, & quod quibusdam tepidis aut negligentibus accidit, nemo non metuat. Multùm enim utile ac necessarium est, ut peccatorum reatus ante ultimum diem Sacerdotali supplicatione solvatur.* In Synodalibus item ad sanctum Cornelium Papam literis omnes Lapsos instante novâ persecutione reparandos & Reconciliandos censuit sanctus Cyprianus, addiditque causam: *Si qui relictis omnibus*

Effectus  
hic videtur  
non dari  
infallibilit-  
ter.

Epist. 180.

Epist. 91.

Epist. 54.

rebus suis fugerit, & in latebris atque solitudine constitutus in latrone: forsè incurteret, aut in febribus aut in languore decesseret, nonne nobis imputabitur, quod tam bonus miles, qui omnia sua dereliquit, & contemptâ domo, & parentibus, ac liberis, sequi Dominum maluit, sine pace & sine communicatione discessit? Acriter urget ejusmodi Confessores, licet insigni charitate contritos, mori cum damnationis periculo, ideòque eorum, qui forsàn perierint, animas à durioribus, Reconciliationis Sacramentum illis opportunè denegantibus, Episcopis in Divino Judicio requirendas. Neque refert quod in alijs ad Thibaritanam Ecclesiam literis adfirmet fugitivos illos Confessores, ac in fuga morientes, esse verè ac plenè Martyres: Loquitur enim de fugitivis integris, quibus Reconciliatione non sit opus. Quare videtur incerta esse hæc res, neque profundè nimis inquirenda. Omni curâ satagere nos oportet, ut neque sine necessario Sacramento ad Dominum abeamus ipsi, & nemo per nostram negligentiam abire cogatur.

Epist. 56.

Imperfecta  
Contritio  
in mortis  
articulo  
semper ju-  
stificat.  
Tom. 3.

Attamen apud Lucam Dacherium extat Theobaldi Stampensis, qui sub Paschali secundo Pontifice floruit, ad Lincolniensem Episcopum non inerudita Epistola, cujus hoc exordium: *Si quis predicat, & predicando temerè diffinat aliquem non posse salvari, quâcumque horâ manus suas Pœnitentia dederit, fallitur, nec catholicè sentit.* De consequenda per solam sine Sacramento in extremo vitæ spiritu Contritionem salute palàm agit, suamque adjectionem vult esse certam, & adeò universalem, ut adjungat: *Augustinus de Sodomitis in lacu submersis tractans dicit, quod quidam ex illis salvati sunt, per bonam compunctionem, & verum cordis gemitum, quia non solum superflua cogitationes, sed etiam prava actiones ante vim compunctionis fugiunt.* Verùm non meminimus istud in Augustino legisse. Multò interim Patrum testimonio omnia hæc confirmat Theobaldus, & concludit: *Patet quod quicumque bonam voluntatem habebit in terra, pacem indubitanter & gloriam consequetur in cælis. Amen.* Si qui hanc Epistolam improbare voluerit, & hos præfatos Doctores Catholicos recipere noluerit, lapide percutiatur, percussus comminuetur, comminutus in pulverem redigatur. Eamdem sententiam in opusculo de forma sacramentalis Absolutionis tradit Joannes Gerson, & in suprâ laudatis ad Cremonensem Episcopum literis Innocentius tertius Pontifex videtur supponere. Quidquid sit, pium hunc de Divina in nos peccatores clementia sensum passim omnes hodie tenemus.

## CAPUT IX.

*Discutitur doctrina Eminentissimi Domini Cardinalis  
Roberti Bellarmini.*

**D**ominus Cardinalis Robertus Bellarminus, Ecclesiasticæ non solum dignitatis, sed etiam eruditionis ac omnis scientiæ eminentissimo gradu illustrissimus, nostræ, quâ solam charitate perfectam contritionem sine suscepto actualiter Sacramento justificare dicimus infallibili extra Martyrij etiam aut extremæ necessitatis articulum lege, adsertioni plenè concordat, agens adversus Martinum Kemnitium, hominem Lutheranum, & nescio quem alium in Catholica Ecclesia Doctorem ante annos paucos, qui in libro, quem de charitate conscripsit, adversus communem sententiam docuit Catechumeni & Pœnitentibus, quamvis perfectè conversis, & charitate flagrantibus, non remitti peccata, sive reatum mortis æternæ, nisi cum vel Baptizantur, vel Reconciliantur ministerio Sacerdotum, nisi fortè in articulo mortis. Etiam nos improbamus Doctorem istum, ejusque dogma detestamur, atque idèd cum Domino Cardinali plenè convenimus. Quia tamen inter veram, flagrantem, & perfectam, seu inter natam, nutritam, adultam, robustam, & perfectam charitatem, varioque isto ejus gradu variè formatam Contritionem laudatus Antistes apertè & disertè non distinxit, sed ex quibusdam verbis videri possit confudisse, labendi quâsi ansam quibusdam præbuit, idèdque omninò opus est, ut ejus argumenta, quæ ad lapsum illum purgandum pondere & fundamento non penitus carent, adducam, enodem, aut potius exponam, ostendamque Dominum Cardinalem solis verbis, non sensu mihi adversari.

Exponitur  
sententia  
Cardinalis  
Bellarmini.

Ad productum ergo S. Augustini ex tertio decimo super sancti Joannis Evangelium tractatu locum respondet Dominus Cardinalis: *Dico Augustinum loqui de eis Catechumenis, qui negligunt ad Baptismum accedere. Tales enim, quantumvis proficiant, nunquam sunt verè iustificati, cum nec in re, nec in voto Sacramentum Baptismi habeant, nec verâ charitate flagrent. Vera enim charitas, & verum Baptismi votum non permittunt hominem esse negligentem, aut Baptismi contemptorem. Quare locum Augustini, QUANTUMCUMQUE CATECHUMENUS PROFICIAT, ADHUC SARCINAM INIQUITATIS SUAE PORTAT, NON EI DIMITTITUR, NISI CUM VENERIT AD BAPTISMUM, intellige de re aut ardenti & vero desiderio. Nam apud Deum animus pro facto reputatur. Quare idem Augustinus scribit latronem, qui cum Christo crucifixus fuit,*  
*non*

Exponitur  
Augustini  
locus ex  
13. tractatu  
super  
Joannem.  
Tom. 3.  
Centr. 4.  
l. 2. c. 14.



*non caruisse Baptismo, quia non eius accipiendi voluntas defuit, sed non accipiendi necessitas adfuit.*

Aug. l. 1. de  
orig. anim.  
c. 9.

Respondeo latronis illius, de quo nonnunquam præiudicium captatur, siue tentatur contra Baptismatis Sacramentum, Baptisma esse incertum: Variat non solus Augustinus, sed Patres passim omnes. Ut ut sit, non facit ad rem præsentem. Eius enim, qui in Dominum Crucis maledicto adfixum, & omni ludibrio expositum credidit, fidem mirè & meritò extulit semper omnis Ecclesia, credidit perfectam fuisse, idèòque aptam iustificare sine Sacramento. Deindè, Domini ad illum gratiosa vox, *Hodie mecum eris in Paradiso*, Sacramenti vicem possit omninò supplevisse. Præterea, necdum tunc erat constitutus ordo Ecclesiæ, idèòque nec Baptisma obligabat. Addo de Baptismi contemptoribus aut neglectoribus Augustinum nequaquam loqui: Loquitur enim de Catechumenis Divinà charitate flagrantibus, in operum iustitia insigniter proficientibus, & multos fideles præcedentibus, quorum iustitia iam superet Scribarum ac Phariseorum iustitiam, & cui ad capeffendum regnum cælorum desit solum Sacramentum. At verò in contemptore Baptismi, inquit in libro de unitate Ecclesiæ, *non potest esse iustitia*. Et in quæstionibus super Exodum: *Contemptor Sacramenti invisibiliter sanctificari nullo modo potest*. Nequit habere charitatem, aut veram Contritionem: Quod ei Sacramenti votum sit omninò pars essentialis. Longè minùs possit charitate flagrans esse, aut in operum iustitia fideles superare. Immo Augustinus loquitur etiam de Competentibus, quos novimus tamquam cervos ad sanctum Fontem anhelare. Et boni operis votum, non nisi dum facti deest facultas, pro facto reputatur. Notanda sunt Augustini verba, *Quantumcumque Catechumenus proficiat: Aiunt solam, quæ necdum perfecta sit, tendentem adhuc & proficientem charitatem sine actuali Sacramento passim non iustificare*.

Cap. 22.

Q. 84.

Exponitur  
Augustini  
locus ex  
libris de  
Baptismo.

Pergit Dominus Cardinalis de alijs sancti Augustini locis: *Ad secundum dico Catechumenum charitate flagrantem non carere remissione peccatorum. Quod autem desit illi Baptismi susceptio ad capeffendum regnum cælorum, non idè est quia non habeat remissionem peccatorum, sed quia tenetur Baptismum suscipere, nisi necessitate aliquà excludatur. Et si contempserit vel neglexerit accipere, reus est, & damnabitur, non quia nunquam habuerit remissionem peccatorum, sed quia Sacramentum contempsit, in cuius virtute & voto iustificatus erat. Ita Augustinus ibidem inquit: VERUMTAMEN CORNELIUS, SI ETIAM SPIRITU SANCTO ACCEPTO BAPTIZARI NOLUISSET, CONTEMPTITANTI SACRAMENTI REUS FIBRET. Respondeo Catechumeno peccatorum remissio-*  
nem



nem habenti nihil deesse ad capeſſendum Dei regnum. Sola enim peccata ſeparant inter hominem & Deum, & ab ejus regno excludunt. Proſiteor Baptiſma eſſe ab ipſo ſuſcipiendum, & ſine grandi crimine non poſſe negligi, longè minùs contemni; verùm antequam ita delinquat, & quamdiu charitate flagrat, quid ei, ſi peccatorum remiſſionem habeat, ad capeſſendum Dei regnum poſſit deeſſe? Aliquid tamen Baptiſmo acquirendum deeſſe adfirmat conſtanter ſanctus Auguſtinus: Utique remiſſionem peccatorum. Quare hæc Auguſtini verba, *Catechumenum charitate flagrantem*, rectiùs expoſuerunt noſtri olim Scholiaſtæ Lovaniennes: *Auguſtinus charitatem generalitèr accipit pro dilectione, quâ Deum tamquam omnium Juſtitia fontem, ſummumq; bonum diligimus, cuiuſmodi & ante juſtificationem requirit Concilium Tridentinum. Eandem tamen à charitate diſtinguens, ut qua ſit amicitia cum Deo, quâ eum puro corde in nobis iam habitantem, ut Patrem noſtrum, ſummumq; ac beatificum bonum diligimus. Hæc juſtorum tantum eſt & filiorum Dei, quoſq; iam tota Trinitas inhabitat. Non ergo ante juſtificationem reperiri poſteſt vel in Pœnitente, vel in Catechumeno, cui ad capeſſendum regnum cœlorum deſit adhuc peccatorum remiſſio, Abſolutione vel Baptiſmo conſerenda. Habitualement & actualem charitatem diſtinguunt, & hanc, licet flagret, dummodò adulta dumtaxat aut robusta, & nondum perfectâ ſit, adfirmant in Pœnitente aut Catechumeno eſſe ante & citra remiſſionem peccatorum.*

Ad l. 4. de  
Bapt. c. 22.

Ad adducta ſancti Auguſtini è Confeſſionum libris loca Dominus Cardinalis hæc ſcribit: *Ad locum ex Confeſſionibus dico, merito Auguſtinum ante Baptiſma nunquam fuiſſe ſecurum, quia non certò ſciebat ſe veram charitatem & Contritionem habere. Nec fecerat totum quod poterat ad remiſſionem peccatorum accipiendam. Cùm autem dicit, PECCATA MEA NONDUM REMISERAS, loquitur ſecundum ſuam conſcientiam: Ipſe enim ita exiſtimabat, nec poterat homo pius & humilis aliter exiſtimare. Non tamen propterea ſequitur id verum fuiſſe. Nam & plerique Sanctorum dicunt ſe maximos peccatores eſſe, & dignos gehennâ. Et licet mendaces non ſint, quia dicunt quod ſentiunt, falſum tamen ſine dubio dicunt. Reſpondeo Auguſtinum de vera ſua charitate & Contritione fuiſſe omninò certum. Adfirmat id ipſe in octavo Confeſſionum libro: Dicebam hæc, & flebam amariffimâ Contritione cordis mei. Et in ſequenti libro: Sagittaveras tu cor meum charitate tuâ. Et in libro de fide & operibus: An uſque adeo diſſimulamus à ſenſibus noſtris, ut vel nos ipſos non recordemur, quam fuerimus aſſenti atque ſolliciti, quid nobis præciperent à quibus catechizabamur, cùm Fontis illius Sacramenta peteremus, atq; ob id COMPETENTES etiam vocaremur? Et in ſoliloquiorum Catechuminatus*

Cap. 12.  
Cap. 2.  
Cap. 6.

L. I. c. II. tempore scriptis libris, illustratæ Divinitus rationi aienti, *Multum profecisti*, reponit: *Quamquam tibi respondere non posim, nunquam tamen mihi persuadebis, ut hâc affectione nientis, quâ nunc me esse sentio, nihil me profecisse arbuter.* De sua igitur vera in Deum charitate & Contritione erat certus ac securus, Quocirca dum peccata sua ante Baptismi susceptionem sibi necdum fuisse remissa scripsit postea Episcopus, nequaquam ex errante olim privata conscientia, sed ex communi totius Ecclesiæ sensu scripsit, ex quo & prædicavit: *Quantumcumque Catechumenus proficiat, adhuc sarcinam iniquitatis sue portat, non ei remittitur, nisi dum venerit ad Baptismum.* Et sanè fletus, cilicia, cineres, nudi pedes & cervices, substrationes, scrutinia, manus impositiones, & istiusmodi varia plurium annorum durissima paratura, quam uti necessariam peccatorum remissioni accipiendæ præparationem, & iustum tantæ mercis pretium exegit & à Catechumenis & à Pœnitentibus olim Ecclesiâ, lucidè evincunt, quod tantum donum ad quemvis imperfectę charitatis seu Contritionis actum dari ipsa non censuerit, adeoque & Augustini conscientia nunquam errarit. Hinc & suprà laudatam cum semetipsa pacem, quam esse effectum remissionis peccatorum definit sacrosancta Tridentina Synodus, illa non sensit, nisi post egressum è salutaribus aquis.

## CAPUT X.

*Examinantur alia Domini Cardinalis fundamenta.*

Epist. 91.  
c. 3.

**P**Almare Domini Cardinalis fundamentum sunt superiùs adducta, & alia plura similia Divinarum literarum testimonia, quæ ad converlum peccatorem adfirmant statim converti etiam Divinam misericordiam, & omnem veraciter pœnitentem ac diligentem rediligi mox à Domino Deo, adeoque & donari remissione peccatorum. Respondeo omnia ejusmodi loca exponi à sancto Leone magno in literis ad Theodorum Foro-Juliensem Episcopum: *His, qui in tempore necessitatis, & in periculi urgentis instantia, prasidium Pœnitentiæ & mox Reconciliationis implorant, nec satisfactio interdicenda est, ne Reconciliatio deneganda, quia misericordia Dei nec mensuras possumus ponere, nec tempora definire, apud quem nullas patitur venia moras vera conversio.* Nullas patitur veniæ moras, non ut ipsa per semetipsam statim consequatur remissionem peccatorum, sed ut in supremæ necessitatis gratiam mox vestiatur Sacramento, per quod ista remissio detur. Omnia, inquam, Divinarum Scripturarum, contritis & ad Deum diligendum conversis peccatoribus dandam mox peccatorum veniam

pro-

promittentium, adducta testimonia soli, si quidem imperfecta sit, Evangelicis novorum Sacramentorum vestibus adjunctæ charitati & Contritioni promittunt: Ea quippe sola est quemadmodum in novo Testamento oportet. Aliam expositionem in libro de gratia & libero arbitrio adversum Pelagianos; hocce Divino testimonio, *Si volueris conservabis mandata*, ad errorem suum abutentes, tradit sanctus Augustinus: Per Jesu Christi gratiam fit, *ut bona voluntas, quæ iam esse capit, augeatur, & tam magna fiat, ut possit implere Divina mandata quæ voluerit, cum plenè perfectèq; voluerit. Ad hoc enim valet, quod scriptum est, SI VOLUERIS CONSERVABIS MANDATA*, ut homo, qui voluerit & non potuerit, nondum se plenè velle cognoscat, & oret ut habeat tantam voluntatem, quanta sufficit ad implenda mandata. Certum est enim nos mandata servare si volumus, sed quia preparatur voluntas à Domino, ab illo petendum est, ut tantum velimus, quantum sufficit, & volendo faciamus. Sola robustissima ac plena voluntas est valida ad omnes Dei leges. Etenim montium translatio, & alia fidei per Dominum Jesum promissa charismata fieri non possunt, nisi ab ampla illa, quam in sæculi fine vix inveniendam idem Dominus prædixit. Ita & peccatorum remissio est fructus & effectus nudæ etiam charitatis & Contritionis; non cujuscumque, sed solius perfectæ: Imperfecta omnis, etiam adulta & robusta, eget adjutorio actualis Sacramenti. Solius nobilioris speciei dignitatem in totum genus transcribere est genus probatissimæ locutionis.

Laudatam sancti Leonis Epistolam, hæc præsertim ejus verba, *Nullas patitur venia moras vera conversio*, adducit etiam pro se Dominus Cardinalis. Respondeo antiquum, qui Pœnitentiæ pro gravibus peccatis actionem seu satisfactionem non unà cum data Absolutione imponi postea adimplendam, sed ante ipsam plenè expleri jussit, Ecclesiæ rigorem fuisse quoad moribundos mitigatū à tertio decimo Canone Nicæno, mandante nullum deinceps necessario, quod tribus antea peccatis fuerat usque tunc negatum in quibusdam Ecclesijs, postulatæ Recôciliationis viatico deinceps frustrari. Verum rigidiores quidam Episcopi mandari dixerunt de solis Pœnitentibus, qui sani maternam Ecclesiæ pietatem implorârunt, Pœnitentiam acceperant, & diligenter peregerant usque ad infirmitatis adventum, ideòque ad alios, quos solus mortis timor ad Dominum cõgerat, lapsos gratiam istam non posse extendi: Eis Pœnitentiæ actionem & Reconciliationis donum non posse simul impendi, sed quædam interstitia etiam ab his esse servanda. Fundabant se in sancto Cypriano, qui Pacem Lapsis moribundis dum dandam sanxit, sanxit de solis qui vivi Ecclesiæ fores ad

misericordiam pulsârant flentes, addens in Epistola ad Antonianum Episcopum de cæteris: *Non est dignum in morte accipere solatium, qui dum vixit, non cogitavit se moriturum.* Hanc duritiem improbat & proscribit sanctus Leo, dicens veræ, quæ etiam in taliter Pœnitentibus præsumi debet aut sperari, conversioni nullas à Deo optimo maximo fieri veniæ moras, non ut ipsa per semetipsam sine Sacramento accipiat veniam, sed ut satisfactionis & Reconciliationis, à quibus illam accipiat, Sacramento & adjutorio vestiatur. Vestimentum illud & adjutorium ait illi esse adeò necessarium, ut dum non per contemptum aut gravem negligentiam, sed per improvisam necessitatem adhiberi non potuerit, laudatæ conversionis fructus & successus sit nobis incertus, & Divino Judicio reservatus. Proinde sanctus Leopalam est nobiscum.

Etiâ totius Ecclesiæ consensum producit Dominus Cardinalis, & scribit: *In Ecclesia sæpè conceduntur à Pontificibus indulgentiæ habentibus Contritionem peccatorum suorum cum proposito Confessionis Sacramentalis suo tempore faciende. Et eadem indulgentiæ à fidelibus toto orbe libenter & cum gratiarum actione suscipiuntur. At certum est indulgentias hoc requirere, ut qui eas sumit iam sit in statu gratiæ, & liber à reatu mortis æternæ, & solum pro temporalibus pœnis satisfacere teneatur. Indulgentiæ enim à temporalibus pœnis homines liberant, si tamen prius ab æternæ reatu liberati fuerint. Quare universa Ecclesia credit per Contritionem cum voto confessionis à reatu peccati mortalis hominem liberari, atque in gratiam cum Deo redire.* Respondeo aliud esse indulgentiam, aliud ejus fructum seu effectum. Eam posse in statu peccati mortalis donari atque acceptari, nemo dubitavit unquam: Eam enim ante Reconciliationem passim dedit Ecclesia antiqua. Sacramentales satisfactiones uti passim ante Reconciliationem imposuit atque expleri jussit, ita quoque indulxit & relaxavit. Verùm tam expletionis quam relaxationis fructus seu effectus non nisi post remotum reatus seu peccati obicem in Reconciliatione, & per ipsam dato gratiæ statu sumebatur. Eodem modo fit etiam in laudatis per Dominum Cardinalem indulgentiis.

Dominus Cardinalis adducit etiam varia sancti Augustini loca, similia huic in quinto super sancti Joannis Apostoli literas tractatu: *Si quis in corde suo invenerit charitatem, securus fit quia iam transit à morte ad vitam, iam in dextera est.* Et adjungit: *At num in dextera esse dici potest, qui adhuc reus est gehenna, & filius iræ ac perditionis?* Adducit & alium ex laudato tractatu locum: *Dilectio sola discernis inter filios Dei & filios diaboli.* Et hæc omnino adludua est sancti Augustini doctrina.

Arina. Respondeo primum cum alijs similibus locum intelligendum & de perfecta charitate, & de imperfecta. Quod enim quævis etiam hæc, præsertim si adfectu sit super omnia, peccatorem reluscitet, vivere faciat, adeoque & à morte ad vitam transferat, super ex authenticis testimonijs ostendi. Transfert à morte, non quidem ad habituales remissionis peccatorum, tamen ad actuales fidei & boni operis vitam. Eadem, licet non sola, tamen per Sacramentum, quod Augustinus nequaquam excludit, adjuta, omnino transfert à sinistra ad dexteram. Possit tamen & solam perfectam charitatem sanctus Augustinus in istis verbis respicere: Quod enim perfectæ charitatis laudes & vires toti generi frequenter adscribat probatissimum Canonice etiam locutionis generis, dixi jam supra, & est manifestum. Alium à Domino Cardinali adductum locum exponit frequenter ac patenter ipse Augustinus, dicens Dei filios à diaboli filijs nec per Sacramenta, nec per Ecclesiasticas dignitates, nec per gratis data charismata, sed distingui per solam charitatem, quod nempe alia omnia sine hac sint inutilia, & non profint. Quocirca exinde non probes quamvis solam sine Sacramento charitatem iustificare, sed sine charitate neminem ab ullo iustificari Sacramento, quod hoc in Scripto præsertim nitor persuadere.

Pergit & urget Dominus Cardinalis: *Qui charitatem habet, legem implet, ut Augustinus ostendit ex verbis Apostoli, PLENITUDO LEGIS EST DILECTIO. At nemo rectè vivere, & legem implere potest, nisi regeneratus, & iustificatus, & filium Dei effectus, dicente Augustino: NON BENE VIVUNT HOMINES, NISI EFFECTI FILII DEI. Sequitur igitur, ut qui charitatem habent, liberi sint à peccato, quandoquidem sancti sint, & legem impleant, quod nemo potest, nisi à peccato iustificatus.* Respondeo hæc Apostoli verba, *Qui diligit, legem implevit, Plenitudo legis est dilectio*, esse non cujuscumque, sed solius, utpotè quæ sola totius legis adimplendæ vires habeat, perfectæ charitatis encomium. Etenim Divina, quam in hac vita à nobis completam oportet, lex est, *Post concupiscentias tuas non eas*, seu nulli cupiditati adsensum, adfixivum præsertim, præbeas: Quod lucet fieri non posse, nisi per perfectam charitatem, quæ sit patiens, fortis, benigna, non agat perperam, non cogitet malum, omnia sufferat, credat, speret, & quam neque mors, neque vita, nec ulla creaturæ dilectio possit à Christo Jesu separare. Quare omnino profiteor legem adimpleri, seu integrè observari non posse, nisi à regeneratis ac iustificatis. Quisquis enim legem adimplet, jam perfectam charitatem habet, adeoque est iustificatus. Verùm quod longè aliud sit legem adimplere, seu totius le-

gis adimplendæ viribus pollere, aliud rectè vivere, suprà abundè ostensum est, & res ipsa clamat. Petrus quippe Apostolus, licet viribus istis nondum instructus, usque ad ancillæ ostiariæ interrogacionem & metum rectè omninò vixit. Quin immò plurimi, quos nempe à tentationibus infirmâ suâ charitate fortioribus custodit Divina protectio, usque ad extremum spiritum rectè sine illis agunt, sanctè moriuntur, sæliciterque decedunt, licet non plenè puri, tamen purgandi, ad Dominum Deum & ejus regnum. Et de illis ait Augustinus in libris adversùs Julianum: Potest homo esse correctus, & rectè vivere, necdum tamen remissione peccatorum liberatus. Quosdam Catechumenos multis fidelibus vivere sanctiùs, apertè docet in nonagesimi Psalmi commentario, in quarto tractatu super sancti Joannis Evangelium, ac alijs in locis, & adjungit: Et tamen omnia peccata super illos sunt, & nisi venerint ad salutarem Baptismum, ubi peccata solvuntur, cum omni vitæ & morum excellentia sua non possint intrare in regnum cælorum. Quod nempe ista excellentia sit dumtaxat bona citra justam de gravibus lapsibus querelam vita, necdum totius legis adimpletio, seu perfectio charitatis. Et talis jam est filius Dei: Non per peccatorum remissionem, sed per actualis exordia charitatis. Varia apud antiquos Ecclesiæ Patres est Dei filiatio, variisque ipsius gradus: Nam & hæretici sunt illis filij Dei, sed rebelles.

Audiamus & ultimum Domini Cardinalis argumentum: Postremò opponimus id, quod etiam adversarius, suprà memoratus nescio quis Doctor Catholicus, admittit, in articulo mortis, si non adsit qui reconciliet Pœnitentem vel baptizet Catechumenum, posse eos per veram Contritionem cum desiderio Sacramentum percipiendi, non solum iustificari, sed etiam continuò ad æternam gloriam pervenire. At certè non est articulus mortis, qui homines iustificat, sed vera conversio & cordis contritio cum desiderio Sacramenti percipiendi. Articulus enim mortis à pravaricatione præcepti excusat, & facit ut non sit reus Sacramenti non percepti, qui idèd Sacramentum non habuit, quia noluit, sed quia non potuit. Ergo ubicumque eadem causa reperietur, id est, vera Contritio cum voto Sacramenti suscipiendi, idem etiam continuò sequetur effectus. Respondeo necessitatis articulum nec plenam esse nec partialem nostræ justificationis causam, sed esse occasionem seu rationem Divinæ dispensationis & gratiæ, quâ nostrum figmentum miseratus Deus optimus maximus legi suæ quasi derogat, suppleatque Sacramenti per necessitatem sine culpa nostra deficientis causam. Deus enim, uti providus familiaris Pater, in Evangelicis suis legibus non solet sine competentis causa dispensare. Egregia & omni laude dignissima est hæc



Domini Cardinalis Confessio: *Multa sunt obiectiones & graves adversum ea, quæ disputata sunt. Sunt omnino gravissimæ atque irrefragabiles; verum quæ per adductos variæ charitatis gradus, vires, seu species facillimè conciliantur. Gradus istos quisquis cum Augustino benè distinxerit, non potest nobiscum non sentire.*

## CAPUT XI.

*Elucidantur quadam per Dominum Cardinalem adducta loca sacrosancti Concilij Tridentini.*

**D**ominus Cardinalis adsertionem suam fundat etiam in tribus locis sacrosanctæ Synodi Tridentinæ. Primus est ex Sessionis sextæ capite quarto: *Concilium Tridentinum declarat post Evangelium promulgatum neminem iustificari sine Baptismo aut eius voto; quo loco admittit posse hominem per veram Pœnitentiam cum voto Baptismi Deo reconciliari, antequam Baptismum corpore recipiat.* Respondeo id omnino posse fieri, & actu fieri in casu martyrij, in extremæ necessitatis casu, in casu perfectæ charitatis, & in quibusdam etiam casibus charitatis imperfectæ. Extra istos dico votum non sufficere, sed actuali Baptismatis aut Reconciliationis Sacramento esse omnino opus. Actuale Sacramentum cunctis imperfectè contritis iudicatum olim semper fuit adeo necessarium, ut de laudata per sanctum Jacobum Apostolum, *Confitemini alterutrum peccata vestra*, Sacramentali oris Confessione scribat ad Lincolniensem Episcopum etiam Theobaldus Stampensis: *Hæc auctoritate, sicut quidam putant, non laudatur, quia hoc tantum sanè de valentibus & confiteri nolentibus intelligitur. Quia nimirum si aliquis pro aliqua infirmitate, sive etiam ab ipsa navitate confiteri ore impotens efficitur, cum bonam & discretam consistendi ore habeat voluntatem, si corde confiteatur, Discretorum iudicio prorsus alienus à salutē non iudicatur.* Notanda sunt verba, sicut quidam putant: *Agunt in illos, qui laudatam confessionem homini lapsio in quovis penitus eventu & statu censabant indispensabiliter necessariam, solosque naturalis impotentia aut extremæ necessitatis casus audet Theobaldus facere exemptos.* Et dat rationem ex sancto Hieronymo: *Quidquid vis, & non potes, Deum factum computat. Sicut enim deliberatio cum molimine vitiorum damnatur, sic quoque bona voluntas, cum deest copia agendi, remuneratur; quia non secundum hoc, quod quisque non potuit, vel non licuit, sed secundum hoc, quod fuit, & proposuit ex conscientia, accusatur vel defenditur, cum Deus iudicabit occulta hominum.* Hoc est, nequaquam semper, sed dumtaxat ubi faciendi copia deest, votum & voluntas

æ qui-

æquivalent factis. Et sacrosancta Tridēna Synodus dicens, *Sine Baptismo aut eius voto, nequaquam inducit Alternativam, aut locum facit electioni, sed defuit adversus Cajanam & Wicleffiticam à Martino Luthero resuscitatam hæresin, hunc præsertim ejus à Joanne Cochleæ memoratum articulum: Baptismus neminem iustificat, nec ulli prodest, sed fides in verbum promissionis, cui additur Baptismus.* Defuit ac firmat antiquam Ecclesiæ fidem, quæ actuale Baptisma in ordinarijs, ejus autem votum in extraordinarijs eventibus credidit semper & docuit esse Contritioni necessarium auxilium, & concausam ad impetrandam à Domino remissionem peccatorum.

A. 1521.

Aliter à Domino Cardinali adductus locus est in quartæ decimæ Sessionis quarto capite: *Concilium disertis verbis docet Contritionem charitate perfectam reconciliare hominem Deo, antequam Sacramentum Pœnitentiæ actu suscipiatur.* Respondeo locum hunc esse nostræ adsertionis palmare fundamentum, Istam enim sine actuali Sacramento reconciliandi virtutem nequaquam natæ, nutritæ, adultæ, aut robustæ, sed soli per charitatem perfectæ Contritioni adscribit Synodus disertis verbis, quos charitatis gradus seu species, earumque distinctionem quisquis non caller aut advertit in hac materia, non potest non cespitare, immò & labi. Et ex sola perfecta plenam & perfectam, ex quavis autem imperfectam, licet adultæ aut robustæ, charitate imperfectam dumtaxat Contritionem seu Attritionem nasci, quis non videat? Ipsa vocabula id clamant. Attritio enim carnale veteris aut lapsi hominis cor, regnantesque in illo adfixivas cupiditates dumtaxat atterit, frangit, ac vincit; Contritio conterit, redigit in nihilum, & exstinguit: Quod sine perfecta charitate fieri non posse novit omnis qui perfectæ charitatis ingenium & naturam novit. Porro nullam imperfectam Contritionem sine actuali Sacramento justificare definit disertis verbis Tridentina Synodus, ideòque definit nostram adsertionem.

Tertius à Domino Cardinali adductus locus est in tertie decimæ Sessionis capite septimo: *Concilium declarat ad præparationem Eucharistiæ confessionem sacramentalem esse necessariam ijs, qui conscientiam habent peccati lethali, & simul excipit eos, qui fortè Missam celebrare tenentur, nec habent Sacerdotem cui peccata sua confiteantur.* Eis enim Contritionem cum proposito confessionis ad Eucharistiam non indignè suscipiendam sufficere iudicavit. Itaque Concilium illud credidit per veram Contritionem, etiam ante Sacerdotis absolutionem, & citra mortis articulum, peccata remitti. Neque enim suspicari fas est, in illo casu Catholicum Concilium permissurum fuisse, ut cum conscientia peccati mortalis ad Sacra-

men-

*mentum Eucharistia accederetur.* Respondeo etiam locum istum patienter facere pro nobis. Istam quippe sine prævia Confessione & Absolutione celebrationem in solo illius, quâ curatus Sacerdos, Confessorem non habens ad manum, ex officio celebrare tenetur, necessitatis articulo permittit sacrosancta Synodus, in alio quovis eventu diserte ac severe vetat: *Quantumcumque se contritum homo existimet.* Quia nempe censeret à sola imperfecta Contritione passim non dari remissionem peccatorum. Eadem de causa curato Presbytero, qui ex dicta necessitate sine prævia Confessione & Absolutione celebravit, rigide mandat ut quamprimum confiteatur. Ut Confessarij occursum non expectet, sed illum quærat statim, & accedat. Optimo jure beatissimus Pater noster Alexander septimus per hosce dies damnavit duos hosce libertinæ moralis Theologiæ articulos: *Mandatum Tridentini, factum Sacerdoti sacrificanti ex necessitate cum peccato mortali, confitendi quam primum, est consilium, non preceptum.* Illa particula, QUAM PRIMUM, intelligitur, cum Sacerdos suo tempore confitebitur. In perpetua apud omnes sub cælo Ecclesias benedictione erit laudatus, & nunquam satis laudandus Pater noster Beatissimus, qui Evangelicam Christianæ vitæ, Ecclesiasticam præsertim, disciplinam ab injectis per libertina & sordidis hominibus placere gestientia ingenia pessimis maculis ac rugis insigniter purgare jam cœpit, & adhuc pergit. Sacrosancta, inquam, Synodus curato Sacerdoti ob dictam necessitatem sine prævia confessione & Absolutione celebrare permittit, non quia illum solâ suâ Contritione imperfectâ justificatum censeat, sed quod fidelem populum ob Pastoris sui culpam & defectum credat necessario sibi sacrificio non privandum. Divinam, quæ percipiendæ Eucharistiæ præviam peccatorum confessionem & Absolutionem requirit, legem censeret & sancit isto casu per epikeiam in fidelis populigratiam non obligare. Hinc addidit, ut ejusmodi Sacerdos statim confiteatur. Utique juxta antiquum Ecclesiæ Canonem, ex quo quæstioni huic, *Sipuellus Catechumenus, utpote septem annorum, vel homo etiam perfectus, dum fieret oblatio, opportunè adfuerit, ejusq; nescius particeps sit factus, quid debeat de eo fieri,* respondit Timotheus Patriarcha Alexandrinus: *Debet illuminari. A Deo enim vocatus est.* Eucharistiam enim adeo venerandam jubet Divina Jesu Christi Lex, ut necessaria per acceptam in Baptismo aut Reconciliatione peccatorum remissionem præparatio, dum ex casu vel caussis præmissa non fuerit, statim subjungatur. Et hinc illorum, qui Tridentinam de statim confitendo legem solis jam dictis Sacerdotibus, non autem alijs extra istam necessitatem sine prævia confessione

fessione & Absolutione, idèdque palàm indignè communicantibus imponi existimant, opinionem erroneam arbitror & minimè tutam. Hosce ad quam primùm confitendum existimo longè strictiùs obligari. Carent enim etiam fuco illo, ex quo Sacerdotes istos castigati per Beatissimū Patrem nostrum Alexandrum septimū Theologi voluerunt non obligari. Eos, quod legitimè & sine peccato celebrassent, dixerunt à sacrosancta Eucharistia iustificatos, ac peccatorum remissione donatos per accidens, idèdque in primam opportunitatem posse ab ipsis confessionem differri.

Eucharistia  
dat primā  
gratiam  
per acci-  
dens.

Hec enim est omninò ratio, ex qua Sacerdotes istos sine prævia confessione & Absolutione in dicta necessitate celebrare sacrosancta Synodus permisit. Eos nequaquam per suam imperfectam Contritionem, sed per sumendam Eucharistiam speravit in tali casu iustificandos. Quod enim vivorum Sacramenta, Eucharistia præsertim, legitimè quandoque sumantur à peccatoribus, & primam gratiam conferant per accidens, est antiquissima Theologia. Etenim Serapioni, civi Alexandrino, nuper in persecutione lapsō, Penitentiam & alia extrema Sacramenta rogatus mediā nocte Parochialis Presbyter, quod per infirmitatem lecto adfixus non posset accedere, Eucharistiam misit per puerum, mandans ut madefactam Serapioni in os infunderet: Quod & puer fecit. Atque ita Serapion est piè in Domino defunctus. De ipso enim ad Fabium Antiochiæ Patriarcham scribit apud Eusebium Cæsareensem Episcopum in Ecclesiastica historia sanctus Dyonisius Patriarcha Alexandrinus: *An non igitur satis constat Serapionem fuisse reservatum, & usque eo in vita mansisse, quoad esset penitus culpæ vinculum solutus, & ita labe, quæ erat idolis immolando adpersus, omninò deleta, posset pro multis bonis, quæ gessisset in vita, in numerum Confessorum referri.* Palàm adseverat eum per Eucharistiam sine prævia confessione & absolutione fuisse donatum remissione peccatorum. Et de sancto Maximiano Monacho, Syracusæ postmodum Episcopo, ejusque varijs socijs, Monachis & sæcularibus, quos inter haud dubiè quidam erant maculosi, in mari Adriatico horrendè periclitantibus, in Dialogorum libris scribit sanctus Gregorius magnus: *Tunc in eadem nave residentes sibimet pacem dederunt, Corpus & Sanguinem Redemptoris acceperunt, Deo se singuli commendantes, ut eorum animas, remissione peccatorum donatas benignè susciperet, quorum corpora in tam pavenda morte tradiderat.* Et ad quinquagesimum Canonem Trullanum scribit de nobis peregrinantibus Theodorus Balsamon: *Latini Azyma adfiduè in sinu ferentes, etiam si sint laici, ea non solum sibi ut Sacramenta impertiunt, sed etiam alijs.* Et antiquus adversum Græcos

Tracta-

Tractatus, repertus in Constantinopolitano Conventu Patrum Prædicatorum: Latini sanctam Eucharistiam negligentissime spectant. Nam qui castra sequuntur, in marsupio ponunt, portant in vestibus, in pileis. Eam ita portabant adversus mortis periculum, ut in Sacerdotis absentia ipsi sibi tunc darent, atque ita à Deo acciperent remissionem peccatorum. Notanda sunt Theodori Balsamonis verba, *Azyna ut Sacramenta impertiant*: Homo schismaticus spernit & damnat nostram in Azymo Eucharistiam, vultque non esse verum Sacramentum. Istam igitur antiquam Patrum Theologiam sequitur sacrosancta Tridentina Synodus, jam memoratum necessitatis articulum censet esse sufficientem, ut in fidelis populi gratiam curatus tunc Sacerdos sine prævia mortalium peccatorum Confessione & Absolutione celebret, ipsumque sperat Eucharistiâ tunc justificandum.

Verum unus ex hujus Decreti conditoribus Melchior Canus, ex sacro Prædicatorum Ordine Episcopus Canariensis, in eruditissimo de locis Theologicis opere rectè tradit omnia & singula generalium Synodorum Decreta non semper esse necessaria ac firma fidei dogmata, & pergit: In Concilio Tridentino, Sessione habita undecimo Octobris, anni millesimi quingentesimi quinquagesimi primi, de Eucharistia Sacramenta definitum est, Confessionem Sacramentalem Eucharistia præmittendam esse, si conscientia peccati mortali gravat. Et protinus, Si quis, ait Synodus, CONTRARIUM DOCERE, PRÆDICARE, VEL PERTINACITER ASSERERE, SEU ETIAM PUBLICè DISPUTANDO DEFENDERE PRÆSUMSERIT, EO IP SO EXCOMMUNICATUS EXISTAT. Sed hoc propit periculum cautum est. Erat enim opinio contraria perniciofa: Ideoq; excommunicatio illa ad publicam doctrinam vel maxime refertur. Nam quod sententia Caietani non fuerit pro hæreticâ condemnata, & nos testes sumus, qui Concilio interfuimus, & contextus ipse demonstrat. Habet enim Canon undecimus, idemq; postremus in hunc modum: Si quis dixerit solam fidem esse sufficientem præparationem ad sumendum sanctissimæ Eucharistiæ Sacramentum, ANATHEMA SIT. E vestigio autem adduntur, mutata dicendi forma, hæc verba: ET NE TANTUM SACRAMENTUM INDIGNE, ATQUE AD HO IN MORTEM ET CONDEMNATIONEM SUMATUR, STATUIT ATQUE DECLARAT IPSA SANCTA SYNODUS, ILLIS QUOS CONSCIENTIA PECCATI MORTALIS GRAVAT, QUANTUMCUMQUE ETIAM SE CONTRITOS EXISTIMENT, HABITA COPIA CONFESSORIS NECESSARIO PRÆMITTENDAM ESSE CONFESSIONEM SACRAMENTALEM. Si quis autem CONTRARIUM DOCERE, PRÆDICARE, VEL PERTINACITER ASSERERE, SEU ETIAM PUBLICè DISPUTANDO DEFENDERE PRÆSUMSERIT, EO IP SO EXCOMMUNICATUS EXISTAT. Vbi vides Caietani sen-

L. 5. c. 5.

*sentia Anathema non dici, sed quoniam non solum falsa, sed noxia etiam erat, reprobati, & propter periculum publicam præsertim prædicationem & disputationem interdicti.* Thomas de Vio, Cajetanus, & sacro. Prædicatorum Ordine sanctæ Romanæ Ecclesiæ ad sanctum Xixtum Presbyter Cardinalis, docuerat quavis verâ Dei super omnia charitate, & nata hinc Contritione justificari hominem, ideòque taliter contritum peccatorem sine prævia confessione & Absolutione posse & communicare & celebrare. Hanc sententiam, licet non uti hæreticam damnet, tamen uti falsam, noxiam, atque perniciosam reprobatur & proscribit sacrosancta Synodus, atque ita nostram adsertionem uti necessariam ac penitus veram manifestè confirmat. Nullum mortalis peccati reum vult deinceps sine prævia confessione & Absolutione communicare, nisi solum curatum, qui ex officio celebrare tenetur, & Confessoris copiam non habet, Sacerdotem: Non quod illum suâ tunc Contritione, sed sumptâ Eucharistiâ speret justificandum. *Dico, Speret:* Neque enim id definit, sed ex antiqua Patrum Theologia uti rem probatam, aut certè probabilissimam supponit. Quia tamen omnino certissima non sit, ejusmodi Sacerdoti rigidè mandat ut quam primum confiteatur. Palam ergo censer nos à quavis Contritione, & quovis Sacramenti voto non semper justificari.

## CAPUT XII.

*Exponitur serviliu gebennarum timor.*

Varia timoris species.

**P**etrus Lombardus, Petrus Pictaviensis, ac sanctus Thomas timorem dividunt in quatuor membra: In timorem mundanum, servilem, filialem, atque initiale. Sanctus Augustinus & seniores ejus discipuli proximè dividunt in duo dumtaxat membra: In timorem castum seu filialem, ac in servilem. Quidam addunt & mercenarium. Rectè verò laudati Doctores Scholastici servilem pœnæ, filialem timorem dicunt esse culpæ. *Timor serviliu*, inquit Petrus Pictaviensis, *est quando aliquis cessat à peccato tantum propter timorem gebennæ, & non propter amorem Dei. Filialis est quando homo cessat à peccato tantum propter amorem Dei.* Loquitur ex sancto Augustino in tractatibus super sancti Joannis Evangelium: *Est timor serviliu, est & castus. Est timor ne patiaris pœnam, est alius ne amittas iustitiam.* Timor ille, ne patiaris pœnam, serviliu est. Quid magnum est non timere pœnam? Hoc nequissimus servus, hoc & crudelissimus latro. Non est magnum timere pœnam, sed magnum est amare iustitiam. Qui ergo amat iustitiam, nihil timet? Timei planè: Non ne incidat pœnam, sed ne ne amittat iustitiam. Amat aliquis vestrum pecuniam; ex hoc ipso quod amat, intelligit quod di-

Quid servilis timor quid filialis.



*co. Timet damnum. Quare timet damnum? Quia pecuniam diligit. Quantum amat pecuniam, tantum timet ne perdat pecuniam. Ergo invenitur aliquis amator Iustitiae, qui plus in corde pertimescat damnum, qui plus extimeat spoliari Iustitia, quam tu pecunia. Hosce timores assidue penes culpam & poenam, uti penes objecta eorum materialia, distinguit, sed non penes ipsa sola. Distinguit etiam penes servilitatem, quam castus sanet & extinguat, servilis timor compescat solummodo & frænet, ideòque uti dolosum in sinu anguem permittat in cordis intimo latitare. Distinguit, inquam, penes sædum animum, quo quis à conspicuis peccatis ob adnexi illis mali pœnalis metum abstinet, malens tamen & optans non fore iustitiam, quæ peccata ista vetaret, aut certè puniret. Hunc animum meritò appellamus servilitatem: Est enim servilis mentis vilitas, quâ solent servi, non ex animo & bona voluntate, sed subdolè servire suis dominis & coacti, optantes sui juris esse, & non servire.*

Hic anguis omninò latet etiam sub timore gehennæ. Latet voluntas longè nequior, quâ mallet homo non esse vetitum quod sibi sentit esse libitum, ideòque Divinæ legis ac iustitiæ, quam apud hominum oculos observat, in cordis sui secreto est osor & inimicus. Eleganter hoc Augustinus docet in literis ad Anastasium: *Inaniter putat victorem se esse peccati, qui pœna timore non peccat. Quia etsi foris non impletur negotium mala cupiditatis, ipsa tamen mala cupiditas inius est hostis. Et quis coram Deo innocens invenitur, qui vult fieri quod vetatur, si subitabas quod timetur? Ac per hoc in ipsa voluntate reus est, qui vult facere quod non licet fieri, sed idèd non facit, quia impunè non potest fieri. Nam quantum in ipso est, mallet non esse iustitiam peccata prohibentem atque punientem. Et utique, si mallet non esse iustitiam, quis dubitaverit, quod eâ si posset, auferret? Ac per hoc quomodo iustus est talis iustitia inimicus, ut eâ, si potestas detur, auferat, ne comminantem vel iudicantem ferat? Inimicus ergo iustitia est, qui pœna timore non peccat; amicus autem erit, si eius amore non peccet. Tunc enim verè timebit peccare. Nam qui gehennas metuit, non peccare metuit, sed ardere. Ille autem peccare metuit, qui peccatum ipsum sicut gehennas odit. Et in sermonibus de verbis Apostoli: Hoc interest inter timorè tuum, & timorem latronis, quod latro timei leges hominum, & idèd facit latrocinium, quia se sperat fallere leges hominum; tu autem leges eius times, quem fallere non potes. Nam si fallere posses, quid non fecisses? Ergo & concupiscentiam tuam malam non amor tollit, sed timor premit. In nono super sancti Joannis Epistolam tractatu elucidat hæc per castæ & adulteræ uxoris exemplum: Non potest melius explicari, quid intersit inter duos istos timores, nisi penes duas mulieres maritatas, quarum unam ita con-*

Epist. 144.

Serm. 18.  
c. 6.

situas volentem facere adulterium, delectari nequitia, sed timere ne damnetur à marito. Timet maritum, sed quia adhuc amat nequitiam, idè timet maritum. Hinc non grata, sed morosa est mariti presentia. Et si forè vivit nequiter, timet maritum, ne veniat. Tales sunt, qui timent, ne veniat dies iudicii. Fac alteram amare maritum, debere illicastos amplexus, nullà se adulterij immunditià maculare: Optat viri presentiam. Et quomodò discernuntur isti timores? Timet illa, timet & illa: Interroga, quasi unum respondent. Ambæ enim rogatæ, An virum timeant, respondent se timere. Una vox est, sed diversus animus. Iam ergo interrogentur, Quare? Illa dicit, Timeo virum, ne veniat & damnet; illa dicit, Timeo virum, ne discedat. Casto animo altera pudicitia & viri offensam; altera lasciviam diligit, velit esse nullas pudicitia leges, viroque nullam vindicandi voluntatem aut potestatem: Licet forè castum corpus habeat, habet mentem adulteram atq; impuram. Ita & gehennarum serviliter fugax animus velit esse nullas virtutum leges, idèq; ne hujus, id est, ipsius Dei optimi maximi est occulus inimicus & odor. Quocirca Petrus Lombardus, sanctus Thomas, alijsque Doctores Scholastici, dum servilem ac filialem metum per poenam & culpam definiunt ac distinguunt, intelligi debent hoc sensu: Servilis est solius poenæ, filialis metus est etiam culpæ. Etenim & bonus filius poenas, etiam temporales, omninò timet, sed ex alio animi fonte. Utique ex charitate, quæ non solum Dominum Deum, sed & ab illo institutum in creatura, rationali præsertim, ordinem diligit, idèque ipsum etiam odit ac metuit, uti per peccata, ita & per poenas lædi aut turbari.

Quis sit  
metus va-  
nus, quis  
non vanus.

Timorem sanctus Augustinus etiam dividit in vanum & non vanum, utique ex Evangelico Domini verbo: Nolite timere eos, qui occidunt corpus, sed potius eum timete, qui potest & animam & corpus perdere in gehenna. At malorum temporalium, præsertim mortis, qui rectos in Paradiso Protoplastos à peccato deterruit, metum quomodò Dominus dixit esse vanum? Quod ea peccatricis nostræ voluntatis potestati subtrahatam timendo evitare non possimus, idèque vanè & inutiliter, casto studio & nullo fructu nos adversum illa muniamus, ac si abluamus æthiopem. At verò gehennas inviti non possumus incurrere, sed eas evadere est nostræ voluntatis opus, idèque noster de illis timor aut labor non est inanis. Earumdem metus est omninò utilis, temporalium verò malorum metum, quod ejus impulsu frequenter in lapsum agamur, noxium sanctus Augustinus passim appellat. Dico, Frequenter: Nam frequenter etiam ad bonum cogit. Quis enim ignoret per patibuli, Regijensis, Regiarum poenaliū legum, infamiae,  
de-

degradationis, aliorumque temporalium malorum metu frequenter homines à pessimis vijs non solum coërceri, sed & emendari? Æquivocum pro vario intentantis hominis sine effectum habent ista omnia: A Decio aut Diocetiano, Ecclesiam ad lapsum, à Constantino aut Theodosio intentata Arianos, Donatistas, & alios hæreticos cogeant ad surgendum & standum. Gehenna igitur, utpotè à Deo optimo maximo semper incussa, temporalia mala quandoque dumtaxat compellunt ad bonum. Et hanc doctrinam firmat sacrosancta Tridentina Synodus, dicens de metu gehennarum: *Catechumeni Divina Iustitia timore utiliter concutuntur. Et iterum: Per gehenna metum ad misericordiam Dei de peccatis dolendo confugimus, vel à peccando abstinemus.* Et de utroque timore simul: *Attritio ex gehenna, & poenarum, utique temporalium, metu concipitur.* Et de solo temporalium malorum metu: *Hoc timore utiliter concussus Nini vita, ad Iona predicationem Poenitentiam egerunt.* Eos solo temporalium malorum per Regem intentato metu fuisse concussos docet adfidue S. Augustinus. Et hic est germanus ac proprius fructus, quem per adjectos Decalogi terrores extortum carnalibus Judæis voluit olim Divina Majestas: Eos voluit concussos, atque ita ad ejus omnipotentem, sine qua legi adimplendæ se agnoscerent invalidos, misericordiam compelli & accelerare. Est magnus ille fructus, ex quo Apostolus legem ait fuisse nostrum, qui terroribus ad Christum Dominum & Justitiæ dilectionem cogeret, pædagogum.

Exhinc patet ad famosam quæstionem, An servilitas à timoris servilis substantia distinguatur ac separari possit, optimum esse Angelici Doctoris Responsum: Si servilitas esset de ratione timoris servilis, oporteret quod timor servilis esset simpliciter malus. Sed prædicta servilitas non pertinet ad speciem timoris servilis, sicut nec infirmitas ad speciem fidei informis, & ideo timor servilis secundum suam substantiam bonus est, sed servilitas eius est mala. Servilitas est sedus ille animi adfectus, quo quis in bono opere tenetur invitus, quo cupiditates suas vellet nec prohiberi nec puniri, quo omnia sibi libita vellet & licita. Est motus à timore non solum diversus, sed & adversus: Alter enim concupiscit & pugnat in alterum; alter alterum, licet non extinguat, compescit tamen & frænat. Quapropter servilitas à servili timore & separari omnino potest, & per charitatem plenè separatur. Quare rectè sanctus Thomas servilem timorem ait esse non dumtaxat utilem sed & substantià bonum. Loquitur cum sancto Augustino in enarratione Psalmorum: *Bonus est iste timor.* Et in sermonibus de verbis Apostoli docet gehennas nec vanè, nec malè timeri, & concludit: *Planè time, nihil melius times, nihil est quod magis timere debeas.* Et in

Sess. 6. c. 6.

Can. 8.

Sess. 14. c. 4

Psalm. 137.

Ser. 18. c. 8.

En.

Cap. 25.

Encheridio adfirmat hominem primum, in quo nullus fuit non re-  
ctus motus, à Deo sic muneratum fuisse libero arbitrio, ut tamen re-  
geretur imperio, ac tam primæ quam secundæ mortis exitio terrere-  
tur. Et hinc illum non solùm fide, spe, & charitate fuisse per pecca-  
tum, sed & gehennarum metu spoliatum scribit disertè sanctus  
Prosper in libro adversùs Collatorem. Attamen hic timor non fuit  
servilis, ideòque ejus bonitas non plenè juvat rem præsentem.

Exponitur  
timor ini-  
tialis.

Audienda hinc item sunt mens S. Thomæ & verba de timore initia-  
li: *Timor initialis ex eo dicitur, quod est initium. Sed cum & timor servilis  
& timor filialis sint aliquo modo initium sapientia, uterque potest aliquo  
modo dici initialis. Sed sic non accipitur initialis secundum quod distinguitur  
à timore servili & filiali, sed accipitur secundum quod competit statui inci-  
pientium, in quibus inchoatur quidam timor per inchoationem charitatis.  
Non tamen inest eis timor filialis perfectè, quia nondum pervenerunt ad  
perfectionem charitatis. Et ideò timor initialis hoc modo se habet ad filia-  
lem, sicut caritas perfectà ad imperfectam. Caritas autem perfectà &  
imperfecta non differunt secundum essentiam, sed solùm secundum statum.  
Et ideò dicendum est, quod etiam timor initialis, prout hic sumitur, non  
differt secundum essentiam à timore filiali. Compendiosius exponit Pe-  
trus Pictaviensis: Initialis timor est, quando homo cessat à peccato partim  
virtutis amore, partim formidine pænæ. Est ergo quid ex servili ac filiali  
mixtum: Est servilis, qui charitatem imperfectam, unàque ab  
illa inseparabilem, & adæquatè semper commensuratum filialem ti-  
morem introduxit. Est timor per introductam sapientiam seu chari-  
tatem à servilitate purgatus. Hoc locutionis genus in Christianas  
scholas introduxit Petrus Lombardus: Ante ipsum nemo istam ex  
duplici timore mixturam videtur vocasse timorem initialem.*

L. 3 c. 17.

## CAPUT XIII.

*Exponitur varia utilitas timoris servilis.*

Sess. 6.  
Can. 8.  
Serm. 18.  
c. 8.  
Gehennæ  
timor co-  
ercent à  
peccatis  
externis.  
Cap. 8. g.

**P**rimam servilis timoris utilitatem jam audivimus à sacrosancta  
Tridentina Synodo: *Per gehennæ metum à peccando abstinemus. A  
peccatis externis. Timor iste, inquit in sermonibus de Apostoli verbis  
sanctus Augustinus, quo gehennam times, & ideò mala non facis, continet  
te, & sic volentem peccare animum interiore non finit. Est enim quidam  
custos timor, quasi pedagógus legis, qui debet puerum non dumtaxat  
ad magistrum ducere, sed & ejus carnalem animum ab adimplendis  
cupiditatibus cohibere. Latius hæc elucidat in eodém sermone:  
Et latro timet malum, & ubi non potest, non facit, & tamen latro est. Deus*

gor interrogat, non manum. Lupus venit ad ovile ovium, quatit invadere, iugulare, devorare. Vigilant Pastores, latrant canes, nihil poterit, nihil aufert, non occidit, sed tamen lupus venit, lupus redit. Nunquid quia ovem non tulit, idcirco lupus venit, & ovem redit? Lupus venit fremens, lupus redit tremens, lupus est tamen & fremens & tremens. Eandem ad formam in quinto decimo sermone utitur exemplo leonis. Gehennarum metum dicit esse catenas, catarractas, ferreos compedes, quibus pravae, Regum praesertim ac Magnatum humanas leges aut vindictas non metuentium, cupiditates intra cordis claustra, tamquam intra suas caveas aut fossas lupi, leones, tumultuantes aquae coercentur. *Pannatum timor*, inquit eleganter in libris de vita contemplativa Julianus Pomerius, peccare volentes deterret à malo, & invitos tenet in bono.

Cap. 6.

L. 3. c. 32.

Altera servilis timoris utilitas est, quod non solum externa peccata, sed & inveteratas etiam, sub quibus tamquam sub grandi lapide homo sepultus jacet & sceter, ipsorum consuetudines auferat ac eradicet. Etenim de temporalium malorum timore scribit ad Vincentium Rogatistarum Cartennensem in Mauritania Episcopum sanctus Augustinus: *Homines salubriter excutit, ut tamquam de somno lethargico emergant, & in salutem evigilent.* Per eum dicit plurimos Donatistas ab inveterata & quasi incorrigibilis acinorosi schismatis pertinacia evigilasse, & vivos ad Matrem Ecclesiam rediisse. Gehennarum timor est longè validior. Est quasi Domini clamor ad quadriuanum Lazarum: *Veni foras.* Hoc clamore non solum mortuos, sed & sepultos excitari scribit idem Augustinus in sermonibus de verbis Domini, etiam sese à pessima ac veternosa ad singula verba jurandi consuetudine resurrexisse adfirmat in sermonibus de verbis Apostoli, & adjungit modum: *Ex quo Deo servire capimus, & quantum malum sit in proximo vidimus, timuimus vehementer, & veternosissimam consuetudinem timore franavimus. Franata restringitur, restricta languescit, languescens moritur, & mala consuetudini bona succedit.* Quomodo ex nimio immaturarum uvarum esu quassati, & ad manducandum panem stupefacti dentes, reparantur pedetentim & reformantur per solam à dictis uvis abstinentiam, ita & ex nimio cupiditatum usu ad iustitiam, veram suam escam, diligendam enervatus animus, per solam à peccatis externis abstinentiam pedetentim revigoratur. Amplè hanc similitudinem in Psalmorum commentario Augustinus exponit.

Gehennae timor auferit malas consuetudines.

Epist. 48.

Serm. 28. c. 12.

Ser. 28. c. 9.

Ps. 42. c. 1.

Tertia servilis timoris utilitas est, quod sit necessitas cogens ad bonum, de qua adagium populare: *Oportet de necessitate facere virtutem.* Exponit eleganter in libris de vita contemplativa Julianus Po-

Et cogit ad bonam voluntatē.

L.3.c.7.

merius: Licet voluntate impudicus sit qui necessitate pudicus est, tamen si & ille, quem timor in bono pudicitia tenet, vivere pudicè consuescat, in virtutem plerumque de necessitate proficit, & paulatim ipsius pudicitia delectatione crescente pudicè veraciter fit, & ita proficit, ut iam non sermone, sed virtute sordes impudicitia detestans, non timore pœna carnalibus incentivis obsistat, quod est incipientium proprium, sed execratione peccati contempnat inquietos carnis affectus, quod est castitatis consummata fastigium.

L.2.c.17.

Gehennæ metum esse non minùs, quam Evangelici verbi prædicationem, cui Deus non rarò donet germanæ iustitiæ incrementum, Divinæ legis in mente nostra plantationem ac rigationem, in libris de vocatione gentium sanctus Prosper demonstrat. Est validissima illa iustitiæ plantatio, quam laudat in Evangelio Dominus: *Compelle intrare*. Ejus modum in libris adversùs Petilianum, pœnalem legum, quibus Donatistæ ad Ecclesiam cogebantur à Romanis Imperatoribus, pessimum osorem, insigniter exponit sanctus Augustinus, aiens per laudatas leges ac pœnas admoneri hominem, *Ut cogitet quare patiat*

L.1.c.84.

*ut si pro iniustitia se pati perspexeris, id ipsum bonum eligat pro iniustitia talia sustinere; si autem videris iniquitatem esse, pro qua patitur, se infructuosissime laborare atque cruciari considerans, mutet in melius voluntatem, simulq; careat & molestiâ sterili, & ipsâ iniquitate*. Quod istam voluntatis mutationem extorqueat longè potentiùs etiã gehennæ timor, docet in innumeris locis. *Facit*, inquit in libris ad Pollentium, *ut quod erat necessitate caput, fiat charitate perfectum*. Et hæ sunt utilitates & fructus, ob quos timorem esse sapientiæ seu charitatis, quam quasi sera filum introducit, initium adfirmat Regius Propheta,

L.9.c.19.

Adjuvat  
imperfectâ  
charitatem.

Porro sicuti prædicatio iustitiam non solùm plantat, sed & plantatam rigat, ita etiã timor: Introductæ à se atque initiatæ sapientiæ seu charitatis infirmitatem adversùs tentationes illâ fortiores roborat, à lapsu custodit, ad eandem superandas adjuvat, facitq; victtricem. Et hæc est quarta ejus utilitas, quam in Confessionum libris laudat sanctus Augustinus, de semetipso quibusdam adhuc cupiditatum reliquijs ligato dicens ad Dominum: *Tenebar, & instabas tu Domine in oculis meis severâ misericordiâ flagella ingeminans timoris & pudoris, ne rursus cessarem, & non abrumperetur id ipsum exiguum & tenue quod remanserat, & revalesceret iterum, & me robustius alligaret*. Et in secunda super Psalmum sexagesimum secundum concione scribit de quibusdam infirmæ adhuc charitatis Martyribus: *Maiore timore minorâ contemnimus. Quis non bibat tribulationis temporalis poculum, metuens ignem gehennarum?* Ad martyrium passim robusta, quâ saltem patienter mortem acceptemus, charitas requiritur, certumq; etiã

L.8.c.11.



est & cum adulta, immò & cum nutrita aut nata dumtaxat charitate quosdam ad gloriam istam pervenisse. Modum Augustinus exponit in commentario Psalmi vigesimi tertij: *Quomodo si videas avem iam cadere in muscipulam, faciù maiorem strepitum, & volat de muscipula. Sic & Martyrum iam fortè aliqui intdebant collum in dulcedinem huius vite: Dominus, qui erat in illis, fecit strepitum gehennarum, & erutus est passer de muscipula venantium.* Per Domini clamorem: *Nolite timere eos, qui occidunt corpus, sed potiùs timete eum, qui potest & animam & corpus perdere in gehennam.* Gehennarum timor non est invalidior vanæ gloriæ cupiditate, per quam acceptari & superari posse crudelissima etiam tormenta ac mortem, & martyrij, licet non veritatem, certè fucum consummari, plura nos Hæreticorum & Schismaticorum exempla docuerunt. Quæ omnia eleganti compendio in monasticarum institutionum libris complectitur Joannes Cassianus: *Principium nostræ salutis, eiusdemq; custodia, timor Domini est.* Per hunc enim & initium conversionis, & vitiorum purgatio, & virtutum custodia his, qui imbuuntur ad viam perfectionis. Hinc custos iste hominem non deserit, Quousque perveniat ad talem animum, ut plus amet Dominum, quam timeat gehennam, ut etiam si dicat ei Deus, *utere delicijs carnalibus sempiternis, & quantum potes pecca, nec morieris, nec in gehennam mitteris, sed mecum tantummodo non eris, exhorrescat, & omninò non peccet, non iam ut in illud, quod timebat, non incidat, sed ne illum, quem amat, offendas.* Hoc est, donec in illo fiat charitas perfecta, à qua sola timorem uti superfluum pelli sanctus Joannes Apostolus adfirmat.

L. 4 c. 39.

Aug. l. de  
Catechis.  
rudib. c. 17

## CAPT XIV.

Exponitur varia imperfectio servilis timoris.

**S**ervilem gehennarum metum de imperfectione frequenter notat sanctus Augustinus. In sermonibus de verbis Apostoli: *Cum idè adulter non effecaperis, quia times ardere in igne sempiterno, nondum laudandus es. Non quidem ita dolendus ut ante, sed tamen necdum laudandus. Quid magnum est timere pœnam? Magnum est amare iustitiam.* Et in alio sermone: *Si timore gehenna non faciù malum, nondum es perfectus. Est quidem in te fides: Gaudeo fidei tuæ, sed adhuc timeo malitia tuæ. Utique malitiæ servilitatis. Habet timor iste imperfectiones varias.* Primam laudatus Augustinus adsignat in eisdem sermonibus: *Qui adhuc idè benè agit, quia pœnam timet, Deum non amat, necdum est inter filios.* Et in alio sermone: *Si timore gehenna non faciù malum, non amore iustitia faciù bonum.* Et in sermonibus de tempore: *Ille timor, quem charitas*

Servilis timor est imperfectus.  
Serm. 18.  
c. 7. 9.  
Ser. 19 c. 9.  
Oritur ex amore sui.  
Serm. 13.  
c. 13.  
Serm. 19.  
c. 19.  
Serm. 214.  
c. 3.

foras mittit, propterea pungit animam, ne amittatur aliquid quod in creatura diligitur, vel ipsa salus & requies corporalis, aut aliquid tale post mortem. Propterea enim & apud inferos timentur pœna, & dolores, & tormenta gehennarum. Prima, inquam, hujus timoris imperfectio est imperfectio seu vitium radices: Oritur enim, non ex casto Dei seu justitiæ, sed ex mercenario amore sui ipsius, quo homo sibi ipsi bene vult esse, non solum in hac vita, sed etiam in futura. Porro sui ipsius amorem, quo homo non in Deo, sed in seipso seipsum diligit, esse fontem impurum, & omnis distorti adfectus primam radicem, est unum è fundamentis doctrinæ Catholicæ & Augustinianæ.

Cap. 69.  
Dei legem  
non facit  
levem.

Alteram timoris imperfectionem producit in libro de natura & gratia sanctus Augustinus, hanc Domini, *Iugum meum suave est, & onus meum leve*, & hanc Regij Prophetæ, *Propter verba labiorum tuorum ego custodivi vias duras*, de Divinis mandatis quasi invicem adversantes voces exponens & concordans: *Utrumque verum est; dura sunt Domini leges seu viæ timori, leves amoris*. Amor meus, pondus meum; illo feror, quocumque feror, etiam per asperrima atque durissima, & quidem sine labore, immò cum voluptate. Plenæ enim, quam amor donat, vel potius quæ est amor, voluntati nihil est difficile; at verò timor, quia originalem nostram, cui soli, non autem naturæ rectæ, Divina lex est onerosa, infirmitatem non tollit, sed invitam compellit ad ejus gustodiam, laborem habet & difficultatem durissimam: Nihil durius aut difficilius opere, quod facis compulsâ & renitente voluntate. Et hanc timoris imperfectionem non soli Patres inculcant frequentissimè, sed & ipse sanctus Joannes Apostolus: *Timor tormentum habet*.

Timor non  
adimplet  
legem,  
Cap. 33.  
Cap. 14.

Tertia imperfectio est, quod per servilem timorem Divina lex non plene adimpleatur. Lucidè id Augustinus tradit in libro de fide & operibus: *Lex non timore pœna, sed amore iustitia completur*. Et in libro de spiritu & litera: *Mandatum si fit timore pœna, non amore iustitia, serviliter fit, non liberaliter, & idè non fit*. Non enim fructus est bonus, qui de radice charitatis non surgit. Et in Encheridion: *Quod ita fit timore pœna, vel aliquâ intentione carnali, ut non referatur ad illam charitatem, quam diffundit Spiritus sanctus in cordibus nostris, nondum fit quemadmodum fieri oportet, quantumvis fieri videatur*. Et apud sancti Prosperi sententias: *Quantum ad opera attinet, quæ forinsecus aguntur, & qui timet pœnam, & qui amat iustitiam, non facit contra mandatum, & idèd pares quidem sunt manu, sed dispares corde. Similes actione, dissimiles voluntate*. Et in quæstionibus supra Deuteronomium: *Si forinsecus ea, quæ Deus iubet, manibus fiunt, corde non fiunt, nemo est tam insulsus qui pra-*

Cap. 123.

Cap. 143.

Q. 54.

*praecepta arbitretur impleri.* Deus enim optimus maximus non solo corpore, sed & corde, utique casto supremi atque incommutabilis recti, quod ipse est, amore fieri mandat suae legis opus; fieri mandat liberaliter, filialiter, promptâ & spontaneâ voluntate. At verò qui ex timore facit, facit voluntate invitâ & aversâ, cor ejus non est rectum cum Deo, est ex illis de quibus Regius Propheta: *Non custodierunt testamentum Domini, & in lege eius noluerunt ambulare.* Non dicit, *Non ambulârunt*, sed, *Noluerunt ambulare.* Supponit ambulasse, & tamen adjungit ambulare noluisse. Rationem dat in Psalmi istius commentario sanctus Augustinus: *Poteras putari lex operum quasi sufficere ad iustificationem, cum ea, quae praeipiuntur, forinsecus sunt ab eis hominibus, qui mallet non praecepta quae non ex corde faciunt, & tamen faciunt, & per hoc quasi videntur ambulare in lege Dei, sed nolunt ambulare. Non enim ex corde faciunt. Ex corde enim nullo modo fieri potest, quod sit formidine penae, non amore iustitiae.* Eos esse dicit pravam illam generationem, quae quidem externa opera, sed *cor suum non direxit*; quae dimidiatum dumtaxat legis opus fecit, ideòque ipsam non complevit. Et ex isto commentario laudatam suam sententiam, paucis mutatis verbis, sanctus Prosper desumpsit.

Psal. 77.

Quarta istius timoris imperfectio est, quod adjunctam sibi servilitatem, seu latentem in corde cupiditatem & peccandi adfectum non exstinguat & sanet, sed compescat solummodò & frænēt. Tradit hoc sanctus Augustinus in literis ad Anastasium: *Inaniter putat victorem se esse peccati, qui poena timore non peccat, quia etsi foris non impletur negotium mala cupiditatis, ipsa tamen mala cupiditas intus est hostis.* Et quis coram Deo innocens invenitur, qui vult facere quod veratur, si subrahatur quod timetur? Ac per hoc in ipsa voluntate reus est, qui vult facere quod non licet fieri, sed idè non facit quia impune non potest fieri. Et in libro de natura & gratia: *Sub lege est qui timore supplicij, non amore iustitiae se sentit abstinere ab opere peccati, nondum liber nec alienus à voluntate peccandi.* In ipsa enim voluntate reus, quàm mallet, si fieri posset, non esse quod timeat, ut liberè faciat quod occultè delectatur. Quod gehennarum metus solam manum & alia membra compescat, non cor à pravis cupiditatibus expurget, sed ipsas intra illius claustrum dumtaxat liget, est suprà abundè ostensum. Quod desideria ista solo Dei amore exstinguantur, est etiam constantissima sancti Augustini doctrina. Etenim scribit in libro contra legis & Prophetarum Adversarium: *Desiderium peccandi non exstinguitur, nisi contrario desiderio rectè faciendi, ubi fides per dilectionem operatur.* Et in libro de gratia Christi: *Lex prohibendo auges peccati cupiditatem, nisi diffundat Spiritus charitatem.* Et in libro de spi-

timor non  
excludit  
peccandi  
voluntatē.  
Epist. 144.

Cap 57.

Fam ex-  
stinguit so-  
lus Dei  
amor.  
L. 2. c. 7.  
Cap. 6.

- Cap. 4. ritu & litera: *Vbi sanctus non adiuvat spiritus, inspirans pro concupiscentia mala concupiscentiam bonam, hoc est, charitatem diffundens in cordibus nostris, profecto lex, quamvis bona, auget peccandi desiderium.* Et in Encheridio: *Regnat carnalis cupiditas, ubi non est Dei charitas.* Et in literis ad Horontianum Episcopum sanctus Ambrosius: *Charitas peccandi excludit affectum.* Vocem, *Sola*, licet non exprimat, certum & clarum est à sancto Doctore omnino subaudiri. Laudatam à Regio Propheta legem, *Lex Domini immaculata convertens animas*, esse charitatem adfirmat in literis ad fratres Carthusienses sanctus Bernardus, & adiungit: *Quod sola videlicet sit, qua ab amore sui & mundi avertere possit animam, & in Deum dirigere.* Nec timor quippe, nec amor privatus convertit animam. Mutant interdum vultum, seu actum externum, affectum nunquam. Veritatem istam insigniter & copiose demonstrat.
- S. Augustini locus in speciem contrarius. Serm. 15. c. 6. Obstat videtur in sermonibus de Apostoli verbis sanctus Augustinus, de homine sub lege posito, seu per legis timorem bene agente, scribens: *Non furatur, non adulterat, non dicit falsum testimonium, non facit homicidium, non concupiscit rem proximi. Potest hoc, potest fortassis. Unde? Timore pœna.* Lucidè dicit nos per gehennæ timorem, non solum ab externo opere, sed & ab interna peccati concupiscentia liberari. Etiam in tractatibus super sancti Joannis Epistolam ait: *Homo timendo corrigit se, vigilat adversum hostes suos, id est, adversus peccata sua. Incipit reviviscere interiùs, & mortificare membra sua, qua sunt super terram.* Quid est interiùs reviviscere, nisi non concupiscere? Contonatur in libris de vita contemplativa insignis beati Augustini Discipulus, Julianus Pomerius: *Ad pœnam, qua peccanti debetur, mens, antequam peccet, adspiciat, & nobilem peccati obleat, nec ad peccandum ulla delectatio corporalis inclinatur.* Si eo tempore, quo quis peccare deliberat, sanâ mente consideret, qua pœna expectet in suis facinoribus ac flagitijs deprehensus, nescio an possit quibuscumque vitijs accommodare consensum. Palàm adseverare videtur per gehennæ metum evacuari internam peccati delectationem & consensum.
- Exponitur. Respondeo in primo sancti Augustini loco producendum esse totum contextum. Sequitur enim: *Quamquam qui timore pœna concupiscit, puto quia concupiscit.* Quid est, *Non concupiscit*, &, *Puto quia concupiscit*? Distinguenda est duplex peccati cupiditas. Alia patens, & posita quasi in cordis superficie; alia latens, & in cordis profundo ac intimo recessu occultata. Patens cupiditas est mentis imperium seu Decretum, quo quis consentit & statuit furari, mæchari, in pravis cogitationibus aut operibus volutari. Et hæc cupiditas per servilem timorem, non solum in hominibus, sed etiam in lupis ac leonibus,

omniñò evacuat. Per huiusmodi metum quodvis animal ab externo opere abstinere, ideòque & ab imperio seu Decreto in ipsum prorumpendi. At verò latens peccati cupiditas est intima & secreta mentis præparatio, quâ homo servili gehennarum metu frænatus mallet esse licitum, quod dolet vetitum, quâ velit non esse legem peccata prohibentem aut certè punientem, quâ optet non esse gehennas, quibus à cupiditatum suarum sequelâ & adimplerione retardetur. Et hæc est cupiditas, quam Patres assidue dicunt per solam charitatem evacuari. Lucet ex pluribus huc usque adductis sancti Augustini locis, Homo timore actus dividitur in duas invicem pugnantes voluntates: Alteram à metu extortam, quâ decernit agere, & agit quidquid agit; alteram metu priorem, & ab ipso superveniente frænata & compressam, quâ mallet aliud agere, si posset impunè. Et hinc ex metu factum est ex voluntario & involuntario mixtum, absolutè tamen voluntarium, quia extorta per metum voluntas est validior, aliamque sibi adversam compescit, ligat, ac in intimo cordis penetrali cogit latitare & silere. Et hinc eleganter dicit Augustinus: *Qui timore pœnæ non concupiscit, puto quia concupiscit.* Non concupiscit patenter, latenter verò concupiscit. Alter Augustini locus expositione non eget. Etenim homo per servilem metum incipit intus reviviscere, quomodo incipit sapere: *Quia nempe initium, extrinsecum tamen, sapientia est timor Domini.* Eosdem in sensus est Julianus Pomerius exponendus.

Et hinc oritur quæstio, An latens ista cupiditas sit ex genere suo peccatum mortale? Rationem dubitandi præbet in libro de spiritu & litera sanctus Augustinus, inter venialia fidelium peccata ponens etiam hoc: *Si quis in ipso corde aliquid ita cogitet, ut mallet licitum quod male delectat, & per Præceptum scitur illicitum.* Etiam ista quippe consensio ad peccatum est, quæ utique fieret, nisi pœna terreret. Respondeo tamen affirmativè. Disertis verbis id tradit in Apostolicæ ad Romanos Epistolæ commentario sanctus Joannes Chrysostomus: *Tam miserè animati, adfecti sumus, ut nisi gehenna timor esset, ne propositum quidem nobis sit bono aliquo opere desungi. Quapropter si nullam aliam ob causam, certè ob hanc unam gehennâ digni sumus, quod videlicet plus gehennam, quam ipsum Christum timeamus.* Gehennæ metus ex proprio sui ipsius amore nascitur, adeòque qui ob illam solam, & non Christum Dominum à gravi peccato abstinere, non solummodò plus illam timet, sed & seipsum supra Dominum diligit: Quod esse etiam cogitatu horrendum suprâ nobis Julianus Pomerius dixit. Gehennæ metus malè agendi cupiditatem dumtaxat compescit & fræ-

Latens sub timore cupiditas est ex suo genere peccatum mortale. Cap. 36. Homil. 6.

X

frænat : Quod autem frænata & laxata cupiditas sint ferè ejusdem fæditatis & noxæ, tradit Augustinus frequenter, exponitque patenti exemplo leonis aut lupi : Ait lupum terrore pastorum à vorandis ovibus frænatum esse adhuc lupum, & tam trementis quàm frementis lupi animum esse ferocia penitus eundem. In literis ad Anastasium ait à latente ista cupiditate constitui justitiæ osorem ac inimicum, & quidem tantum, ut eam, si posset, auferret. Qui fratrem suum odit, & ablatum velit, homicida est, reusque peccati mortalis: Quantò magis tantus supremæ ac incommutabilis justitiæ, id est, ipsius Divinæ Majestatis adversarius & hostis? Adductus in contrarium locus agit de venialibus justorum peccatis, de adfixivis, levioribus tamen, creaturæ amoribus, qui solo, quod imperfecta charitas ipsos non extinguat, servili timore pressi, in similes cogitationes & adfectus, ob materiæ levitatem dumtaxat veniales, non possunt aliquando non ebullire.

Quinta tandem timoris hujus imperfectio est, quod sit quidem sapientiæ initium, sed extrinsecum. Etenim sapientia ista aliud non est quam justitia nostra, & supremæ incommutabilis justitiæ casta dilectio, cujus partem intrinsecam non esse gehennæ servilem metum clamat res ipsa, & lucidè tradit sanctus Augustinus in libris ad sanctum Pontificem Bonifacium : *Tunc bonum concupisci incipit, quando dulcescere incipit; quando autem timore pœna, non amore iustitia fit bonum, nondum benè fit bonum*, adeoque intrinseca justitiæ exordia necdum cæperunt. Divinæ justitiæ metus servilis, ejusdemque justitiæ seu supremi & incommutabilis boni casta dilectio sunt extrema veterem finientia, & novum hominem inchoantia confinia, ideoque neutrum possit alteri esse intrinsecum, aut ad ipsum uti pars pertinere. Quæ est assidua Augustini doctrina, insigniter elucidata per Petrum Picaviensem: *Servilius timor aliter dicitur initium sapientiæ, aliter timor initialis. Quia timor servilius est initium sapientiæ, id est, ad sapientiam; initialis verò est initium sapientiæ, id est, in sapientiæ, quia est quasi pars sapientiæ, quia habetur cum charitate. Sed timor servilius est quasi secta, quæ ducit filium per foramen, quia ipse precedit charitatem. Loquitur ex magistro suo Petro Lombardo, qui & ipse servilem ac initialem timorem docens aliter & aliter esse sapientiæ exordium, pergit: Servilius idèd dicitur initium sapientiæ, quia preparat locum sapientiæ, & ducit ad sapientiam; initialis verò dicitur initium sapientiæ, quia est inchoata sapientiæ: Quem cum quæ habere incipit, sapientiam & charitatem habere incipit.*



## CAPUT XV.

*An ob istas imperfectiones servilis gehennarum metus  
sit peccatum?*

**D**E timore mundano scribit Petrus Piſſavienſis : Nulli dubium eſt, quin ſit malus. De ſervili autem dubitatio eſt, & ubi eſt dubitatio, conſtituenda eſt diſputatio. Ideò de iſto agendum eſt. Adſerere videtur quòſdam ſuo tempore, fallacibus argumentis nixos, pro parte affirmativa ſteſiſſe. Quidquid ſit, fallacia cum nato ex iſtis errore argumenta pertinaciſſimè in dogma adſumpſit Martinus Lutherus. Favere videtur in libris de vita contemplativa Julianus Pomerius, qui poſt inſigniter expoſita ſervilis ac filialis timoris diſcrimina, adverſum Stoicos, omnem omninò timorem de vitio damnantes, adjungit: *Non omnis timor haberi debet in vitio, ſed ille tantum, de quo ſcriptum eſt, QUIA TIMOR TORMENTUM HABET.* Hoc eſt, timor ſervilis gehennarum. Fundat ſe Martinus Lutherus in ſancto Auguſtino, palàm adſerente ſervilem gehennarum motum eſſe proprii, lucidè vitioſi, amoris ſæctum, ideòque vult illum non poſſe non eſſe vitioſum. Neque hìc ſtetit hominis temeritas. Etenim ſextus ejus per Leonem decimum Pontificem damnatus articulus eſt hìc: *Contritio, qua paratur per diſcuſſionem, collectionem, & deteſtationem peccatorum, quàm quis recogitat annos ſuos in amaritudine anima ſua, ponderando peccatorum gravitatem, multitudinem, ſeditatem, amiſſionem æternæ beatitudinis, & acquisitionem æternæ damnationis. Hac Contritio facit hypocritam, immodò magis peccatorem.* Non ſolùm gehennæ metum, ſed & conceptam ex illo Contritionem imperfectam, ſeu Attritionem blaterat eſſe peccatum. Et in ſua adverſus laudati Pontificis Bullam apologia mordaciſſimè id defendit.

L. 3. c. 18.

L. 3. c. 31.

Adverſus primum errorem ſtatuit ſacroſancta Tridentina Synodus: *Si quis dixerit gehennæ metum, per quem ad miſericordiam Dei de peccatis dolendo confugimus, vel à peccando abſtinemus, peccatum eſſe, aut peccatores peiores facere, anathema ſit.* Quidam non de purè ſervili, ſed de initiali ſeu mixto, adeòque & ab adjuncta ſervilitate purgato metu exiſtimant ſtatui à Synodo: Et opinio non caret fundamentis. Ego credo ſtatui etiam de purè ſervili. Eum quippe eſſe non ſolummodò utilem, ſed etiam bonum audivimus ſuprà à ſancto Thoma & ſancto Auguſtino, qui omninò nuſquam eum dixit peccatum, malum, vanum, aut vitioſum. Et hìnc Juliani Pomerij pro ſuis de vita contemplativa libris verba, *Sanctum Auguſtinum pro poſſibilitate ſecutus*

Gehennæ metus non eſt peccatum.  
Seſſ. 6.  
Can. 8.

L. 3. c. 31.

L. 3. c. 15.

sum, de solo sensu, non de sententia seu loquendi formulis sunt accipiendi. Eos concordat Petrus Picaviensis: *Bonum multipliciter dicitur. Bonum meritorium, bonum utile, bonum de genere bonorum. Servilis autem timor bonus est, id est, utilis, quia introductorius est ad charitatem. Sed non est bonum, id est, meritorium.* Dicit etiam esse bonum de genere bonorum, id est, officio, seu ut sanctus Thomas suprâ locutus est, substantiâ bonum. Est similis charitati illi, de qua in populari sermone sanctus Augustinus: *Licita est humana charitas, quâ uxor diligitur.*

Ser. 52. de  
temp. c. 1. 1

Et quâ filij & alij consanguinei diliguntur. *Humana est, sed licita. Non solum ita licita est, ut concedatur, sed ita licita est, ut si defuerit reprehendatur. Sed videtis istam charitatem posse esse & impiorum, id est, Paganorum, Iudeorum, Hæreticorum. Quis enim eorum non diligit uxorem, filios, fratres? Hac ergo humana est. Addit eam non reprehendi. Est tamen humana, seu humani arbitrij opus, non Divina, seu infusum Dei*

Homil. 38.  
c. 1.

donum, quod nos perducas ad regnum. Et hinc in alio sermone dicit eam esse carnalem, & necdum laudandam. Non enim laudandus est qui amat filios, sed detestandus qui non amat. Quod ipsum in vigesima septima super Evangelij Homilia tradit Gregorius magnus: *Sunt nonnulli qui diligunt proximos, sed per affectionem cognationis & carnis, quibus tamen in hac dilectione sacra eloquia non contradicunt. Sed aliud est quod sponte impenditur natura, aliud quod præceptis Dominici ex charitate debetur obedientia. Hi nimirum & proximum diligunt, & tamen illa sublimia dilectionis præmia non adsequuntur: Quia amorem suum, non spiritaliter, sed carnaliter impendunt. Est amor licitus, bonus, irreprehensibilis, at solo officio & substantiâ, non fine & radice. Nec enim est propter Deum, sed propter proprium sanguinem; neque ex casto Dei, sed ex privato sui amore procedit. Hinc humanus & carnalis est, non Divinus & spiritalis, nec meritorius regni. Radix seu origo ista est omnino aliquid vitij, sed quod nequeat inficere, aut malum reddere ipsum officium, seu substantiam actus. Et hinc Julianus Pomerius, servilem gehennæ metum dicens esse in vitio, non est bene locutus.*

Supponit  
fidem.

Ser. 19. c. 9.

Hinc item laudatus timor, licet infusum ac supernaturalem fidei actum frequenter præsupponat, non est tamen ipse actus infusus aut supernaturalis. Quod fidem istam frequenter supponat, disertè tradit sanctus Augustinus in sermonibus de verbis Apostoli: *Si timore gehennæ non facis malum, est in te fides, quia times futurum esse Dei iudicium. Gaudeo fidei tuæ, sed adhuc timeo malitiam, seu servilitatem tuam.* Et in sermonibus de verbis Domini: *Evangelium eos solos terret, qui fidem habent, eos autem non terret, qui fidem non habent. Et in tractatibus super sancti*

Ser. 4. c. 1.

sancti Joannis Epistolam: *Capit aliquis credere diem iudicij. Si capit credere, capit & timere.* Et in libro contra Collatorem sanctus Prosper lapsos in Paradiso Protoplastos dicit fuisse ipoliatos non solâ fide, spe, & charitate, sed nec gehennarum illis mansisse metum, *Ut ab interdictu vel metu caverent pœna, qui abstinebant amore iustitia.* Quod nempe sine aliqua fide timor iste non possit esse. Et hinc de Catechumenis dicit sacrosancta Tridentina Synodus: *Disponuntur ad ipsam iustitiam, dum excitati Divinâ gratiâ & adiuti, fidem ex auditu concipientes, liberè moventur in Deum, & dum peccatores se esse intelligentes, Divina iustitia timore utiliter concutuntur.* Palâm dicit infusam fidem à timore præsupponi.

Tra&amp;.9.

Cap. 19.

Sess.6. c.6.

Dico timorem hunc non posse esse *sine aliqua fide*, & fidem infusam ab ipso *frequentè supponi*. Hæc enim non semper supponitur. Etenim Hæretici etiam, quin & quidam Pagani, à quibus remotissima est infusa fides, gehennam omninò timent & timuerunt. Sufficit ergo animalis fides, & quævis humana credulitas aut persuasio, qualem carnalibus judæis infuisse scribit in libro de Spiritu & litera sanctus Augustinus. Addo etiam illum, qui fidem infusam præsupponit, non esse infusum aut supernaturalem. Quod enim non ex speciali Dei per Jesum Christum dono, sed ex proprio sui amore, adedque ex puro libero arbitrio nascatur, est suprà ostensum ex sancto Augustino. Et res ipsa clamat. Nam qui æquè de infligenda peccatis suis per iustum & optimum Deum gehenna, ac de infligendo per hominem Regem capitali supplicio non dubitat, utrumque malum non potest non æqualiter, immò istud longè magis fugere & horrere. Licet porro timor ille non sit infusus, est tamen à Deo incussus actus, quarum Divinarum causilitatum differentiam exponere non spectat ad questionem præsentem. Gehennæ metum, uti sanctum & Dei donum, laudari vario sancti Augustini & aliorum Patrum testimonium novi: Nempe non omnis istius mali metus est servilis; aliquis etiam castus est, qualis fuit in Adamo ante lapsum, & in multis postea Sanctis, timentibus illud, non quia ipsis durum sit, sed quia intellectualis creaturæ à naturali ejus sine separativum.

Non semper supponit fidem infusam.

Cap.32.

Nec ipse est actus infusus. Est tantum incussus.

Adversus alterum Martini Lutheri errorem sacrosancta Tridentina Synodus emisit hoc Decretum: *Illam Contritionem imperfectam, qua Attritio dicitur, quoniam vel ex turpitudinis peccati consideratione, vel ex gehenna & pœnarum metu communiter concipitur, si voluntatem peccandi excludat, cum spe veniæ, declarat sacrosancta Synodus non solum non facere hominem hypocritam & magis peccatorem, verum etiam Dei donum esse, & Spiritu sancti impulsam, non adhuc quidem inhabitantem, sed tantum*

Contritio imperfecta non est peccatum. Est Dei donum. Sess.14.c.4.

Cap. 5.

rum morientis, quo Penitens aditus sibi viam ad iustitiam parat. Et hunc Canonem: Si quis dixerit eam Contritionem, qua paratur per discussionem, collectionem, & detestationem peccatorum, quam quis recogitat annos suos in amaritudine animae suae, ponderando peccatorum suorum gravitatem, multitudinem, fedtatem, confessionem et aeternam beatitudinis, & aeterna damnationis incursum, eam propositum meliorem, non esse verum ac utilem dolorem, nec preparato ad gratiam, sed facere hominem hypocritam & magis peccatorem; demum illum esse dolorem coactum, & non liberum ac voluntarium: Anathema sit. Distinguit duplicem poenitentis animi motum: Gehennae ac aliarum poenarum servilem, ex quo imperfecta Poenitentium Contritio communiter concipitur, metum, & ex ipso conceptam Attritionem: Hanc definit esse motum, non dumtaxat utilem, sed &, licet non perfectam, tamen veram Contritionem, Spiritus sancti donum ac impulsus, actum non incussum, sed infusum, impetrandae peccatorum remissioni praeparationem cum Sacramento aptam & omnino sufficientem. Quae omnia caecae ac impii Lutherus impugnavit. Laudatos inter motus est grande discrimen, statim exponendum.

## CAPUT XVI.

*Quaestiones aliquot circa servilem gehenna metum.*

Gehennae  
metus non  
facit magis  
peccatorem.

Ser. 18. c. 7.

Cap. 16.

Quaestio prima est, An sacrosancta Tridentina Synodus recte dicat, quod servilis gehennarum metus non solummodo peccatum non sit, sed nec hominem faciat magis peccatorem? Respondeo affirmativè. Etenim loquitur cum S. Augustino in sermonibus de verbis Apostoli: Cum idem adulter non esse cæperis, quia times ardere in igne sempiterno, necdum laudandus es. Non quidem ita dolendus ut antea, sed tamen nondum laudandus. Quare non ita ut antea dolendus? Certè non alia de causa, nisi quia minor es quam antea peccator. Et in libro de patientia idem Augustinus scribit: Si quis non habens charitatem, in aliquo schismate constitutus, ne Christum neget, patitur tribulationes timore gehennarum & ignis aeterni, nullo modo ista culpanda est, immò verò & hac laudanda patientia. Non enim dicere poterimus, Melius ei fuisset, ut Christum negando nihil eorum pateretur, quia passus est confitendo, sed existimandum fortasse ei tolerabilius futurum iudicium, quam si Christum negando cuncta illa vitaret; ut illud, quod ait Apostolus, SI TRADIDERO CORPUS MEUM ITA UT ARDEAM, CHARITATEM AUTEM NON HABEAM, NIHIL MIHI PRODEST, nihil prodesse intelligatur ad regnum caelorum obtinendum, non ad extremi iudicii tolerabilius supplicium sub-

*subeundum.* Quia nempe ille gehennarum timor facit minùs peccatorem. Licet non interna, externa tamen peccata vitat, atque ita mediam Divinæ legis partem explet: Quod quis non videt esse peccatum minùs plenâ prævaricatione?

Verùm in sua adversùs Leonis decimi Põntificis Bullam apologia Martinus Lutherus obiicit: Apostolus dicit legem fuisse gratiâ prævaricationis positam, & ut abundaret delictum; at verò per legem idem Apostolus intelligit palmarem ac ferè unicum legis effectum, ab ipsâ incussum gehennæ ac aliarum pœnarum metum; ergo etiam, hic ad delicti abundantiam nobis incutitur, facitque nos magis peccatores. Respondeo falsam esse minorem. Etenim lex duos habet palmares effectus: Cognitionem peccati, & incussum pœnæ metum. Hinc peccatum & minuit & auget. Per datam ignoti antea peccati notitiam, ablatamque ignorantiam, ex simplici delicto facit prævaricationem, & quasi intensivè auget; per incussum pœnæ metum grassantes in vetere animo concupiscentias, licet non auferat, tamen compescit ab externis operibus & frænât, ex media parte legem observat, peccati per multa extensionem truncat & contrahit, atque ita palàm nos facit minùs peccatores. Cognitionis effectum dolose in metum Martinus Lutherus transtulit, atque ita pessimè erravit.

Altera quæstio est, Cur sacrosancta Synodus Canonì suo addiderit hæc verba, *Per quem ad misericordiam Dei de peccatis dolendo confugimus?* Respondeo verba ista esse combinanda cum his, *Si quis dixerit gehenna metum peccatum esse.* Et hinc quidam gravissimi Doctores existimant Synodum, non de purè servili, sed definire de metu initiali, quem præsertim infamârat Martinus Lutherus. Nec loquuntur sine fundamento. Etenim sacrosancta Synodus definitas priùs in suo fidei Decreto veritates rursùm postea suis in Canonibus seu Anathematismis palàm repetit & confirmat, atque ita adducta octavi Anathematismi verba omninò correspondent hisce, de initiali timore palàm agentibus, in sexto capite Decreti: *A Divinæ Iustitiæ timore, quo utiliter concutuntur, ad considerandam Dei misericordiam se convertendo, in spem eriguntur, fidentes sibi Deum, propter Christum, propitiū fore, illumque tamquam omnis iustitiæ fontem diligere incipiunt, ac propterea moventur adversùs peccata sua per odium aliquod & desperationem, hoc est, per eam Penitentiam, quam ante Baptismum agi oportet.* Purum ac plenum, cui adhuc adnexa servilitas, servilem metum peccati quidem accusavit, de ipso tamen vix expressè disputavit Martinus Lutherus, ideòque & sancta Synodus videtur de ipso nihil definisse. Fundata & probabilis est hæc opinio. Quod tamen adductus Anathe-

Lutheri  
argumen-  
tum solvi-  
tur.

Exponitur  
Canon Tri-  
dentinus.

matismus etiam de plenè servili, & necdum purgato metu possit intelligi, & sup. à dixi, & rursùm hìc adfirmo.

Exponun-  
tur alia  
Synodi  
verba.

Cap. 4.

Epist. 141.

Ser. 4. c. 5.

Quæstio tertia est, Cur sacrosancta Tridentina Synodus Canonì adjunxerit etiam hæc verba, *Vel à peccando abstinemus?* Respondeo ista verba esse combinanda cum his: *Si quis dixerit gehenna metum peccatores peiores facere.* Eorum rationem assignat in libro de Spiritu & litera sanctus Augustinus: *Vbi sanctus non adjuvat Spiritus, lex, quamvis bona, auget prohibendo desiderium malum, sicut aque impetus, si in eam partem non cesset influere, vehementior fit obice opposito, cuius molem cum evicerit, maiori cumulo præcipitatus, violentus per prona provolvitur.* Et in literis ad Anastasium: *Pœna corporis, etsi non à voluntate, tamen revocat ab opere peccati. Nec facile quisquam est qui committat, quo illicitam & immundam percipiat voluptatem, si cruciatus vindicta certum est continud secuturos.* Hinc ille est nequissimus, quem nec pœna corporales deterrent ab operibus sordida voluptatis. Et in sermonibus de verbis Apostoli: *Minor erat concupiscentia, quando ante legem securus peccabas, nunc autem oppositis obicibus legis fluvius concupiscentia quasi frænatus est paululum, non siccatus. Sed crescente impetu, qui te ducebat obicibus nullis, obruit te obicibus ruptis. Concupiscentia tum minor erat, quando tuam movebat libidinem; omnis est, quando transcendit & legem. Vis nosce quàm magna sit? Vide quid ruperit: NON CONCUPISCES. Non homo dixit, Deus dixit.* Servilis ergo gehennæ aut aliarum pœnarum metus, dum grassantem in veteri corde libidinem frænare & cohibere non potest, omnino facit, dumtaxat tamen occasionaliter, aut potius ostendit nos magis peccatores. Hinc addidit sacrosancta Synodus: *Vel à peccando abstinemus.* Notanda est disiunctio, *vel:* Definit duplicem gehennæ metum, & illum quo de peccatis dolendo ad Dei misericordiam confugimus, & illum quo à peccando abstinemus, nec peccatum esse, nec facere magis peccatores. At verò ille, quo ad Dei misericordiam de peccatis dolendo necdum confugimus, sed ab exteris peccatis dumtaxat abstinemus, necdum est initialis, sed palàm adhuc plenè servilis: Ergo etiam hunc sacrosancta Synodus definit non esse peccatum.

Quarta quæstio est, Cur sacrosancta Synodus conceptam ex servili pœnarum metu Contritionem laudans dicat, *Si quis dixerit esse dolorem coactum, & non liberum ac voluntarium, Anathema sit?* Respondeo dicere adversus Martinum Lutherum in sua memorata Apologia, ac in sermone de Pœnitentia pessimas istas Donatistarum nugas sine fronte resuscitantem. Conceptam ex servili metu Contritionem cum ipso metu ac ejus servilitate confundit homo cæcus & do-



dolosus, ideoque & hujus & istius, quorum externa bona opera & à peccatis externis abstinentia sunt veraciter compulsa & secundum quid involuntaria, imperfectiones & vitia in illam nequiter & Donatistice transcribit. Resuscitat à S. Augustino memoratum errorem Petiliani, Constantinensis seu Cirthenis Episcopi Donatista: *Dixit Dominus Christum, NEMO VENIT AD ME, NISI QUEM PATER ATTRAXERIT. Cur vos non liberum arbitrium unicuique sequi permittit? Agit Petilianus adversum leges imperiales, gravibus temporalium malorum terroribus Donatistas ad matrem Ecclesiam redire cogentes: Ejusmodi reditum garrir non esse liberum ac voluntarium, sed coactum. Eandem fuisse Gaudentij Thamugadensis Episcopi, Cresconij Grammatici, ac totius Factionis opinionem, possit facile ostendi. Magistros suos Lutherus agnoscat. Petiliano autem respondit sanctus Augustinus: Sicut fieri potest, ut quos in libero dimisit arbitrio, attrahat tamen ad Filium Pater, sic fieri potest, ut ea, qua legum coercitionibus admonentur, non auferant liberum arbitrium. Quidquid enim hominibus durum ac molestum patitur, admonetur ut cogitet quare patitur: Vt si pro Iustitia se pati perspexerit, id ipsum bonum eligat pro Iustitia talia sustinere; si autem viderit iniquitatem esse, pro qua patitur, se infructuosissime laborare atque cruciari considerans, mutet in melius voluntatem, simulque caveat & molestiam sterili, & ipsam iniquitate.* Quod ipsum alijs & alijs verbis scribit etiam in libris adversus Gaudentium, in literis ad Vincen-  
 Rogatistarum Episcopum Cartennensem; in libris adversus Cresconium, in literis ad Donatum Presbyterum Donatistam, in literis ad Dulcitium Notariorum Tribunalum, & alibi frequenter. In homine per servilem metum ad correctionem & Contritionem perducto distinguenda sunt duo tempora: Primum, dum solo timore movetur; secundum, dum timor jam concepit sapientiam ac peperit charitatem. Priori tempore fateor hominem esse invitum ac involuntarium. Quia enim timor veteres in ipso cupiditates solum ligat & frænata, ejus voluntas adversus semetipsam est in timorem & cupiditatem in invicem pugnantem divisa, hinc volens effugere peccati poenam, hinc ejus suavitatem sectari, ideoque quidquid agit, agit invitus, quia contra alteram istarum invicem compugnantium voluntatum. Posteriori autem tempore est plenè liber ac voluntarius. Tunc enim introducta est timorem adjuvans charitas, & expulsa timori repugnans cupiditas, omnisque prior necessitas versa est in virtutem ac liberam electionem. Neque enim uti frænans timor & frænata cupiditas, ita introducens timor ac introducta charitas in invicem pugnant, animam trahunt in partes adversas, aut eam faciunt

L. 2. c. 84.

L. 2. c. 84.

L. 1. c. 15.

Epist. 48.

L. 3. c. 51.

Epist. 104.

Epist. 61.

ciunt idem objectum velle simul & nolle. Trahunt diversâ vi, timor odio poenæ, charitas seu Contritio dilectione iustitiæ; trahunt tamen in eandem partem, idedque nihil habent, quo hominem involuntarium faciant aut invitum. Lutherus & Donatistæ confuderunt hæc duo tempora: Hinc purum Evangelicæ prædicationis vinum miscuerunt & inquinârunt fetidâ aquâ suarum fabularum.

Imperfecta  
Contritio  
non facit  
hypocri-  
tam.

Conceptam ex servili metu Contritionem sacrosancta Tridentina Synodus declarat non facere hominem hypocritam aut magis peccatorem. Et rursum dicit: *Si quis dixerit facere hominem hypocritam aut magis peccatorem, Anathema sit.* Hinc quinta quæstio est, Quò hæc tendant? Respondeo tendere in Martinum Lutherum, in sermone de Poenitentia & in jam sæpius memorata Apologia errores istos, non solum de servili timore aut ejus servilitate, sed & de concepta per istum Contritionem garrientem, edicentemque sua fundamenta & caussis: *Ego hypocritam aliter definire non possum, quam eum, qui id, quod facit, non ex animo & sincero corde facit. Animum autem talem & cor non dat natura, nec collectio peccatorum, sed sola charitas Spiritus.* Hypocrisis, inquam ego, non est aliud, quàm simulatio iustitiæ, seu iustitia simulata; & hypocrita non est aliud, quàm iniustitiæ, simulator, simulatus iustus, seu personatus iustitiæ histrio, & sepulchrum dealbatum. Ita res ipsa clamat, plurimisque in locis tradit sanctus Augustinus. Quapropter vitium istud importat duo: Iustitiæ carentiam, & ipsius mendacium seu fictionem. Est omnino, licet non oris, tamen operis genuinum mendacium, idedque una ex ejus essentialibus partibus est voluntas fallendi. Et huic sacrosancta Synodus voci, *Hypocritam*, semper addit, *Magis peccatorem*. Loquitur ex sancto Augustino, qui in libris de Baptismo adversum Donatistas occultum Hæreticum aut Schismaticum dicit esse *tantiò sceleratorem, quantiò magis hæreseos aut schismatis pravirati fallaciam simulationis adiungit.* Et in secundo sermone de communi Clericorum vita occultos proprietarios Clericos aut Monachos dicit mortuos, manifestos autem apostatas esse dumtaxat cæcos aut claudos. Omnem fictum iustitiæ simulatorem esse mortuum scribit in libris adversus Cresconium Donatistam. Aperta enim iniquitas est unicum dumtaxat peccatum, at verò hypocrisis internæ iniquitati addit externam fictionem iustitiæ, idedque est peccatum duplex, & facit magis peccatorem. Porro ex poenarum metu concepta Contritio neque carentiam neque simulationem includit iustitiæ: Est enim, licet imperfecta, omnino tamen vera operis iustitia, & germana spiritus charitas, operatur ex animo & sincero corde, proindeque ex ipsis Lutheri principiis est remotissima ab hypo-

L. 4. c. 16.

L. 1. c. 16.

hypocritæos labe. Conciipientem metum & conceptam Attritionem non distinxit cæcus & dolosus Lutherus, atque hinc adeò grossè est lapsus.

Sexta tandem quæstio est, Cur sacrosancta Tridentina Synodus, servilem gehennarum metum, quo à peccando cessamus, definiens non esse peccatum, nec magis peccatorem facere, non addiderit, quod de concepta per ipsum Attritione dixit, etiam non facere hypocritam? Quidam existimant aliam concipientis timoris, aliam conceptæ Attritionis esse hac in parte rationem: Facta ex servili ante introductam charitatem timore bona opera exillimant hypocritica, & hanc esse radicem diversæ istius locutionis. Hic namque timor hominem quidem formosis exteriorum operum folijs ornat, at sædum boni & recti odium, dolosam servilitatem, & multam cupiditatem in corde relinquit, ideòque simulatam solummodò inducit iustitiam, & facit sepulchrum dealbatum. Et hinc eos, qui suam cum carnalibus judæis, ex servili timore bona operantibus, iustitiam statuunt, in libris ad sanctum Pontificem Bonifacium sanctus Augustinus vocat fallaciter justos. Respondeo tamen nos à servili, cui adjuncta servilitas, timore non constitui hypocritas. Hypocritis enim non quævis internæ iustitiæ defectum, sed importat positivum operis mendacium, & histrionicam simulationem, quæ certum est omnem illum, qui ex solo timore operatur bona, non semper laborare. Responde enim in libro de patientia scribit sanctus Augustinus: *Ecclesia tenet piam fidem, non eam, qua per elationem aut timorem, sed eam, qua per dilectionem operatur.* Distinguit triplicem bona operandi modum: Per Dei dilectionem, per timorem, per elationem, quæ utique homo vult suam constituere iustitiam, & apud hominès justus apparere & gloriosus. Hæc quæstio videtur ad firmum ac immobile Ecclesiæ dogma non pertinere, ideòque ab illa definienda sanctum Concilium abstinuit.

Nec item servilis timor.

L. 3. c. 7.

Cap. 18.

## CAPUT XVII.

*Exponitur essentia Attritionis, seu Contritionis imperfecta.*

**A**ttentionis nomen, inquit Guilielmus Estius, Scriptura & Patribus incognitum, à Schola Doctoribus, distinctionis & doctrina gratia, sunt excogitatū, ad significandum dolorem de peccato, seu pœnitentiam quamdam imperfectam. Sicut enim in corporalibus attritum dicitur, quod aliquo modo, nempe forinsecus tantum, laesum est aut comminutum, contritum verò, quod totum intus & foris fractione in minima, resolutum est; ita in spiritualibus Attritio ab illis dicta est quadam imperfecta, & aliquo usque tan-

L. 4. Dist. 16. § 9. c. Attritionis vocabulū est novum.

*tum progressa Pœnitentia, Contritio verò Pœnitentia intima & perfecta.*

Augustinus  
illud no-  
vit.

L. 1. c. 22.

Epist. 108.

Cap. 6.

Cap. 17.

Tom 9. f.  
360. 361.  
L. 2. c. 33.

L. 1. c. 25.  
L. 2. c. 24.  
Epist. 99.  
Est legiti-  
ma ac ve-  
ra.

L. 1. oper.  
imperf.  
cap. 95.

Epist. 50.

Hæc tamen nominum distinctio videtur antiquis non plenè fuisse ignota. Etenim *cordis obtritionem*, quæ videtur esse ipsissima Atteritio, laudat sanctus Augustinus in libris de sermone Domini in monte. Quidquid sit, hinc non de servili gehennæ aut aliarum pœnarum metu, sed de concepta exinde Contritione agimus, quæ planum est insigniter distingui. Ejusmodi porro Contritionem laudat sanctus Augustinus frequen- tissimè. In literis ad Honoratum Thabennensem Episcopum scribit barbaricâ incurssione concussas urbes turmatim currere ad Ecclesiam: Alios Baptismum petere, alios Reconciliationem, alios actionem pœnitentiæ, omnes consolationem, Sacramentorumquæ consecrationem ac erogationem. Et in sermone de excidio Romanæ urbis: Omnes ad Ecclesiam confugiant, *non capit multitudinem locus, Baptismum extorquet quisque à quo potest. Non solum in Ecclesia, sed etiam per domos, per vices ac plateas salus Sacramenti exigitur, ut fugiatur ira, non prasens utique, sed futura.* Et in libro de catechizandis rudibus ait plurimos velle fieri Christianos, *Vt non eant in ignem æternum cum diabolo, sed in regnum æternum cum Christo.* Per quendam terræ motum innumeros ad Baptisma partim, partim ad Pœnitentiam fuisse conversos scribit etiam ac laudat sanctus Joannes Chrysostomus. Et in libris de vocatione gentium sanctus Prosper: *Quam multos, qui in tranquillitate pacis Sacramentum Baptismatis suscipere differebant, ad aquam Regenerationis confugere instanti periculi metus impulit, & lentis tepidissq; animis, quod diu exhortatio quæta non suaserat, minax subito terror extorsit.* Et hinc similem Ninivitarum pœnitentiam sacrosancta Tridentina Synodus ex laudati Augustini libris adversus Gaudentium Donatistam, libris de civitate Dei, & literis ad sanctum Evodium Uzalensem Episcopum, meritò canonizat.

Et hinc conceptam ex metu servili Contritionem esse legitimam, sanctam, ac veram, non est ambigendum. Ante Martini Lutheri tempora negarunt id cum Donatistis, volentibus solo amore, non timore duci homines, Pelagiani, quorum Dux & Goliath Julianus edixit: *Ab intentione propria mala non debet homo ullâ necessitate revocari.* Respondit verò sanctus Augustinus: *Cur Apostolus adhuc Saulus cædem spirans, & sanguinem sitiens, violentâ corporis cæcitate, & terribili desuper voce à sua pessimâ intentione revocatur, & ex persecutore prostrato illius Evangelij, quod oppugnabat, laboriosior cateis futurus Predicator erigitur?* Quo argumento etiam in literis ad Bonifacium Comitem utitur adversum Donatistas, & adjungit: *Melius est quidem, quàm dubitare, ad Deum colendum homines doctrinâ duci, quam pœna timore vel dolore*

*dolore compelli. Sed non quia isti meliores sunt, idèd illi, qui tales non sunt, negligendi sunt. Multum enim profuit priùs timore vel dolore cogi, ut postea possent doceri, aut quod iam verbis didicerant opere sectari. Multis ostendit hominem per timorem cogi, ac pedetentim introduci in justitiam & charitatem. Addit quod Apostolum Paulum deduxerit etiam ad charitatem perfectam. Ex metu conceptam in mortis lecto Contritionem & ipse & alij Patres frequenter habent suspectam: Hinc enim Clinicos seu Grabatarios antiqua Ecclesia censuit irregulares. Quod tamen ipsorum Contritionem, Baptisma, ac Reconciliationem rata ac formata posse esse censuerit eadem Ecclesia, lucidum est, neque spectat ad rem præsentem.*

Et hæc Attritio seu imperfecta Contritio, ut vera sit, omninò esse debet germana, & quidem adfectu saltem super omnia, Dei dilectio. Lucidè id in secundæ ad Corinthios Epistolæ commentarijs tradit sanctus Joannes Chrylostomus: *Cùm peccaveris, ingemisce. Non quod pœnas daturus sis, nihil enim hoc est; sed quod Deum tuum offenderis, tam benignum, tam te amante, tam denique salutis tuæ appensum, ut Filium quoque suum tuâ causâ tradiderit. Conceptam ex pœnarum metu Contritionem nullo pacto damnat: Ait solum timorem servilem non sufficere, sed opus omninò esse, ut ex ipso concipiatur casta dilectio, quâ Deum optimum maximum, tamquam summum Bonum & Justum, omnique justitiæ & bonitatis fontem diligamus, ac idèd peccata nostra oderimus, deestemur, de ipsis pœniteamus & contemur. Etenim imperfecta ex metu concepta Contritio est germana species sumptæ generati n, & superiùs per sacrosanctam Synodum definitæ Contritionis, quam sine laudata charitate non posse esse, est suprà abundè ostensus. Addit de ipsa sanctum Concilium: Si voluntatem peccandi excludat. Hoc est, si ejus, à quo introductus est, timoris excludat servilitatem. Exclusionem hanc sancit esse de Contritionis essentia. Porro voluntatem seu servilitatem istam excludi non posse, nisi per veram, adfectu saltem super omnia, charitatem, etiam suprà demonstratum est.*

Pergit sacrosancta Synodus: *Quamobrem falsè quidam calumniantur Ecclesia Catholicos Scriptores, quasi traderint Sacramentum Pœnitentiæ absque alio nuncquam do-*  
*bono motu susipientium gratiam conferre. Quòd nunquam Ecclesia Dei docuit, nec sensit. Agit adversùs Martinum Lutherum, qui in sua ad-*  
*versùs Leonis decimi Pontificis Bullam apologia multis blaterat &*  
*calumniatur Contritionem, quæ solo pœnarum timore, aut solo*  
*naturali Dei amore constet citra infusam ac supernaturalem charita-*  
*tem, à nobis prædicari uti sufficientem cum Sacramento ad justitiam,*

Debet esse  
 Dei super  
 omnia di-  
 dilectio.  
 Homil. 4.

tiam, & adjungit: *Quod si dixerint se loqui de Contritione in charitate facta, iam articulus, à Leone Pontifice damnatus, nihil ad me. Non enim unquam sic docui, immò quia ut meum damnant, de Contritione naturali & impia extra fidem loqui eos oportet, quam esse hypocrisin, satius iam ex dictis constare puto.* Maledicus & contumax Hæreticorum spiritus semper accusat Ecclesiam: Ei imponit fæda & probrosa dogmata, ipsa impugnat, expugnatque aliquando, atque ita non de nobis, sed de suis calumniolis phantasmatibus stultè & nugaciter triumphat. Quod ipsum hîc egit Martinus Lutherus, ideòque meritò se purgat Ecclesia, synodaliter edicens sen nunquam ita credidisse aut docuisse. Semper defendit & constanter tenuit hanc sancti Joannis Apostoli sententiam: *Qui non diligit, manet in morte.* Semper docuit sine Dei super omnia charitate neminem posse justificari, ideòque & semper docuit conceptam ex servili metu Attritionem charitate, licet non perfectam, oportere tamen esse formatam. Quocirca quicumque aliud hodie in Ecclesia forsitan cogitant, cogitant Martini Lutheri de Ecclesia verificare calumnias, & sacrosanctam Synodum reddere mendacem.

Et hoc sufficienter expressit.

Verùm inquires, Quare sacrosancta Synodus disertè non expressit ad imperfectam etiam Contritionem requiri Dei dilectionem super omnia, atque ita omnem hodiernis quæstionibus ingressum non præclusit? Respondeo istud ipsum, quod olim Francorum Episcopis, de Synodo prima Constantinopolitana, cur suo Symbolo hanc vocem, *Filios*, non addidisset, atque ita plurimas & miserandas Ecclesiarum lites non præfocasset, postulantis respondit olim Pontifex Leo tertius: *Sicut nò audeo dicere non benè fecisse laudatæ Synodi Patres, si fecissent, quia proculdubio sicut cetera, qua vel omiserunt, scientes utique, & non tam humana, quam Divinâ illuminati sapientiâ fecerunt; ita quoque non audeo dicere istud eos nobis minùs intellexisse, aut perpendisse, cur dimiserint.* Quin immò sacrosancta Tridentina Synodus non dimisit. Etenim imperfectæ Catechumenorum Contritioni disertè dixit necessariam atque essentialem esse eam charitatem, quâ Deum uti omnis justitiæ fontem diligere incipiunt, ideòque peccata sua oderunt & detestantur. Hominem quemvis, ut ei justificationis gratia conferatur, dixit debere credere, sperare, diligere, pœnitere, sicut oportet. Hoc est, ex vera in Deum fide, spe, & charitate pœnitere. Generationem sumptam Pœnitentium Contritionem dicite esse peccati detestationem & odium cum proposito non peccandi de cætero: Quæ omnia certum est non posse fieri sine vera dilectione. Perfectam Contritionem dicit esse charitate perfectam, hoc est, illam quæ inclu-



includat perfectam charitatem, & ex ipsa procedat: Atque ita palam supponit tot esse Contritionis, quot charitatis classes seu species, & hanc in omni illa debere semper includi.

## CAPUT XVIII.

*Questiones aliquot de imperfecta Contritione.*

**Q**uestio prima est, Quomodo imperfecta Contritio concipitur ex servili pœnarum metu, per imperium ac emanationem, an per voluntatis conversionem? Inter voluntatis actus & motus est varia subordinatio & causalitas. Alius ex alio quandoque concipitur & nascitur per physicum effluxum, tamquam rivus è fonte; quandoque per effluxum dumtaxat occasionalem, tamquam de termino à quo conversionis. Uti lignum in ignem, & ligni forma in formam ignis transmutatur, adeòque hæc ex illa concipitur & procedit; ita quoque voluntas in voluntatem vertitur, adeòque una ex altera concipitur, tamquam ex termino istius conversionis. Et ita dico charitatem aut Contritionem concipi & procedere ex servili metu pœnarum. Disertè id tradit in literis ad Bonifacium Comitem sanctus Augustinus, dicens de Apostolo Paulo: *Quem timor coëgit ad charitatem, eius perfecta charitas foras misit timorem.* Iste introducentis ad introducti ingressum exitus & cessio est evidens indicium conversionis, seu conceptionis per conversionem. Ad rivi namque fluxum non siccaturs fons, ad frondium & florum germinationem non exarefcit radix, nullus effectus emanans possit suam perimere aut pellerè causam: Quin immò passim ab ipsa in conservari dependet. At verò charitate intrante incipit exire timor, illa crescens hunc diminuit, perfecta omnem pellit, adeòque lucet illius hunc non genuinam causam esse, sed dumtaxat occasionem. Etiam imperfectam, quæ utique aliud non est quam imperfecta charitas, Contritionem ita nasci tradit Augustinus In sermonibus de tempore, dicens *nos à timore cogi, ut trans-eamus ad dilectionem.* Et in libris de adulterinis conjugijs ait Deo *ter-rente & hortante, convertente & implente, humanum in melius mutari adfectum.* Et in libris adversus Petilianum adsignat incussum à legibus imperialibus metum esse ansam, *Vt homo in melius mutet voluntatem.* Et hinc Catechumenos à Divinæ justitiæ timore ad considerandam Dei misericordiam, de ipsa sperandū, & diligendam justitiam converti dicit disertè Synodus Tridentina. Gehennarum metus & justitiæ dilectio sunt duo veteris ac novi hominis extrema confinia; ab isto in hoc transire est de necessitate in virtutem profi-

Contritio  
ex metu  
concepitur,  
non ema-  
nat.  
Epist. 50.

Ser. 7.  
L. 1. c. 29.

L. 1. c. 24.

cere, quod fieri non potest nisi per voluntatis transitum & conversionem.

Laudata sacrosancta Synodus dicit de imperfecta Pœnitentium

Contritione: *Ex gehenna aut pœnarum metu communiter concipitur.*

At verò de Catechumenorum Pœnitentia generaliter atque indefini-

tè dicit: *Peccatores se esse intelligentes, à Divina iustitia timore, quo uti-*

*liter concutiuntur, ad considerandam Dei misericordiam se convertunt.* Et

hinc nascitur quæstio secunda, Cur Pœnitentium Contritio dum-

taxat communiter, Catechumenorum autem Pœnitentiâ adferatur

semper concipi ex timore servil? Respondeo rationem dari à Sapien-

te: *Qui sine timore est, non potest iustificari.* Exponit in Psalmorum

commentarijs sanctus Augustinus: *Nisi timore incipiat homo Deum co-*

*lere, non perveniet ad amorem.* Et in libro de catechizandis rudibus:

*Rarissime accedit, immò verò nunquam, ut quisquam veniat volens fieri*

*Christianus, qui non sit aliquo Dei timore percussus.* Et in tractatibus su-

per sancti Joannis Epistolam: *Si nullus timor, non est quâ charitas in-*

*tret.* Et de pœnitentibus Ninivitis scribit in libris adversus Gauden-

tium: *Nec curarent, nec crederent prædicta Divina, nisi territi Regis sui*

*potestate terrenâ.* Homo veius in parente Adamo amisit fidem, spem,

charitatem, Dei dona omnia; quin ab illo apostatavit adeò longè, ut

neq; ipsi in servilem Divinæ justitiæ metum retinuerit, neque vires

ad Deo vel serviliter obediendum. Hæc uti excisa arbor, ita & exci-

sa justitia, non subito, sed gradatim ac pedetentim debet recrescere

in suam plenitudinem, incipiendo à primis rudimentis, seu à primo

sapientiæ exordio, quod est Divinæ justitiæ timor servilis. Hic in-

troducendæ sapientiæ & charitati præparat locum. Et hunc nostræ

reparationis modum adeò constanter servat Divina providentia, ut

nec Apostolum Paulum, vas singularissimæ electionis, censuerit ab

illo eximendum. Idem in Apostolicæ ad Philippsenses Epistolæ com-

mentarijs tradit S. Joannes Chrysostomus: *Si quæ ad vitam hanc perti-*

*nent, sine timore rectè acquiri non possunt, multò minùs spiritalia.* Cedo

enim, quis literas sine timore didici? Quis artem tenui sine timore? Quod

si ubi non imminet diabolus, sed sola negligentia impedimento est, tanto

opùs est labore, ut solam illam naturalem negligentiam vincamus, ubi tan-

tum impendet bellum, tanta impedimenta, qui fieri unquam poterit, ut sine

timore salutem consequamur? Et in monastica doctrina Archi-Mandrita

Dorotheus: *Fieri nequit ullo pacto, ut perfectus seu filialis timor alie-*

*ter, quam per Isagogicum seu servilem introducat.* Et iterùm: *Per-*

*fectus timor nullo modo haberi potest, nisi Isagogicus præcesserit.* Porro

filialis timor est proprius ac individuus charitatis sætus & comes,

ideò-

Sell 14.

c. 4.

Seil. 6 c. 6.

Catechu-  
menorum im-  
pœnitentia  
semper, pœ-  
nitentium  
Contritio  
communi-  
ter concipi-  
tur ex metu.

Psalm 49.

c. 17.

Tract 9.

L 2 c. 15.

Homil. 8.

Cap. 4.

ideòque sicut ipse, ita nec ista sine quasi obstetricante servilis timoris ministerio non potest introduci. At verò fideles lapsi passim in plenâ originalis nostræ iniquitatis vetustatem non recidunt, sed ipsorum multi sunt similes Apostolo Petro, de quo in negotiationis peccatum lapsus scribit in sermonibus de Dominica Passione sanctus Leo magnus: *Vidit in te Dominum, non fidem fictam, non dilectionem aversam, sed constantiam fuisse turbatam.* Ejus, quâ pro Christo Domino mori & carcerari sponderat, charitatem ait fuisse, non extinctam, sed à superveniente fortioris timoris cupiditate dumtaxat superatam & suppressam. Ejusmodi lapsos, quod fidem, spem, ipsamque etiam actua-lem charitatem retineant, in Epistola ad Antonianum Episcopum sanctus Cyprianus vocat, non plenè mortuos, sed semineces ac semivivos. In libro de Ecclesiæ unitate sanctus Augustinus appellat ramos infructuosos, necdum tamen præcisos. Has magnas amissæ justificationis & Divinæ gratiæ reliquias quandoque contingit statim à miserante Deo respici, & citra timoris servilis cooperationem ac excitationem in insignem & lacrymosam pœnitentiam resurgere ac ebullire. Etenim Petrum mox à lapsu respexit Dominus, atque hinc ille foras statim egressus flevit amarè. Plurimos olim in gentilium persecutionibus per tormentorum violentiam lapsos fuisse mox à Deo respectos, ideòque sese statim ad Ecclesiarum valvas & omnium stantium fidelium pedes projecisse in solennem Pœnitentiæ fletum, docent testes irrefragabiles, præsertim sanctus Cyprianus. Et talia Pœnitentium exempla nostris etiam temporibus per Dei gratiam non desunt. Hincigitur Catechumenorum semper, Pœnitentium autem Contritionem dumtaxat communiter ex servili timore concipi, rectè dicit sacrosancta Synodus Tridentina. Hocce Catechumenorum & Pœnitentium grande discrimen non intellexit marginalis Scholiastes ad superius adducta verba Archi-Mandritæ Dorothei: *Caute lege. Nam innuit nullo pacto haberi posse timorem filialem, quin præcesserit servili.* Ordinariè quidem ita evenit in peccatoris iustificatione extra Sacramenta, ut habetur capite sexto Concilij Tridentini; at contingit interdum aliter, cum qui per Sacramenta iustificatur, & in subitaneis & miraculosis iustificationibus. Respondeo Tridentinæ Synodi laudatum locum, nequaquam de danda extra, sed omninò intra Baptismatis Sacramentum danda justificatione palàm agere: Eam non quandoque, sed indefinitè, ideòque universaliter & semper inchoari dicit à servili timore. Conversiones subitaneas & miraculosas fateor posse esse extra regulam; addotamen etiam S. Apostoli Pauli, quæ penitus subitanea & omnium miraculosissima fuit, conversione omninò cæpisse à timore.

Ser. 9. c. 4.

Cap. 25.

Cur dica-  
tur com-  
muniter  
conciipi.

De imperfecta Pœnitentium Contritione sacrosanctum Conci-  
lium rectè dicit: *Communiter*. Etenim Abraham semen, seu Catholica  
Jesu Christi Ecclesia, non solum ut stellæ cœli, sed etiam ut arena  
maris, ex Divina promissione multiplicatum est. Spirituales, seu in ju-  
sticia perfectos, qui ex casto Dei amore agant omnia, & cadant rarissi-  
mè, plurimos; animales tamen & imperfectos, qui ex adjuto per ti-  
morem servilem imperfecto amore operantur justa, & frequenter la-  
bantur, habet longè plures. Porro eisdem animi viribus, quibus stetit  
in justitia, quisque passim à lapsu refurgit ac pœnitet, idèdque solo  
castæ dilectionis impetu excitantur ad resurgendum pauci, plurimi  
egent impulsu & adjutorio timoris. Hinc dicit sacrosancta Synodus  
imperfectam Pœnitentium Contritionem communiter concipi ex  
servili metu. Dicit in Martinum Lutherum, in memorata sua apolo-  
gia erroris sui fundamenta subvertentem, garrientemque solis crassis,  
induratis, impijs, & omni conscientia exutis, aut ipsam necdum na-  
tis peccatoribus esse opus isto adjutorio ac impulsu, idèdque non  
communiter, sed rarissimè ita concipi Contritionem. Dico, *Erroris  
sui fundamenta subvertentem*: Fatetur enim, licet rarissimè, tamen quan-  
doque servilem metum esse utilem, & ex ipso puram Dei dilectio-  
nem, veramque pœnitentiam generari. Quod ejus priori dogmati pa-  
lâm adversatur. Ex timore isto subinde, non tantum per successiva  
gradatim incrementa, sed & unico pleni germinis subito impetu pro-  
cedit etiam perfecta charitas, perfectaque Contritio: Ita enim evenisse  
Apostolo Paulo omnes credimus, disertèque in literis ad Bonifacium  
Comitem adfirmat sanctus Augustinus. Alit rarissimum est istud, uti  
in libris de vocatione gentium beatus Prosper rectè advertit, Dei do-  
num: Hinc sacrosancta Synodus solam imperfectam Contritionem  
adserit nasci communiter ex timore.

L. 1. c. 12.

Quæstio tertia est, Quare eadem sacrosancta Synodus imperfectam  
Pœnitentium Contritionem dicat communiter concipi, non solum  
ex servili gehennarum, sed etiam ex aliarum pœnarum metu, ex con-  
siderata item peccatorum turpitudine, numero, gravitate? Respondeo  
rationem dari à sancto Augustino, agente de Ninivitis, ad pœnalia  
Regis sui Edicta Pœnitentibus, in libris adversus Gaudentium, Do-  
natistarum Episcopum Thamugadensem: *Quid opus erat Regis impe-  
rio, ut humiliter supplicaretur Deo, qui non intueretur ora, sed corda, nisi quia  
erant in eis quidam, qui nec curarent, nec crederent prædicta Divina, nisi  
territi potestate humanâ? Istâ igitur iussione Regie potestatis multis ad sa-  
lutem præstatur occasio, quia etsi violenter ducuntur ad cœnam tanti Patris  
familias, & compelluntur intrare, intus tamen inveniunt unde se latentur  
intra-*

Concipitur  
etiam ex  
metu ma-  
lorum tē-  
poralium.  
L. 1. c. 25.

intraſſe. Eorum enim Contritionem uti veram ac Divinitus inſuſam ipſa ſacroſancta Synodus laudat. Quis nesciat etiam Apoſtoli Pauli converſionem & pœnitentiam, non ex gehennarum, ſed ex fulminis ac inde imminentiſ temporariæ mortis metu fuiſſe conceptam? Ex intentatarum à legibus imperialibus pœnarum metu plurimos item Donatiſtas ad veram Pœnitentiam fuiſſe traduſtos, frequentiffimè prædicat S. Auguſtinus. Eâdem viâ è peſſimis Judæis bonos fideles fecerunt quandoque Catholici Hiſpaniarum Reges, Reges Galliæ, Leo Iſaurus Imperator, nec non & ſanctus Pontifex Gregorius magnus. Et tunc de omni, quæ nobis per temporalia mala à Domino Deo præſertim irrogatur, diſciplina pulchrè in Hieremiæ Prophetæ commentarijs ſcribit Theodoretus: *Pœnitentia mater eſt.* Quocirca qui ſolum ſervilem gehennarum metum ſine introduſta per ipſum charitate laudari uti impetrandæ peccatorum remiſſioni cum Sacramento ſufficientem exiſtimant à ſacroſancta Tridentina Synodo, profiteri coguntur etiam patibuli aut Regij gladij metum eâdem dignitate & viribus pollere.

Cap. 6.

Quod vera Contritio etiam ex conſiderata peccatorum turpitudine, ſeu ex humanæ confuſionis dolore aut metu quandoque concipiatur, docet Regius Propheta: *Imple facies eorum ignominia, & quærent nomen tuum, Domine.* Et Eccleſiaſticus: *Eſt confuſio adducens peccatum, & eſt confuſio adducens gratiam & gloriam.* Exponitur literis ad Vincentium Rogatiſtarum Cartennenſem in Mauritania Episcopum S. Auguſtinus: *Confuſio adducit peccatum, cùm erubeſcit quiſque pravam mutare ſententiam, ne inconfans putetur, aut diverſus à ſeipſo ludice teneatur. Confuſio autem adducit gratiam & gloriam, cùm erubeſcit quiſque de propria iniquitate, & pœnitendo in melius mutatur.* Et in Pſalmorum commentario: *In ſæculum ſæculi non conturbantur, qui quærent nomen Domini, ſed reſpicientes ignominiam peccatorum ſuorum, ad hoc conturbantur ut quærant nomen Domini, per quod non conturbantur.* Hi ad hoc confunduntur, ne confundantur in æternum. Quod ipſum tradit in prima Concione ſuper Pſalmum trigefimum. Eleganter item per ipſa ſermè Tridentinæ Synodi verba jam pridem tradidit in literis ad Lincolnienſem Episcopum, exſtantibus in Spicilegio Lucæ Dacherij, Theobaldus Stampenſis: *Qui in ſe fremit, bona Dei & mala quæ ipſe reddidit computando, & in corde gemit ſeipſum de peccatis increpando, melius ſine voce loquitur, quam ſi voce ſine iſtu loqueretur.* Adfirmat & oſtendit iſtam eſſe veram Contritionem. Conſiderata peccatorum turpitudine facit hominem ſibi ipſi diſplicere & fœtere, cæcatos aut tenebratos mentis oculos aperit, ſternit viam ſapientiæ, juſtitia pulchritudinem facit di-

Etiam ex  
pudore hu-  
mano.

Cap. 4.

Epiſt. 48.

Pſal. 82.

Tom. 3.

ligi & appeti, atque ita iniquitatem odio haberi. Etiam hęc adversus Martinum Lutherum, huic item Contritionis origini nequiter & cecè insensum, sacrosancta Synodus est locuta. Et hęc quidem de Christiana Contritione breviter dicenda duxi, quam ab omnibus hominibus plenè cognosci, & perfectam haberi donet Deus optimus maximus, præsertim à me peccatore, infimo omnium Christianorum.



F I N I S.





# I N D E X

## RERUM MEMORABILIUM,

### Quæ in hac Differtatione continentur.

#### A.

- A**bsolutio à Græcis ob sola peccata venialia non impenditur. 6
- Amor creaturæ adfixus, quid? 25 26. Hunc perfecta charitas excludit. 25. Uti & omne servilem timorem. 26
- Amor creaturæ volatus cum charitate viæ consistit, nequaquam cum charitate patriæ. 26 27
- Amor Dei legem Divinam levem facit. 68
- Amor & timor utriusque testamenti discrimen est. 11
- Amor sui est omnis pravi affectus prima radix. 68
- Apostoli docuerunt sine dilectione accipi non posse Baptismatis effectum. 12. Adedque nec Pœnitentiæ. 13
- Attritio debet ex dilectione Dei super omnia profuere. 83
- Attritio debet servilitatem timoris excludere. 83
- Attritio essentialiter est dilectio. Ad justificationem proximè disponit. 10
- Attritionem ex metu concipi SS. PP. affirmant. 82
- Attritio ex metu servili concepta, vera ac sancta est. 82 83
- Attritio ex metu concipitur, non emanat. 85
- Attritio ex metu malorum temporalium concipitur. 88 89
- Attritio ex pudore humano quandoque concipitur. 89
- Attritio novum vocabulum est. 81. S. tamen Augustinus *Obtentionem* agnovit. 82
- Attritio non facit hominem hypocritam. 81
- Attritio Pœnitentiam communiter, Catechumenorum verò semper ex metu concipitur. 86 87 88

Attritio Vide, *Contritio imperfecta.*

S. Augustini locus ex tract. 13. super Joannem exponitur. 47. Aliæ ex lib. de Baptismo. 48. Item ex lib. Confess. 49

#### B.

- B**aptismi effectus sine dilectione non accipitur. 12
- Baptismus & conversio cordis sunt duæ causæ justificationis. 35 36
- Baptismus parvulorum ac Clinicorum sancto Chrysostomo plenè non probatur, cur? 30
- Baptismus plerumque ad justificationem necessarius est, quamvis interdum ejus votum sufficiat. 56
- Bellarminus existimat omnem charitatem justificare. Ejus rationes adducuntur & solvuntur. 47 & seqq.
- Bellarminus inter gradus charitatis non satis apertè distinxit. 47

#### C.

- C**ajetani sententia, qui docuit quamvis charitatem justificare, idedque contritum peccatorem posse communicare, ut falsa & noxia à Tridentino reprobat, non tamen ut hæretica damnatur. 60
- Catechumeni Divinâ charitate flagrantessuere. 33. 34. Nondum tamen iustificati. 34
- Argumentis in contrarium sit satis. 47. & seqq.
- Catechumenorum pœnitentiam ante Baptismum ex dilectione Dei agi oportet. 30
- Catechumenorum Attritio semper, Pœnitentium verò communiter ex metu concipitur. 86 87 88
- Charitatis varij gradus: inchoata, provecta, magna, perfecta. 21. nata, nutrita, adulta, robusta & perfecta. *ibid.*

Charitas inchoata, duplex. 21  
 Charitas una est super omnia quoad effectum, altera quoad affectum. 21 22  
 Charitas adulta, quid? 21 23  
 Charitas robusta, quid? 21 23  
 Charitas robusta & adulta variè inter se subinde commiscuntur. 23  
 Charitas perfecta, quid? 23 24 36  
 Charitas perfecta adultam & robustam includit. 24  
 Charitatem perfectam animalis homo non percipit. 24  
 Charitas perfecta facit, ut patienter vivatur. 25  
 Charitas perfecta, perfecta sub Deo obedientia est. 25  
 Charitas perfecta omnem adfixivum creaturæ amorem excludit, 25, non tamen omnem volativum. 26  
 Charitas perfecta omnem timorem servilem expellit. 26 37  
 Charitatis viæ & patriæ discrimen. 27  
 Charitatem solum sine Sacramento justificare, censuerunt nonnulli hæretici. 31  
 Charitatem omnem super omnia infallibiliter justificare, nonnulli Theologi opinantur. 32. Eorum fundamenta referuntur 33. & convelluntur. 50 11  
 Charitas aliqua sine Sacramento justificat. 36 37  
 Charitas perfecta cum reatu peccatorum non consistit. 37 38  
 Charitatis perfectæ fructus est remissio peccati, 38  
 Charitas sola discernit inter filios Dei & filios diaboli. 52 53  
 Charitas perfecta sine actuali Sacramento justificat, secus imperfecta. 56  
 Charitatem imperfectam non semper justificare, Conc. Trid. ex SS. PP. supponit. 60  
 Charitas imperfecta à timore adjuvatur. 66  
 Charitas sola voluntatem peccandi excludit. 69 70.  
 Charitas sola convertit animum. 70. objecta dissolvuntur. 70 71  
 Charitas quæ uxor diligitur, humana & licita

est: quæ propter Deum diligitur, Divina ac meritoria. 74  
 Charitatem ad Contritionem requiri, testantur Scriptura. 11. Baptismalis professio 12. ac natura Sacramenti poenitentiae. 13 14  
 Charitas, Vide, Dilectio.  
 Confiteri quamprimum debet, qui ex necessitate sine copia Sacerdotis in peccato mortali celebravit. 57. Quo casu charitas imperfecta non justificat. ibid.  
 Clinici olim irregulares, cur? 30  
 Contritio græcè Metanoia 1  
 Contritio est dolor animi & detestatio de de peccato commissio, cum proposito non peccandi de cætero: Quæ omnia ex SS. PP. sunt deprompta. 2 3 4  
 Contritio emendationis propositum præter dolorem requirit. 4 5  
 Contritio omnia mortalia detestatur, omnemque affectum peccati mortalis excludit, 5. non tamen omnem affectum peccati venialis. 6  
 Contritio est votum cavendi venialia, non efficax propositum. 6  
 Contritio sola, an justificet, antiqua quaestio est. 31  
 Contritio est causa justificationis: adversus Lutherum & Calvinum. 7. Estque SS. PP. unanimis consensus. 7 8  
 Contritionis comites, fides, spes, votum Sacramenti, voluntas servandi mandata Dei. 8 9 10  
 Contritio est conversio cordis. 9  
 Contritio essentialiter est Dei dilectio. 10  
 Probatur ex Scriptura. 11. Ex professione baptismali. 12. Ex natura Sacramenti Poenitentiae. 13 Ex Conc. Trident. 13  
 Contritio est detestatio peccati, non autem supplicij aut reatus. 15  
 Contritio expressam Dei dilectionem exigit. 19  
 Contritio tamen charitatem Dei robustam non requirit. 29. Argumenta in contrarium proponuntur. 27. 28. Ac dissolvuntur 30  
 Contritio generatim sumpta charitatem Dei super omnia requirit: at quævis sufficit 29

# I N D E X.

Contritio perfecta, ut justificet, Sacramenti  
votum exigit. 38

Contritio imperfecta sine Sacramento quan-  
doque justificat. 38. In veteri Testamento  
frequenter; in novo interdum, 39 40

Contritio imperfecta sine Sacramento in ar-  
ticulo mortis justificat. 43. 46. Argumen-  
ta in contrarium referuntur. 41. 42. Sol-  
vuntur. 45.

Contritio imperfecta in extrema necessitate  
nullas patitur *venie moras*, quo sensu? 50 51

Contritionem imperfectam esse peccatum  
Lutherus docuit. 73

Contritio imperfecta donum Dei est. 75

Contritio imperfecta actus infusus est; metus  
actus incussus. 76

Contritio imperfecta cum metu, ejusque ser-  
vilitate à Luthero perperam confunditur.  
78

Contritio imperfecta non est coacta. 79

Contritio imperfecta non facit hominem hy-  
pocritam. 80. Quinimò ab omni hypocrisi  
est remotissima. 80

Contritio ex metu concepta sancta est. 82 83

Contritio imperfecta, Vide, *Attritio*.

Cupiditas latens est peccatum mortale. 71

Testantur SS. Augustinus & Chrysostomus.  
71. 72. Rationi dubitandi propositæ. 71.  
Satisfit. 72

Cupiditas una patet, altera later. 70 71

## D.

Deus suprema Justitia est. 16. Item su-  
prema vita, virtus ac veritas. 17

Dilectio Dei expressa ad legem implendam  
non requiritur, sed ad Contritionem. 18 19

Dilectio Dei ut fontis justitiæ, germana di-  
lectio est. 18

Dilectio carnalis etiam vitæ æternæ datur.  
20

Dilectio casta & gratuita. 12 20

Dilectio judaica & carnalis. 19

Dilectio legis, legis plenitudo est. 11

Dilectio odium & dolore parit. 16

Dilectionis varia nomina. 18

Dilectionis varij gradus. 21

Dilectio sola discernit inter filios Dei & fi-  
lios diaboli. 52 53

Dilectio vita animæ est. 14

Dilectio perfecta & imperfecta, V. *Charitas*.

Diligere Deum, ut omnis justitiæ fons est,  
quid significet. 13 19

Diligere *sicut oportet*, quid significet. 12

Dolor ad Contritionem à Luthero non exi-  
gitur. 2

Dolor, introducta charitate, non est coactus  
aut involuntarius. 79

## E.

Ecclesia semper docuit sine Dei super  
omnia dilectione neminem posse justi-  
ficari. 84

Eucharistia confert primam gratiam per ac-  
cidens. 58. Adferuntur exempla. *ibidem*.

Eucharistiæ sumptio obligat in fine vitæ. 58

## F.

Fides animalis sufficit, ut quis gehennam  
metuat. 76

Fides infusa à timore frequenter supponitur.  
74 75. Quamvis non semper. Aliqua ra-  
men fides timori prærequiritur. 75

Fides, spes, votum Sacramenti, voluntas  
servandi mandata Dei, sunt Contritionis  
comites. 89 90

Filiationis Dei varij sunt gradus. 46

Fons omnis justitiæ Deus est. 18

## G.

Godescalci error. 30

Græci ob peccata venialia Absolutio-  
nem non impendunt. 6

## H.

Hæretici etiam ex fide animali gehennam  
metuunt. 75

Hypocrisis duplex peccatum est, hominem-  
que magis peccatorem facit. 80

Hypocrisis & hypocrita, quid? 80

## L.

**L**iberalitas in statu peccati mortalis donari possunt & acceptari. Non tamen effectum sortiri. 52  
Intellectus creatus ab arte omnipotentis Artificis dirigitur. 17  
Justificatio charitatis perfectæ tribuitur, imperfectæ cum Sacramento dūtaxat. 51  
Justificationis causa articulus necessitatis non est, sed occasio. 54  
Justificatio per solam Contritionem in extrema necessitate, est heteroclyta 36  
Justificatio sine Sacramento obtinetur in casu martyrij, extremæ necessitatis, perfectæ charitatis, & in quibusdam casibus imperfectæ charitatis. 55  
Justitia participata in homine est: Incommutabilis Deus ipse est. 16  
Imperfecta charitas, V. *Charitas imperfecta*.

## L.

**L**icet, qui sine prævia confessione communicavit, tenetur quamprimum confiteri. 58  
Iatro, qui cum Christo crucifixus est, justitiam obtinuit, vel ex Baptismo, vel ex fide admirabili, vel ex his vocibus: *Hodie tecum eris in Paradiso*. 48  
Lazarus figura peccatoris. 13 14  
Leges coercentes liberum arbitrium non extinguunt. 79  
Legis impletio expressam Dei dilectionem non exigit. 18  
Legis plenitudo est dilectio. 11  
Legis totius plenitudo est perfecta dilectio. 53  
S. Leo aiens nullas patitur venie moras vera conversio, Sacramentum Pœnitentiæ non excludit. 51  
Lex peccatum minuit & auget: Metus extenuat. 77  
**Lutheri** error de Contritione. 1. 7  
Lutheri fluctuatio circa naturam Contritionis. 1.  
Lutheri errores de metu gehennæ, à Trident.

damnati.

71. & seqq.  
Lutherus asseruit Contritionem imperfectam hominem facere hypocritam. 89  
Lutherus Contritionem imperfectam cum metu, ejusque servilitate perperam confundit. 78  
Lutherus Contritionis necessitatem non negat, sed causalitatem, quam fidei attribuit: cui Calvinus adstipulatur. 7  
Lutherus docuit gehennæ metum esse peccatum. 73  
Lutherus Catholicos calumniatur, quod Contritionem ex sola formidine peccati, aut solo naturali amore conceptam doceant cum Sacramento ad justitiam perducere. 81 84  
Lutherus sensu timorem gehennæ magis peccatorem facere. 77  
Lutherus inter tempus, quo nondum, & quo jam charitas inravuit, non distinguit. 80

## M.

**M**artyrium in non baptizatis opus habet Baptismi voto. 38  
Martyrium integræ civitates quondam expetivere. 24  
Metus gehennæ, Vide, *Timor*.

## N.

**N**ecessitatis articulus non est causa justificationis, sed occasio. 54

## O.

**O**dium & dolor sunt dilectionis scetus. 16  
Odium mali nascitur ex dilectione oppositi boni: Adedque odium peccati ex dilectione justitiæ. 15  
Oito Frisingensis S. Bernardum perperam impugnatur. 31. 32

## P.

**P**atienter vivere perfectæ charitatis est. 25  
Peccata venialia odimus, & cavere desideramus voto, non efficaci proposito. 6. Dñm tamen sola venialia confitemur, firmum vi-

vitandi addit propositum, plenaque affectus exclusio, necesse est. 6  
 Peccati mortalis à Contritione excluditur, non necessariò tamen affectus peccati venialis. 5 6  
 Peccator vivificatur ac suscitatur, antequam à reatu solvatur. 13  
 Peccatores graviore, nonnulli aliquantùm arcet, tum ab Absolutione, tum ab Eucharistiæ perceptione. 30  
 Peccati odium nascitur ex dilectione justitiæ. 15  
 Pelagiani cum Donatistis voluerunt homines solo amore, non timore duci. 82  
 Pœnitentia non solum est nova vita, adversus Lutherum. 1  
 Pœnitentiæ Sacramentum ad justificationem semper actu non debet suscipi. 55  
 Pœnitentium Attritio communiter, Catechumenorum semper ex timore concipitur. 86 87 88  
 Pœnitere sicut oportet, quid significet. 11  
 Perfecta charitas, Vide, *Charitas*.

## R.

**R**enuntiationes baptismales ex casto Dei amore profectæ. 29  
 Renuntiationes baptismales exponuntur. Olim ante Reconciliationem adhibebat. 4

## S.

**S**acerdos non tantum, sed etiam laicus, qui in peccato mortali sine prævia confessione communicavit, quamprimum confiteri obligatur. 58  
 Sacerdos qui contritus celebrat ob inopiam Confessarij sacramentali Confessione non præmissa, per Eucharistiam justificatur. 19  
 Sacramenta quædam ut superflua nonnulli hæretici repudiârunt. 32  
 Servilitas timoris. Vide, *Timor*.  
 Sicut oportet diligere, pœnitere, &c quid significet. 11  
 Solutio à peccatis vitam in peccatore supponit. 33 14

## T.

**T**imoris varia species. 60  
 Timor servilis, quid? 60 62  
 Timor filialis, quid? 60 62  
 Timoris servilitas, quid? 61 63  
 Timori gehennæ etiam adest servilitas. 61  
 Timoris casti & servilis discrimen. 61 62  
 Timor alius vanus, alius non vanus. 62  
 Timor gehennæ utilis est. 63 Ejus effectus. *ibid.*  
 Timor servilis à charitate perfecta pellitur. 16  
 Timor & amor utriusque testamenti discrimen est. 11  
 Timoris servilitas ab ipso timore potest separari. 63  
 Timor servilis bonus est. 63  
 Timor fuit in Adamo, sed non servilis. 64  
 Timor charitatem imperfectam *adjuvat*. 66 67  
 Timor gehennæ servilis est imperfectus. Oritur ex amore *sui*. 67 Dei legem non facit levem 68. Nec legem Dei adimplet 68 69  
 Timor servilis voluntatem peccandi non extinguit. 69 Cupiditatem patentem evacuat, secus latentem. 70 71  
 Timor est sapientiæ extrinsecum initium. 72  
 Timoris servilis imperfectiones recensentur. 67 & seqq.  
 Timoris servilis utilitates adferuntur. 64 & seqq.  
 Timorem servilem docuit Lutherus esse peccatum: imò & Contritionem itum, esse etiam. 73  
 Timor gehennæ non est peccatum. 73  
 Timor gehennæ actum fidei infusum frequenter supponit: ipse tamen actus infusus non est. 74 75  
 Timor gehennæ etiam exstat in hæreticis & paganis. 75  
 Timor actus incusus est, non infusus. 75  
 Timor ac Contritio imperfecta non parum discrepant. 76  
 Timor gehennæ non facit hominem magis peccatorem 76. Fundamentum Lutheri in contrarium convellitur. 77  
77

Timor peccatum extenuat , lex verò minuit & auget , cur ?	77	Timor gehennæ à peccatis externis coërcet.	64.
Timor , per quem ad misericordiam Dei de peccatis dolendo confugimus, intelligi po- test probabiliter initialis.	77. Ac etiam ser- vilis.	65. Aufert malas consuetudines. 65. cogit- que ad bonam voluntatem.	ibid.
Timor interdum ostendit homines esse magis peccatores.	78	Timor est Domini clamor, <i>Lazarus veni foras.</i>	65
Timor ante charitatem hominem invitum & involuntarium relinquit.	78	Timor ut verbi Dei prædicatio plantat ac ri- gat.	66
Timor & amor voluntatem in idem obje- ctum trahunt.	79	Trident. Concil. satis perspicuè tradit etiam ad imperfectam Contritionem requiri di- lectionem Dei super omnia.	84
Timor servilis non facit hominem hypocri- tam : id tamen Concil. Trident. non de- finivit.	79		
Timor servilis Contritionis occasio est , non caussa.	81		
Timor servilis in Catechumenis filialem sem- per præcedit.	85		
Timor initialis , quid?	86 87		
	64		

V.

V	Eritas nulla præter Deum æterna est.	17
V	Vita animæ dilectio est.	14
V	Vita animæ fit per actualem charitatem, at- que etiam per habitualement gratiam.	15
V	Vita æterna potest carnaliter diligi.	20
V	Vivitur rectè sine perfecta charitate.	54
V	Vita suprema Deus est.	17





Errata sic corrigantur.

**P**ag. 15. lin. 26. appositi, lege oppositi.  
Pag. 56. lin. 3. defuit, lege definit.  
Pag. 56. lin. 6. defuit, lege definit.  
Pag. 56. lin. 11. Aliter, lege Alter.

THESE DE COMPTES

DE LA SOCIÉTÉ  
DE LA MONTAGNE  
DE LA MONTAGNE  
DE LA MONTAGNE